

ქ. ვ. ვერა-გორგის ბაშ. საზოგ. გამოცემა, № 17

K 15.189
2

მეოთხე წიგნი

მეორე გამოცემა

დ.

ტფილისი.

ქალაქთა კავშირის სრამბა.

1919

ქ. ვ. წერა-გითხვის გამ. საზოგ. გამოცემა, № 175

მეოთხე წიგნი

ქადაგის გამოცემა

მეორე გამოცემა

ტ.

ტფილისი.

ქალაქთა კავშირის სტამბა.

1919

„ადე, ჩამოვიდა!“

(ფსიხოლოგიური ეტიუდი)

19.3.359
2

გოგია მეწისქვილე გულ-ხელ დაკრებილი მი-
ვიდა წისქვილის ქვასთან და ალას კვირისტავებით
მიეყრდნო. იმან გადახედა ქვის გარშემო სუფ-
თად მოგვილ სახრილეს, მერე ალაში ჩაიხედა,
რომელიც სახრილესავით სუფთად იყო მოგვი-
ლი და, უკმაყოფილოდ თავის ჩაქნევის შემდეგ,
კრიჭას გაშტერებით დაუწყო მზერა. სულ ერთ
წამს არ უმზერია ასე გაშტერებით, რომ იმან
გადაალაჯა და კრიჭას ძირიდან ხელი ამოჰერა.
კრიჭა მოხვდა ხვიმირს და ისეთი ხმა გამოილო,
რომ გოგია მიხვდა, ხვიმირში არა ყრია-რაო.
სარეკი-კი, რომელიც კრიჭასთან ულლით იყო
დაკავშირებული, ოდნავ შეთამაშდა და ქვაზე
რაკრაკი დაიწყო. ხვიმირის ხმას მაინც არ ერ-
წმუნა გოგია. ის შესდგა წისქვილის ქვაზე და
შიგ ჩაიხედა, თანაც ხელი მიუს-მოუსვა შიგნი-
დგან ხვიმირის გვერდებს და რაღგან ხელში არა
მოხვდა-რა, რამდენჯერმე მაგრად დაარტყა სი-
ლა, მაგრამ იმან მაინც ცარიელის ხმა ამოილო...

„ფუი!..“ — მწარედ გააფურთხა გოგიამ და უკანვე ძირს გადმოაბიჯა ფეხი.

დღეს რამდენჯერ გამოუჩინევია წისქვილის ყველა კუთხე, ძირი აღმა უქმნია, მაგრამ აგერ ეხლაც ისევ მიდის და სჩერეკავს. მიიარ-მოიარა ყველა კუნჭული, გაჩერიკა ყველა სამინდე კოდი, კასრი და ხოკრი; რამდენჯერმე გადააგორ-გადმოაგორა ლიტრიანები, მაგრამ კიდევ მაინც ვერ დაკმაყოფილდა. ის დალრეჯილის სახით მივიდა წისქვილის ქვასთან და მოწყვეტით ალაზე ჩამოჯდა; ნიდაყვები მუხლებზე დააყრდნო და ორივე ხელი თავის დამძიმებულ თავს ბოძკინტად შეუყენა.

რას ეძებდა გოგია ასე მოუსვენრად?

ფქვილს, ფქვილს და ფქვილს!

გუშინ უკანასკნელი ნახევარი თეფში ფქვილი ხმიადად გამოაცხო და გუშინვე შეჭამა, დღეს-კი აგერ დაწანწალებს და აქა-იქ, სადაც წინად მრავლად იყო ფქვილი, დაეძებს, მაგრამ ყველა ის ადგილი, ყველა საფქვილე ავეჯეულობა დაწმენდილი და დარაკრაკებული ხვდება. „ერთი ბეწო მაინც იყოს სადმე!..“ უსიტყვოდ იძახდა ყოველი გაჩერეკის დროს, მაგრამ ეს „ერთი ბეწოც“ არსად იყო, ფქვილის ნაალაგევიც აღარას ეტყობოდა...

— შე დალოცვილო ღმერთო, ერთი კიდევ გამაგონე ჩემი წისქვილის გოგვის ხმა და მერე თუნდ!.. — ხმა-მალლა წარმოსთქვა გოგიამ კარგა ხნის სიჩუმის შემდეგ და საფქვილე პირს გვერდზე შეხედა, საიდანაც, თითქოს ამ სიტყვების შემდეგ, ელოდა, ფქვილი გადმოიტანტებაო, მაგრამ ქვა არ იძროდა და საფქვილეც შეუგანგლავი შესცემოდა გოგიას. „ეჰ!“ გულჩარწყვეტით ამოიოხრა, რაკი ფქვილი ვერ დაინახა და თავი ისევ-ისე ხელებს დააყრდნო და იატაკის პატარა ნახვრეტიდან ლურჯად ამომკვრეტ ყინულს ჩაფიქრებით მზერა დაუწყო.

გარედან-კი მარქაფაზე გადამჩქეფი წყლის შუილი შემოისმოდა და გოგიას ათასგვარ ფიქრს უბადავდა თავში, წარსულს ჟღვიძებდა და აგონებდა იმ დროს, როდესაც მოცულა ალარც-კი ჰქონდა, რომ ცოტახანს შეესვენა და სული მოებრუნებინა, როდესაც იმის წისქვილის კარზე ურმების ჭრიალი იდგა და სავსე საცალოები შეჰქონდათ და გამოჰქონდათ.

გოგია თან-და-თან გაიტაცა ამ მოგონებამ და სულ დაავიწყდა ეხლანდელი დრო.

ესმის გოგიას, რომ დატვირთული ურემი ჭრიალით მოადგა კარს. აგერ, ტომრების შემოტანაც უშველა და მინდის ალება დაიწყო. მე-

რე, რამოდენა მინდს იღებს?! თითქმის ერთ
 დიდი სიმინდის კასრი აავსო და გაბრწყინებული
 დასკვერის. იმის სიხარულს საზღვარი აღარ
 აქვს. უხარიან, რომ ამ ზამთრის საგძალი იშო-
 ვა. იმდენი ერგო მინდში, რომ ზაფხულამდის
 მიჰყვება ეს და ზაფხულში-კი, ღვთის მაღლით,
 ახალი მოვა.

ხვიმირი კიდევაც აავსეს და ახლა ღარში
 წყლის მოგდება-ლა აკლია, რომ წისქვილმა მუ-
 შაობა დაიწყოს.

გოგიამ ლარის თავიდგან ჩქარა აიღო ფი-
 ცრები და მარქაფას ჩაუწყო, რის შემდეგაც
 წყალი ლარისკენ გაქანდა და... და... ცოტა ხა-
 ნიც და ბორბალმა წყალი ააქაფა, ააშფოთა და
 წვრილსა და მსხვილ მბრჭყვინავ წინწკლებს
 წისქვილის ქვეშ გაბმით ფანტვა დაუწყო. სარე-
 კი წისქვილის ქვაზე არაკრაკდა, რის გამოც
 კრიჭა ინძრევა და ხორბალს, თითქოს სთვლი-
 სო, მარცვლობით ქვის ყელში პყრის. ქვა-კი
 გუგუნებს, გუგუნებს და ყოველ დაგუგუნება-
 ზედ საფქვილე პირიდან ბლუჯა-ბლუჯა ფქვი-
 ლი გადმოდის და აღაში სრიალი ჩააქვს. ქვის
 გუგუნი, სარეკის რაკრაკი და წყლის შუილი
 ერთად ერთდებიან და ერთგვარი ხმა გამოისმის,
 რომელმაც გოგიას გულში განუსაზღვრელი სი-

ხარული აღძრა. ღმერთო, რამდენი ხანია, რაც
გოგიას ეს სანატრელი ხმა აღარ სმენია!.. ეხლა
ასმინე და აგერ როგორ აღტაცებით სულ-
განაბული უსმენს ამ ნეტარ ხმას, და აღტაცე-
ბისაგან თვალთ ცრემლი მოსდის...

— გოგია!.. — ამ დროს დასძახა ერთმა
პარკ-აკიდებულმა შუა ხანში შესულმა კაცმა,
რომელიც ის-ის იყო წისქვილში ხელების ფშვნე-
ტით შემოვიდა და გოგიას თავს წააღვა.

— ჰა!.. საფქვავი მოიტანე?!

— ჰო!..

— გვიან მოგერგება ჯერი, სხვაგან წაიღე,
ვერა ხედავ, რამოდენა საფქვავია აქ?! — დაბნეუ-
ლად წამოიძახა გოგიამ და თავი ისევ ჩაჰავდა.

— რას ამბობ, კაცო, საფქვავი აბა სადა
გაქვს?! — გაკვირვებით შეხედა გაყინულ წისქვი-
ლის ქვას და პარკი მოიხსნა.

— საფქვავი?!.. არ არის?!.. — გაკვირვებით
დაეკითხა ახლად მოსულს და აქა-იქ თვალების
ცეცება დაიწყო.

უეცრად შესწყდა სანატრელი ხმა წისქვი-
ლისა. აღარ ისმის სარეკის რაკრაკი და აღარც
ქვის გუგუნი. გარედან მარტო მარქაფაზე
წყლის შუილი-ლა შემოისმის.

— უჰ!.. — გულ-ჩაწყვეტით წამოიძახა გო-

გიამ, როცა დარწმუნდა, რომ ის სანატრელი ხმა, რომელიც სულ რამდენიმე წუთის წინაღ ესმოდა და ოლტაცებაში მოჰყავდა, მოჩვენება იყო, და ჩმუჩვნით წამოდგა.

— აბა, შენი ჭირიმე, გოგი, დროით დაბრუნე, თორემ შინ სახლობა სიმშილით მიწი-ვის!

— ხორბალია? ჰა!.. სად გიშოვია?.. — ზედი-ზედ დაეკითხა და პასუხს ალარ მოუტადა, ისე გავარდა გარედ და წყალი მარქაფაზე საჩქაროდ მოწყვიტა.

ახლად მოსულმა ხორბალი დააყარა და ქვამ ჩქარ-ჩქარი გუგუნი მორთო.

წელან თუ მოჩვენება იყო, ეხლა ნამდვილია!.. ეხლა ნამდვილად ესმის გოგიას ეს სანატრელი ხმა. ღმერთმან უსმინა და აუსრულა თხოვნა: კიდევ გააგონა ტკბილი ხმა... ხომ აუსრულდა ნატვრა და მაშ რალად შესცემის ასე დალონებული და მობუზული მბრუნავ ქვას?!

„შე დალოცვილო ღმერთო, ერთი კიდევ გამაგონე ჩემი წისქვილის ქვის გოგვის ხმა და მერე თუნდ...“ ინატრა წელან და, აჰა, აკი გააგონა!..

არა, შესცდა წელან, ეხლა ნანობს, რომ მაგრე ინატრა და არა სხვანაირად. „წისქვილის

ქვის გოგვის ხმის“ გაგონება იმისთვის უნდოდა გოგიას, რომ მინდი აელო და თავისი მოთხოვნილება დაეკმაყოფილებინა, სიმშილი მოეკლა. იმას უნდოდა ამ ნატვრით გამოეხატნა, რომ საფქვავი ბევრი მოვიდესო და არა მარტო ხმა გამაგონეო, თორემ „წისქვილის ქვის გოგვის“ ხმის გაგონება რომ სდომებოდა, განა უსაფქვაოდ-კი ვერ მოუგდებდა წყალს და ქვას ხრიალს ვერ დააწყებინებდა?!

ვისი ბრალია?! როგორც ინატრა, ისე აუსრულდა. აკი ამისათვის ხმას არ იღებს და მარტო დალონებული შესცეკრის ფქვილს, რომელსაც ერთ მუჭასაც ვერ მოაკლებს: სირცხვილით როგორ სთხოვოს მინდი ნახევარ კოდ ხორბლის გამოფქვაში?! ღმერთი აღარ არის?! მაგრამ რა ქნას, რომ სიმშილი ძალას ატანს?!

ფქვილის დანახვაზე მუცელმა სულ კაკანი დაუწყო და სიმშილი უფრო გაუცხოველდა. გოგია ხმის ამოუღებლივ გატრიალდა და გარედ გავიდა, რომ ფქვილისთვის აღარ ეცქირნა. ხორბლის პატრონი-კი მხარ-თეძოზე წამოწოლილიყო და გაჩაღებული ბუხრისთვის ზურგი შეექცია. იმისი ღრმად ჩანაოჭებული შუბლი ამტკიცებდა, რომ არც ის იყო ხაამური ფიქრებით გატაცებული...

გოგია დაჩაგრული სახის გამომეტყველებით, მღბუზული და გულ-ხელ-დაკრებილი წისქვილის კედელს აეტუშა. სითბო-გამოლეჭული მზის სხივებისაგან თვალებ-ჩაჭუტული უსიცოცხლოდ გასცემული ალაზნის ველს, ომელ-საც თეთრი ზეწარი გადაპკროდა და ბზინვა გაპქონდა.

— ღმერთო, გაზაფხული მაინც ჩქარა დადგეს!.. — წამოიძახა გოგიამ კარგა ხნის სიჩუმის შემდეგ და ალაზნის ველს აქეთ-იქით თვალი გადაავლო, თითქოს ელოდა, ეხლავე დადგება გაზაფხული და ველი ამწვანდებაო. მაგრამ მწვანე ვერსად დაინახა, ყველგან ბრწყინავი თოვლი დახვდა...

„ფქვილი, ფქვილი, ფქვილი!..“ წისქვილის ქვა-კი ამას ჩასძახოდა ყურში ამ დროს და მაღას ულვიძებდა.

— მეც მინდა ფქვილი, მაგრამ საიდან მოვიტანო?! — მწარის ღიმილით უპასუხა გოგიამ ქვას და თვალები დახუჭა.

„შედი შინ... შინ შედი, შინ, შინ!..“ — ჩასჩურჩულებდა თავის მხრით ბორბალზე მჩქეფი წყალი.

წყალი და წისქვილის ქვა ერთად შეერთდნენ და განუწყვეტლივ ამას ეუბნებოდნენ:

„შედი შინ, შინ, შინ! ფქვილი, ფქვილი,
 შედი შინ, შინ!.. სთხოვე ფქვილი, სთხოვე
 ფქვილი, ფქვილი!..“

გოგიაშ ყოყმანი დაიწყო: უნდოდა შესუ-
 ლიყო და ფქვილი ეთხოვნა, მაგრამ რცხვენო-
 და...

— ეჭ, რაც უნდა გახდეს, ვსთხოვ!.. — ხე-
 ლის ჩაქნევით გადაწყვეტით წარმოსთქვა, რაკი
 ქვა და წყალი თავისის არ იშლიდნენ, და შინ
 შევიდა.

ის თავს წაადგა ბუხრის პირას მწოლარეს
 და დაიწყო აკანკალებულის ხმით:

— შენი ჭირიმე, გეგე...

იმან თხოვნა აღარ დაათავა, რადგანაც და-
 ინახა, რომ გეგეს ჩასძინებოდა და გულიანად
 ხვრინავდა.

უეცრად თავში სხვა აზრმა გაუელვა
 და ამის მიხედვით თეფში ხელი წამოავლო
 და ალასთან მივიდა, რომ ფქვილი ამოელო ჩუ-
 მად და ასე დაეხსნა თავისი თავი თხოვნისაგან.

ცალი ხელით თეფში ფქვილში წაურია
 და მეორით-კი კრიჭა შებერტყა, რომ უკანა-
 სკნელი მარცვლებიც ჩამოეყარა იქიდან.

— ეს რას მეყოფა?!.. — წამოიძახა იმან,
 როცა სავსე თეფში დახედა, და ისევ შიგ მოა-

ქცია...—ქურდობა გავწიო და ერთი თეფშისა...
 თვის!...

„ხა, ხა, ხა, ხა!.. სულ, სულ!..—ჩისძა...
 ხეს ამ დროს ქვამ და წყალმა.


— ჰო, სულ, სულ!... მე-კი ადამიანის
 შვილი არა ვარ?!... მშიერი ხომ არ მოვკვდე-
 ბი!?.—აღელვებით წამოიძახა და საჩქაროდ ნა-
 ჯახს ხელი წამოავლო.

„მოჰკალ, მოჰკალ, მოჰკალ!..“—ქვა და წყა-
 ლი აქეზებდნენ თავიანთი ხმით და აბედვინებ-
 დნენ გოგიას მკვლელობას.

თვალებ-ანთებული და ნაჯახ-ამართული
 თავს წაადგა მძინარეს და ის-ის იყო უნდო-
 და ნაჯახი დაეკრა, რომ ამ დროს იდუმალმა
 ხმამ ჩასჩურჩულა ყურში: „აბა, შენი ჭირიმე,
 გოგი, დროით დააბრუნე, თორემ შინ სახლობა
 სიმშილით მიწივის!“

ამ ხმაზე გოგიას მკლავი მოუდუნდა და
 ნაჯახის მაგივრად ფეხი ოდნავ წაჰკრა თავში.

— ადე, ჩამოვიდა!..—ფეხის წაკვრასთან
 ერთად აღელვებული ხმით დასძახა ზევიდან
 და საჩქაროდ გარეთ გავარდა...



„ბერია, რადა მკლავ?!”

— არ მომეკარო, არ მომეკარო!.. — ეშმა-
კურის კისკისით შესძახის თინა ლეოს და ხან-
ერთ ბუჩქს შემოურბენს გარს და ხან მეორეს.

— ჭივ-ჭავ!.. ჭივ-ჭავ!.. — იქავე ბუჩქებში
ბელურები და ჭყივიან და ერთი შტოდან მეო-
რეზე გადახტიან. ერთი მეორეს უსხლტის,
ახლოს არ იკარებს.

ეალერსება, გარს დასტრიალებს და ფრთე-
ბის კანკალით გვერდით უჯდება, მაგრამ საძა-
გელი ბელურა სტანჯავს თავის მოარშიყეს: კეპ-
ლუცად ისიც ფრთებს არხევს, ოდნავ ნისკარტს
ახებს და მისრიალებს სხვა შტოსკენ, მეორე
ბუჩქისკენ. საწყალი მოარშიყე! სატრფოს ამგვა-
რი ქცევით უფრო ცეცხლ-მოდებული, უკან
მისდევს და ცდილობს გული მოულბოს ცულ-
ლუტს, მაგრამ...

— გენაცვა, თინა, ჩემო კარგო! — ათროთო-
ლებულის ხმით მისძახის და მისდევს უკან ლეო
თინას.

დაიღალა ლეო, დაიქანცა და შესდგა. აჩ-
ქარებით სუნთქვავს, თავ-პირს ლვართქლი ჩამო-

სდის და უიმედოდ, გაუბედავად უმზერს თინას, რომელიც ცოტა მოშორებით შესდგა და ამისკენ მოტრიალდა. ლიმილით... წარმტაცის თვალით შესცეკერის თინა დალონებულ ლეოს და უსიტყვოდ ეუბნება: „სულელო, რაღას მიცერი და არ დამიჭერ, ხომ შენ ხელთა ვარ?!.“

თინას ალერსით და იმის მშვენიერის სახით წაქეზებული ლეო გიჟივით გადახტა იმისკენ და მკლავში ხელი გაჰკრა.

— ხა, ხა, ხა!.. — ხარხარით გაუსხლტა თინა იქვე მდგომი ვერხვისკენ. .

— თინა!.. — თავ-ბრუ-დახვეული გაბედვით უკან გამოედევნა ლეო.

— ჭივ-ჭავ!.. ჭივ-ჭავ!.. — ჭივ-ჭავით ბეღურებიც გაეშურნენ ვერხვისკენ შტოზე.

ვერხვის ჭვეშ თინა მოტრიალდა. ეგონა, ლეო არ დამედევნებაო, მაგრამ ის წინ შეეფეთა და მაშინვე მკლავები შემოურკალა.

— დაგიჭირე!.. დაგიჭირე!.. — კანკალით ეუბნება ლეო და თან თინას გულზე თავ-დავიწყებით იკრავს.

— ჭო!.. ჭო!.. გა-მი-შვი!.. — დაბნევით უპასუხებს და მეტის-მეტი აღელვებისაგან თვალები ელულება.

— გენაცვა!.. გენაცვა!..

— ჰე!.. ჰე!..

თრთის ლეო, თრთის თინა. ორსავე მუხლები ეკეცებათ, სხეული უდუნდებათ, ელეშებათ. სულ ერთი წუთიც, და ორნივე ძირს დაეშვნენ.

— ჭრრ-ჭრრ! წრრ!.. — ზევით, ვერხვის უტოზედაც შექმნეს ჭრიჭინ-წრიპინი.

გაზაფხულის მზე-კი ჰეთენს თავის გამაცოცხლებელი, ნაზ სითბოს არე-მარეს და ყოველ არსებას საალერსოდ იწვევს, მხოლოდ გრძნობად ჰქმნის და სასიყვარულოდ ახმაურებს...

— სსს!.. — აასისინა ვერხვმაც ნაზი ფოთლები და ამანაც შეუერთა სიყვარულის საგალობელს თავისი ხმა.

სისინმა ჩანთქა ყოველ არსების ხმა. ჭრიჭინ-წრიპინი, თრთოლა-თახთახი, ქშენვა და ზუილ-შრიალი სისინად გარდიქმნა. უკანასკნელი „ს“ მისუსტდა, გაუგებრად საღლაც შესწყდა და ჩამოვარდა სამარისებრივი სიჩუმე, მაგრამ ტკბილი, ნეტარი სიჩუმე...

— ტა-ტა-ტა-ტა— ტა-ტა-ტა-ტა!.. — დაუტატანეს ბელურებმა თინას და ბუჩქებიდან ზევით ამოფრინდნენ.

ბელურები ჟივილ-ტატანით დასტრიალებდნენ ბუჩქებს და ცდილობდნენ, როგორმე შე-

ეფერხებინათ იმათკენ მიმავალი თინა. ბუჩქებ-ში-კი ბარტყები-ლა დარჩნენ და, მშობლების ალიაქოთი რომ დაინახეს, თითონაც დაიწყეს საცოდავად ჭყივილი. ბარტყების ჭყივილზე მშობლები სულ გაცეცხლდნენ.

იმათ ჭყივილზე მეზობელი ბუდობაც მოცვიდა და მაშინ ხომ აიმართნენ და პირდაპირ იერიშით მიდიოდნენ თინასკენ.

— დაიკარგე, დაიკარგე!... — ჭყიოდნენ ბელურები, მაგრამ თინას იმათი ტევა არ ეყურებოდა.

ის თავ-ჩაკიდული, დაღვრემილი, ფიქრში, გართული აჩრდილივით მიიპარებოდა და თითქმის შიგ ბუჩქებში შევიდა.

აქნობამდის ბელურები თუ ცოტათი ფრთხილად იჭერდნენ თავს და თინას ზედ არ სცვიოდნენ, ეხლა-კი, როცა თინა ბუდეს წაადგა, მეტი ლონე არ იყო, უნდა გაბედვით ემოქმედათ. ერთი მათგანი გაქანდა და ფრთა ლონივრად ცხვირში გაჰკრა.

— ღმერთო, სად მოვსულვარ?! — ამ შემთხვევით გამორკვეულმა გულ-ამოსკვნით წამოიძახა და მიიხედ-მოიხედა. — აახ!... — თავის-დაუნებურად წამოიკვნესა, ვერხვს რომ თვალი მოჰკრა, და ტანი მთლად შეერყა. თვალებზე

ხელი მიიფარა, რომ ვერხვი არ დაენახა, მაგრამ მკლავები ჩქარა მოუღუნდა და მხრებზე მოწყვეტით ჩამოეკიდა...

ნახევრად დაბუმბლული ბარტყები-კი ჭყიოდნენ, რაც ძალი და ღონე ჰქონდათ, და უშნოდ აღებდნენ ყვითელ ნისკარტებს.

თინამ-დააშტერა სიგამხდრისაგან მორღვეული თვალები ბუდეს, საიდანაც ღლანჭია კის-ჩები ამოეწოწოლავებინათ ბარტყებს, და იმათ დანახვაზე სამარცხვინო აზრმა გაუელვა თავმი: დასრისოს, ასო-ასო დაფლითოს, რომ იმათი წრიპინით, მშობლების წივილით დასტკბეს და გული გაიგრილოს, იმისი ჯავრი ამათზე ამოიყაროს. ხელებიც-კი უნებურად შეუთამაშდა და წაატანა, რომ თავისი განზრახვა აღსაჩულებაში მოეყვანა, მაგრამ უეცრად ურუოლით უკან დაიწია. თავის განზრახვისა შეეშინდა.

თავ-ჩაღუნული შერცხვენით გამობრუნდა.

— იი, შე საძაგელო, შენა!..—დაუტიეს ედურებმა და ვერხვის ძირამდის ტევით მიაკიდეს.

დიდხანს ალარ უწივლ-უკივლიათ ბეღუ-ჩებს. რაკი დაინახეს, რომ თინა ჩათუთქვილ-იოლეშილი ვერხვის ძირს მიესვენა, დამშვიდენენ, დაწყნარდნენ. გამარჯვება მიულოცეს

ერთმანეთს, და მეშველი ბეღურები თავიანთ
ბინებისკენ გასრიალდნენ. დარჩა მარტო წყვი-
ლი ვერხვის ახლო ბუჩქთან. დედალი ბეღურა
საჩქაროდ ჩაეკრა ბარტყებს, წასჩურჩულ-მიუ-
ლერსა და იქავ ახლო-მახლო საზრდოს საძებ-
ნელად წავიდა. მამალი-კი ადგილიდან არ იძ-
როდა და თინას თვალს არ აშორებდა.

— გეგონა, — ჩაეჭუკჭუკა შორი-ახლოდან
ბეღურა: — ადვილად დაგანებებდით ჩვენს შვი-
ლებს?!.. შეგშურდა განა?! შენც გინდა ჩვენ-
სავით ხარობდე, მაგრამ ტყუილი სურვილია...
სად არის მომავალი შენი შვილის მამა?.. ხომ
ერთად ვიქორწინეთ!..

— გაჩუმდი! კმარა, კმარა! სად არის?..
არ ვიცი. წავიდა... წავიდა და ეს მომწერა
წასვლის დროს: გთხოვ, დამივიწყოვო.

— ხა, ხა, ხა, ხა!.. — ჩაიჭუკჭუკა ბეღუ-
რამ: — შენც-კი მიატოვებდი სიყვარულის ნა-
ყოფს, განა, რომ შეგეძლოს?!.. გეტყობა, სა-
შუალებას ეძებ, უდროვოდ მოიშორო ტვირ-
თი. თუ კიდევ მოუცადე და თავის დროზე
დაგებადა, მაშინვე მიაღრჩობ და... არა, არა,
არა?..

— კმარა!..

— ხა, ხა, ხა!.. არ გესიამოვნება?! აბა

მაგრე ნუ მოიქცევი, თუ ყველამ შენ არ ჩაგ-
ქოლოს და თითით საჩვენებელი არ გაგხადოს!..
საძაგლებს, მოუგონიათ რაღაც კანონები და
თუ ამ კანონების ასრულების შემდეგ ეყოლათ
შვილი, ყველა ულოცავს, თუ არა და ჰქო-
ლავს, თითქოს იგეთივე ბავშვი არ ებადებო-
დეთ. კარგია, არა?!.. ხა, ხა, ხა!.. — წაიკასკასა
ბელურამ და ნისკარტით ფრთხები ჩაიკაზა.

— ღმერთო!..

— კრრრ! — დედა-ჩიტი უკვე მოფრენილი-
ყო და კრიალით საზრდოს აძლევდა ბარტყებს...

მამა-ჩიტმა თავისი ადგილი დაუთმო დე-
და-ჩიტს, როდესაც ამ უკანასკნელმა ჭია-ლუით
გატენილი ნისკარტი გაითავისუფლა და ამას
გვერდით ამოუჯდა. ახლა თითონ მამა-ჩიტი წა-
ვიდა საზრდოს საშოვრად.

თინა-კი ისევ ისე უძრავად იჯდა და შე-
ნატროდა ბელურებს: „რა კარგი იქნებოდა, მეც
ეგრე ვხარობდე ჩემს ოჯახში, — ფიქრობდა
თინა: — ხომ ერთმანეთი გვიყვარდა, და...“

კიდევაც ხარობს თინა.. ეხლა ამისთვის
ვერხვი, ბუჩქები, ბელურები ალარ არსებობს.
ვერასა ჰქედავს. ზის თავის ოთახში, სადაც პა-
ტარა, მეტად მშვენიერი, ბუნჩულა ბავშვი და-
გოგავს, დედას მუხლებზე ეხვევა, მკერდისკენ

იწევს. ესეც გატაცებული იკრავს გულში, თვალებს უკოცნის. აგერ, ოთახის კარიც შემოელოდა ლეო, ამისი საყვარელი ლეო შემოვიდა.

— შენ ლოდინში თვალ-გული გადამელია! სადა ხარ აქნობამდის? — ცოტათი საყვედურის კილოთი და გაბუტვით ეუბნება თინა.

— რა ვქნა, გენაცვალე, დამიგვიანდა?! მაპატივე!... — სიყვარულით ეუბნება ლეო და თან ნიკაპს უწევს ზევით, რომ თავი მაღლა ააღებინოს და ტუჩები ჩაუკოცნოს.

— მიპატივებია, თუ კიდევ არ გაიმეორებ. — ეუბნება თინა და თან საკოცნელად ტუჩებს უშვერს...

ოხ, რა ნეტარებას გრძნობს!.. ისე მისუსტდა, მიილულა, რომ ტუჩების მოშორების თავი ალარ აქვს. ან-კი რად უნდა მოაშოროს?! ნეტარების მეტს ხომ არასა გრძნობს და არა სჯობია, რაც შეიძლება დიდხანს გასტანოს ამგვარშა მდგომარეობამ...

თინა თვალებ-მილულული ოდნავ აცმაცუნებს ტუჩებს, თითქო სუნთქვა, სიცოცხლე თავის ლეოს უნდა გარდასცეს ამ ნეტარების დროს და ეს გრძნობა გაჰყვეს თან...

— ჭივ-ჭავ!... — მამა-ჩიტს უკვე გამოეცვალა დედა-ჩიტი და თავისებურად ჩამოუკვესა

ეჭახედ თინას, თითქოს ყურის დაგდებასა
სთხოვსო...

თინას. ლახვარივით ეცა გულს. უეცრად
ოცნებიდან გამოიყვანა ამ ხმამ და დაუბრუნა
სინამდვილეს...

ოხ, რა საშინელი ტანის წვა იგრძნო, რა-
ნაირად გული მოუკვდა, ჩაეთუთქა, როდესაც
გამოერკვია და იგრძნო, რომ რაც ამ წუთის
წინ ნახა, მხოლოდ ოცნება იყო....

გული მოეკუმშა, მხრები მოეკრუნჩხა და
სუნთქვა გაუძნელდა...

— ბეჩა, რადა მკლავ!.. — გულ-საკლავად
წაჰკვნესა ლეოს ლანდს თინამ და თვალთაგან
ნაკადული გადმოსკდა.



„ჭ ე შმარილე აღ!..“

(სააღდგნომო ეტიუდი)

...—მეც... მეც უარი ვსთქვი!.. მეც უარ-
გყავ, მეუფეო!..—სიმწარით გაიძახოდა პეტრე
მოციქული და მიწაზე გართხობილი ცრემლით
ნიადაგს ალბობდა.

თვალ-წინ ნათლად ეხატებოდა მასწავლე-
ბლის ნაზი, მისუსტებული, მაგრამ ღვთაებრი-
ვის ძალით მოცული სახე. ისინი სცემდნენ,
ჰგვემდნენ, თავზე ეკლის გვირგვინს ადგამ-
დნენ, მაგრამ ქრისტე-კი ყოველსავე ამას უსი-
ტყვოდ იტანდა, თავს არ იცავდა. საყვედუ-
რიც-კი არ უთქვამს იმათვის. სამაგიეროდ,
ღმერთს ავედრებდა: შეუნდე უფალო, რამე-
თუ არ უწყიან, რასაც მოქმედებენო...

— საზიზლრები!... — წამოიძახა პეტრე მო-
ციქულმა და წელში აიმართა, როდესაც თვალ-
წინ წარმოუდგა თვალებ-ახვეული ქრისტე, რო-
მელსაც „ყურიმალსა“ ცემით ხან ერთი ეკით-
ხება და ხან მეორე: „გვიწინასწარმეტყუცლებდე
ჩული, ქრისტე, ვინა გცა შენ?..“

— სულ უკანასკნელს არ მოექცეოდნენ ეგრე, ეგრე მასხარად არ აიგდებდნენ და არ დაამცირებდნენ და იმას-კი, თითქოს ბალლიაო, თვალები აუხვიეს და სიცილით, ხარხარით ეკი-თხებოდნენ: გამოიცან, ვინა გცემსო.

ის საზიზღარი, დამამცირებელი სიცილი ებრაელთა ეხლაც ყურებში მოესმა და სხეულში გველივით ჩაეხლაკნა, რამაც საშინელი ჩხვლე-ტა და წვა მიაყენა და გონება აურია.

— აახ!... — სხეულის გრეხა-წრეხით წამო-კვნესა და ჭალარა თხელ თმას ორივე ხელით დაებლაუჭა.

გამოსწია რაც ძალი და ლონე ჰქონდა და საჩქაროდ ორსავე ხელში თითო ბლუჯა თმა შერჩა.

— იმ დროს მე იქვიდექი, ვუცქეროდი ამ დამცირებას და იმის მაგივრად, რომ მივშველე-ბოდი, თავი იმის გვერდით მომეკლა, იმის მოწაფეობაზე უარს ვამბობდი! ხა, ხა, ხა!... — ტირილზე უარესი მწარე ხარხარი დაიწყო პეტ-რე მოციქულმა, თითებს-კი იმტვრევდა, იკვნე-ტდა და თმით იწრეხდა.

— ყიყლიყოოო! — იქვე მახლობლად ფრთის შემოკვრით შეჰქივლა მამალმა.

— ჰაა!.. გაჩუმდი, გაჩუმდი!.. შენი მო-

გონება არა მჭირია, გაჩუმდი!.. უარს არ კყოფ, არა, არა და არა! მე იმისი მოწაფე ვარ, გეყურებათ?! — ფეხზე წამოჭრით დაუწყო მამლებს ტევა, მაგრამ მამლები მაინც ყიოდნენ. მთელი ქალაქის მამლები ერთმანეთს ამცნობდნენ განთიადის მოახლოვებას და პეტრე მოციქულის სასტიკ ბრძანებას ყურადღებას არ აქცევდნენ.

— სად არიან სხვა მოწაფენი, სადა?! ყველანი მოშორდნენ, ყველამ თავი მიანება. ის ჰვევემებს, ჯვარს აცვეს და მოჰკლეს და ჩვენკი მივიმალენით, გავიფანტენით! სად არიან, სადა?! რითა ვართ ჩვენ იუდაზე მეტი, რითა!... ჰაა, ჰაა!..

თითქოს სული ეხუთებაო, ისე-ლა ხრიალებდა, და თან რაც ძალი და ლონე ჰქონდა, იქ მდგომ ხეს ებლაუჭებოდა და თავისკენ ჰხრიდა...

— ჰაახ!.. — უეცრად მოილო ხემ ჰახანი და პეტრე მოციქული გულალმა გადაიქცა.

მისწყდა ხმაურობა, მამლებმა ყივილი შესწყვიტეს და თავი ისევ ძილს მისცეს. ხის ჰახანზე ახლო-მახლო დაბუდებულნი ფრინველნი გამოეხმაურნენ ერთმანეთს და, რაკი განსაცდელი არა დაინახეს-რა, ისევ ჩაიძვრინეს კისრები და ძილს მიეცნენ.

პეტრე-კი ისევ გულალმა იწვა და შესქერო-
ლა ცის სივრცეს, სადაც ურიცხვნი ვარს-
კვლავნი დასკეროდნენ მიძინებულ ქალაქს და
ცელქად მიიღო მოსწყენია მიძინებულ ქა-
ლაქისაკენ ცქერაო, ლიბანის მთებს საძილედ
ეფარებოდა და ქალაქში გაფანტულ მკრთალ
სხივებს თავისკენ იწვევდა...

— ღმერთო! — უეცრად წამოჯდა პეტრე
მოციქული და ხელების აპყრობით მისუსტებუ-
ლის ხმით წამოიძახა: — ქვეყანა ისევ ისეა, არა-
ფერი ცვლილება არ მოხდა!.. განა შესაძლე-
ბელია, ეს შენი ჯვარს აცვეს, მოჰკლეს და შენ-
კი არ გამოიხსენ, მზე, მთვარე, ვარსკვლავები
და დედამიწა ერთმანეთში არ აურიე, არ ალუ-
ფხე?! მოჰკლეს ის, ის!.. ახ!.. — შუბლი შეი-
კმუხნა, ორივე ხელის გული საფეთქლებს მაგ-
რად მიაჭირა და ისე გაშტერებით ძირს დაიწყო
ცქერა.

ლიბანის მთების მწვერვალიდან ამ დროს
მოსისინებდა და იღუმალად ეწვეთებოდა ყურს
ნიავი. მოჰკონდა ბრბოს ყიფინი, სიცილი:
„ჯვარს აცვით, თვალთმაქცია, თვალთმაქცი!..
ღმერთობას ჩემობს, მოჰკალით!.. თუ ღმერთია,
იხსნას თავი თვისი!..“

მთვარეც მიიმალა, შეისრუტა სხივები და
ქალაქი წყვდიადმა მოიცვა.

— ტყუილია, ტყუილი!.. ის ღმერთი იყო, ღმე-
რთი, ღმერთი კეშმარიტი!.. — უპასუხა ამ ბრძოს
ყიფინს და, თითქოს უნდა შეებრძოლოს ბრძოსა
და გააჩუმოსო, აღგზნებულის თვალებით ფეხზე
წამოიჭრა. — სტყუი!.. ეგ თვალთმაქცი არ არის!..

— მუშტებ-წინ-გაშვერილი ტანის რხევით ყვი-
როდა პეტრე მოციქული, მაგრამ ბრძოს ხმა,
სიცილი არა სწყდებოდა...

ქრისტე?

ქრისტეც იქა სდგას, ტანჯული, ნაგვემი,
ეკლის გვირგვინით, დალვრემილ-დაქანცული,
უიმედოდ გამომჰკვრეტი, თითქოს პეტრეს შვე-
ლას ეხვეწებაო.

— რაბბუნი!..*) — ცრემლთა ღვართქლის
გადმოხეთქით წამოიძახა პეტრე მოციქულმა
და ხელებ-გაწვდილმა მუხლი მოიდრიკა. — შენ
თვალთმაქცი არა ხარ, არა!.. მე მთელი სამი
წელიწადი შენს გვერდით ვიყავი, ყველა შენი
საიდუმლო ვიცოდი და მე სიყალბე არა შემიმ-
ჩნევია-რა!

— შუუუ... ხა, ხა, ხა, ხა!.. — მოქმუოდა

*) ებრაული სიტყვაა, მოძღვარს ნიშნავს.

ნიავი, ახმაურებდა ფოთლებს და ბრბოს სიცილს ასმენდა პეტრე მოციქულს.

— თვალთმაქცი იმის თვალთმაქცია, რომ ყველა მოატყუოს, ძალიან მახლობელიც.. — მოესმოდა პეტრეს ეს სიტყვები და ლახვარივით გულს უსერავდა.

პეტრე მოციქული სტირის, ცრემლს აფრქვევს და კი არ იცის, რა მიზეზით. ეჭვი შეეპარა და ლამის არის ეს ეჭვი რწმენად გადაეჭცეს...

— ნუ თუ ის გვატყუებდა, გვხიბლავდა თავის ქცევით და ყოველივე ტყუილი იყო? — ეკითხებოდა თავის თავს, მაგრამ პასუხს თითონვე ვერ იძლეოდა.

— ტყუილი იყო, მაშ არა?! თვალთმაქციობდა!.. — სიოს-კი გადაჭრილი პასუხი მოჰქონდა.

„ღმერთო ჩემო, ღმერთო ჩემო, რასა-თვის დამიტევე მე?!“*) — შემოესმა ქრისტეს უკანასკნელი სასოწარკვეთილებით სავსე სიტყვები.

— გეყურება, რაგვარ სასოწარკვეთილებით არის წარმოთქმული? განა ღმერთი მაგისთანა სასოწარკვეთილებას მიეცემა?! მერე, ყოვლად

*) მათეს სახ. თ. 27 მუხ. 46. ქრისტემ ქალდეურად წარმოსთქვა: „ილი, ილი, ლამა საბაქთანი!“ ამისთვის დასცინეს ებრაელთ: ილიას უძახის საშველადაო.

შემძლებელი!.. — მოესმა პეტრე მოციქულს ხმა.

— არა, არა!.. ის ღმერთია, ღმერთი კეშ-
მარტი!.. — გულის კვნესით წარმოსთქვა პეტრე
მოციქულმა და ფეხზე წამოდგა.

— შენ რაც გინდა სთქვი და ის-კი თვალთ-
მაქცი იყო. როცა ხელ-ფეხი მიულურსმეს,
მაშინ-ლა მოაგონდა ღმერთი, მანამდის-კი ყო-
ყოჩიბდა და გაიძახოდა: „მე ძე ღვთისა ვარ.“
თუ ღვთის ძე იყო, რად არის ახლა დაკრძა-
ლული საფლავში?! ღმერთს საფლავში რა უნ-
და, უგუნურო!? — ისევ ის ხმა არწმუნებდა პეტ-
რე მოციქულს.

— თვალთმაქცი ძმობას, სიყვარულს არ
იქადაგებდა...

— თვალთმაქცი ყველაფერს ჩაიდენს და
იტყვის, რომ თავისი თვალთმაქცობა გაიყვა-
ნოს! — გააწყვეტინა სიტყვა იდუმალმა ხმამ პე-
ტრე მოციქულს.

— ტყუილია, ტყუილი! ის თუ ძე ღვთი-
სა არ იყო, მაშინ ღმერთი არ არსებობს, არა
და არა!.. გაჩუმდი, გაჩუმდი, შენ ეშმაკი ხარ,
მაცდური!.. ის ღმერთი არ არის?! მე მრწამს,
ის ღმერთია, და თუ ტყუილია, მაშინ... მაშინ...
ახ... რისთვისლა ვარ ცოცხალი?! რადღა მინ-
და სიცოცხლე?! ქვეყანაზე რაღა დამრჩება?!

სასოწარკვეთილებით წამოსთქვა და თვალებზე ხელის გული მიიჭირა, რომ თვალების ტკივილით გულის წვა გაექარვებინა...

უკვე ირაფრაფა. ფრინველთ მორთეს უივილ-ხივილი და ერთმანეთს ულოცავდნენ განთიადს. ჯერ-კი გაფრენა ვერ გაებედნათ, რადგანაც გარკვევით ვერა ხედავდნენ არე-მარეს...

— ჰეტრე, ქრისტე აღსდგა!.. — მოესმა ამ დროს ნაცნობი ხმა.

— ჰეშმარიტად!.. მარიამ... შენ?!.. — დაბნევით გაიძახოდა ჰეტრე მოციქული და მარიამ მაგდალინელს მხურვალედ ჰკოცნიდა.

იმის სიხარულს საზღვარი არა ჰკონდა. მარიამ მაგდალინელის სიტყვებმა უეცრად დაუბრუნეს ის, რაც ამ რამდენიმე წამის წინ ერყეოდა. ერყეოდა-კი არა, კიდევაც შეერყა, და სიცოცხლეს ზიზღით შეხედა.

იმას დაუბრუნდა რწმენა და რწმენა ხომ ჰეტრე მოციქულისთვის სიცოცხლეს შეადგენდა. ჯვარს აცვით, გააპეთ შუაზე, ლუკმალუკმა აკუწეთ, დაჩქლითეთ! ყოველსავე ამას ღიმილით მიეგებება ეხლა. იმას სწამს, რომ არაა მოტყუცებული, რომ ის ღმერთია, ღმერთი ჰეშმარიტი!..

ამისთვის იყო, რომ მარიამ მაგდალინელს

არ მოერიდა და ისე მხურვალედ, თითქმის გა-
გიუებით, შეყვარებულივით, გულს ჩიკრა და
აღგზნებით კოცნა დაუწყო, რამაც მარიამ მაგ-
დალინელი განცვიფრებაში მოიყვანა.

— პეტრე! — ძლივს-ლა მოახერხა მაგდალი-
ნელმა ხმის ამოლება და ხელიდან გაუსხლტა.

— ჰა!.. მარიამ?!

— განა იცოდი ქრისტეს აღდგომა, რომ
„ჭეშმარიტად“ მიპასუხე? — უკან ხევით დაეკითხა
მარიამ მაგდალინელი, რომ პეტრე მოციქული
გონს მოეყვანა.

— არა! მაგრამ ის ხომ ღმერთია, ღმერ-
თი ჭეშმარიტი და უეჭველად უნდა აღმდგა-
რიყო! — უპასუხა პეტრე მოციქულმა და ქრის-
ტეს საფლავისკენ გაეშურა, რომ დათრგუნვილი
საფლავის გვერდით თაყვანი ეცა მაცხოვ-
რისთვის.



„ქარი-კი ამ დროს შუოდა, კვინესოდა და გმი-
ნავდა.“

(ფსიხოლოგიური ეტიუდი)

„ზუუ!“ კვნესით შემოპარებულნა შემოდგო-
მის ცივმა და სასტიკმა ქარმა და თან კარებსა
და სარკმლის ჩარჩოებს რაკრაკი დააწყებინა,
თითქოს შინ შეშვებას ეხვეწებაო. მაგრამ ტი-
ტიკოს ქარის კვნესა და გმინვა არ ესმოდა. ის
ტახტის გვერდით ცალ-მუხლზე დაჩიქილი
და მკლავ-გადახვეული გაშტერებით დასცერო-
და ბათოს მიმქრალ, უსიცოცხლო სახეს.

არა სტირის ტიტიკო, ცრემლს არ აფრ-
ჭვევს ტიტიკო, თუმცა, აგერ, იმისი საყვარელი
ბათო სულ ერთი ჟამი არ იქნება, რაც ამ წუ-
თი-სოფელს გამოესალმა. კარგად იცის ტიტი-
კომ, რომ ხვალ თუ არა, ზეგ მაინც იმის გა-
მაცოცხლებელის, სულის ჩამდგმელის გვამს მი-
წას მიაპარებენ, სამუდამოდ განაშორებენ, გა-
აცალკევებენ, რის გამოც ისევ-ისე მარტოდ,
უთვისტომოდ, როგორც წინად, ვიდრემდის ბა-
თოს შეხვდებოდა, დარჩება...

მაგრამ, არა... ტიტიკო მარტოდ არ დარ-

ჩება. მართალია, ხვალ თუ ზეგ ბათოს გვამს მიწას მიაბარებენ, მაგრამ ბათო მაინც მასთან იქნება. ტიტიკო და ბათო ისე შეხორც-ძვალებულები არიან, ისე გაერთსულებულები, რომ სიკვდილი ვერ გააშორებს იმათ. სიყვარულმა ისე დააკავშირა ტიტიკო ბათოსთან, რომ ყველგან და ყოველთვის ის ბათოსთან იქმნება და ბათო მასთან.

კარგად გრძნობს ამას ტიტიკო და ამისათვის არც სტირის. კმარა, რაც იტირა, რაც ცრემლები აფრქვია ტიტიკო!.. ბათოს ერთი კვირის ავადმყოფობამ სულ ჩაარჩია ტიტიკო. ბათო ფილტვის ანთებით იყო ავად. მეტად იტანჯებოდა ბათო. იმასთან ერთად არა ნაკლებ ტიტიკოც იტანჯებოდა. ბათოს ყოველი კვნესა, გაძნელებული სუნთქვა ტიტიკოს ლახვარივით გულს ესობოდა და უწყალოდ სერავდა.

როდესაც ბათომ სული განუტევა და მოისვენა, ტიტიკოც დამშვიდდა და ხმა გაკმენდილი, ჩაფიქრებული დასკეროდა ბათოს გაფითრებულს სახეს.

უცქეროდა ტიტიკო ბათოს სახეს და მთელი წარსული ცხოვრება უნებურად თვალ-წინ ეხატებოდა.

ოხ, რა ბედნიერი იყო ის ამ ორ წელი-

წადს!.. უკანასკნელმა ორმა წელიწადმა სულ ერთიანად მიავიწყა ყოველივე წარსული, გამოაცოცხლა, პირი სააქაოსკენ აქნევინა! რა იყო წინად, ვიდრემდის ბათოს შეირთავდა, და მერე რანაირად შეიცვალა იმისი ცხოვრება, როდესაც ბათო შეირთო ცოლად?!

წარსულმა თავი შეაძულა, ცხოვრება ტანჯვად მიაჩნევინა, ყველანი მტანჯველებად, ჯალათებად. მართლადაც, მთელი წარსული ტანჯვის მორევს წარმოადგენდა, რომელშიაც იმის სანუგეშოდ ჩაღაც-კი არ დასცურავდა, რომელზედაც შეეძლო ხელი მიეშვირა და ეთქვა, რომ ცხოვრება ისე მწარე, გესლით სავსე არ ყოფილა, როგორიც ეგონა, როგორიც დასახული ჰქონდა.

სიყრმიდან არც ერთხელ არა სმენია გულის გამალხობელი, გამათბობელი სიტყვა და სხვა ამის გარდა რა სიკეთე დაეყრებოდა. მუდამ სხვის ხელში იყო და სხვის ტევას და ბლვერას იტანდა. რის ვაითა და ვაგლახით განთავისუფლდა და შევიდა ერთი დაწესებულების კანცელარიაში მწერლად. ეხლა-კი გავთავისუფლდი და მოვრჩი სხვის ხელში შეცეკრასაო. მაგრამ გაუმტყუნდა იმედი. იქაც ისევ ის ბლვერა, შტერა და... და ამხანაგების დაცინვა...

ვერც ამის შემდეგ ჰქოვა ის, რის პოვნასაც
მოელოდა, ვერც ეხლა გაიგონა გულის გამალ-
ხობელი სიტყვა.

მიღიოდა ყოველ დღე კანცელარიაში,
სადაც თავ-აულებლივ სწერდა, სწერდა და სწე-
რდა. ყოველ ოც რიცხვებში იღებდა ოცდა-
სუთ მანეთს და ამით იხატებოდა იმისი ცხოვ-
რება. კანცელარიაში დაცინვა, კილვა და შტე-
რა, შინ კიდევ მარტოობა ახრჩობდა. ყოველი-
ვე ეს ჯოჯოხეთს შეადგენდა ტიტიკოსთვის.
რისთვის იტანდა ამოდენა სიდუხჭირეს? ნუთუ
იმისთვის, რომ ლუკმა პური მოეპოვა და ეც-
ხოვრნა, ეცოცხლნა, რომ ერთს წუთს, ერთს
წამსაც იმის გულს სიხარულის სვეტი არ ჩაშ-
ვებოდა?! ოს, რა შეცდომა?!

ქვეყანაზე არც ერთი არსება არ გამოჩნ-
და, რომელსაც ამისთვის გულმტკივნეულობა
გამოეჩინა.

დაღიოდა ასე, გულ-ჩათხრობილი, გან-
ზედ. ისე უნუგეშოდ ჰქენჯნიდა მარტო-
ობა, რომ თავის მოკვლაც განიზრახა და
აღსრულებაში მოსაყვანად შინიდან მტკვრისა-
კენ გაემგზავრა. სწორედ ამ დროს მეზობ-
ლის მოსამსახურე ქალი დაუხვდა წინ და ისე
თანაგრძნობით შეხედა, რომ ტიტიკოს ენა

ჩაუვარდა, შესდგა და ადგილიდან ვეღარ
იძროდა.

ქალმა ჩაიარა. იმას კიდევაც მოესაქმა და
უკანვე მოდიოდა, რომ ტიტიკო ისევ ისე გაშ-
ტერებული იქვე იდგა.

— ბათო! — წამოიძახა ტიტიკომ, როდესაც
ქალი დაუახლოვდა და ორივე ხელი გაუწოდა.

— ტიტიკო, რა დაგმართნია?! — ალერსით
დაეკითხა ბათო და ტიტიკოს გაწვდილ ხელებ-
ში თავისი ხელი მოათავსა.

ტიტიკომ ფიცხლავ გულ-მხურვალედ ჩა-
მოართვა ხელი და მაგრა მოუჭირა.

— რად გედო, ტიტიკო, ისეთი მკვდრის
ფერი, რა მოგივიდა?! — უფრო ალერსით გაუ-
მეორა ბათომ კითხვა და ხელის განთავისუფ-
ლება მოინდომა.

— ბათო, ნუ მაშვებინებ ხელს, ნუ!..
თვით განგებამ მოგავლინა ჩემ გამოსახსნე-
ლად!.. — ისეთის ხმით შეევედრა ტიტიკო, რომ
ბათოს გული აუჩუყდა და სიბრალული აღეძრა.

ბათო ხელს ალარ ათავისუფლებდა, ტი-
ტიკო-კი უწყალოდ სრესდა იმის ხელს და
ტოკავდა იმის ნიშნად, თითქოს უნდოდა რი-
ლასიც თქმა და კი ვერ ბედავდა...

— ბათო, — დაიწყო იმან აკანკალებულის

ხმით და ჭარხალივით წამოწითლდა: — შენ... ჰო, შენ ხომ, ვიცი, გასათხოვარი ხარ და მაშ ნუ გამაწილებ, გამომყევ ცოლად!...

ბათომ ჩაღუნა თავი და ისე კარგა ხანს გაჩუმებული იდგა. ტიტიკო-კი კანკალმა აიტანა, და ჭირის ოფლს ასხამდა. „ამისთანა მშვენიერი ანგელოზი რად დამთანხმდება მუ უმსგავსს... ან რა ნება მქონდა, რომ ვუთხარი!“ ფიქრობდა ამ დროს ტიტიკო და სახე ეღმია ჭებოდა.

— კარგი!.. — წაიჩურჩულა ბათომ და ქუთუთოები მაღლა ასწია, რომლის ქვეშიდანაც შავი მორევივით თვალის კაკლები გამოჩნდა, და შიგ მარტო სიბრალული და ალერსი იხატებოდა.

— კარგი?! კარგი?! ბათო, მაშ კარგი?! ჩემო ბათო!.. — სიხარულისაგან დარეტიანებული ტიტიკო უგონოდ ისროდა სიტყვებს და ხელებს უსრესდა.

— კარგი, ჩემო ტიტიკო, დამიგვიანდება! — დაამშვიდა ბათომ და შინისაკენ გასწია.

ისე ცხადად წარმოუდგა თვალწინ ეს სურათი, რომ ეგონა, ეხლა, ამ წამს ხდება ყოველივეო. იმან მაგრად მოჰევია ხელები უსულო გვამს და გულში ჩაიკრა, მაგრამ სამაგიერო ვერ მიიღო.

ქარი-კი ამ დროს ზუოდა, კვნესოდა და გმინავდა. ლამპარიც ლიფლიფებდა და მკრთა-ლად არხევდა ბათოს მიმქრალს სახეს...

ორ კვირას არ გაუვლია ამ შემთხვევის შემდეგ, რომ ტიტიკომ და ბათომ ჯვარი დაიწერეს და ქალაქის განაპირის ერთი ოთახი იქი-რავეს. იქ იწყეს ცხოვრება განდეგილებივით განმარტოვებით. ტკბილად, შეუშფოთებლად. ეს ოთახი იყო მოწამე იმათის ბედნიერებისა, მათის სიყვარულით ცხოვრებისა ამ ორი წლის განმავ-ლობაში.

გადახალისებულ ტიტიკოს არად მიაჩნდა ეხლა ამხანაგების დიცინვა, შორიდან სამსახურ-ში სიარული. სიხარულით, სიმღერით და სტვე-ნით მიღიოდა და მოღიოდა სამსახურში. იქაც ხალისით სწერდა, სწერდა და სწერდა. სახლში რომ მოვიდოდა, მაშინ ხომ, ნამეტნავად, რო-დესაც ბათო კარებში მიეგებებოდა და ეტყო-და: გენაცვა, პური ხომ არ მოგშივდაო, აღარ იცოდა, მეშვიდე ცაში იყო თუ დედა-მიწაზე, ცხადლივ იყო ყოველივე ეს თუ სი-ზმარში.

ტიტიკომ სალამოობითაც იკისრა სამსახურ-ში სიარული და მუშაობა, რისთვისაც ჯამაგი-რის გარდა კიდევ ერთ თუმანს იღებდა. ეხლა

უფრო დიდი ჯაფის ატანა მოუნდა, მაგრამ ტი-ტიკოს ეს გარემოება არად მიაჩნდა. გრძნობდა, რომ იმისი შრომა უმიზნო არ იყო: შრომობდა ბათოს გულისთვის და ბათოს გულისთვის ხომ ლუკმა-ლუკმად რომ აეკუწიათ, მაშინაც ნეტა-რებას იგრძნობდა.

ამ, რა ბედნიერი იყო ტიტიკო ამ ორი წლის განმავლობაში და ეხლა-კი რა მოუვიდა!.. შეუბრალებელმა სიკვდილმა სიცოცხლით სავსე ბათო უძრავ გვამად გარდააქცია და გვერდით, მუხლმოდრეკით ტიტიკო მოუსვა... მაგრამ ტი-ტიკო მაინც სასოწარკვეთილებას არ ეძლეოდა. ის ფიქრობდა: „მარტოკა არ დავრჩები. ბათოს სახელის თაყვანისცემით ავავსებ ჩემს ცხოვრებას. იმას ვიღოცავ, ვიდრემდის მეც არ გავემ-გზავრები იმისკენ...“

„ზუუუ!..“ ქარი-კი ზუოდა ამ დროს და უნდოდა ტიტიკოს ყურადღება მიექცია, მაგრამ ტიტიკო ყურს არ უგდებდა.

ამ დროს მოისმა კარის კაკუნიც. ვინ იქნებოდა?! ვინ მოვიდოდა ტიტიკოსთან ეხლა, ღამის მეცხრე ჟამს?! ტიტიკოსთან არავინ არ დადიოდა და არც ტიტიკო მიდიოდა ვისთანმე. მარტო ორნი ისე ბედნიერები იყვნენ, რომ სხვისა მოსვლა არ ესაჭიროვებოდათ, სხვები იმათ

ტკბილ ცხოვრებას თუ არას დააკლებდნენ და დროებით მაინც არ შესწყვეტდნენ, არას მოუ-
მატებდნენ. ამისთვის ისინი არავისთან მიღიო-
დნენ და არც არავის თავისთან ეპატიუებოდნენ.
ბათო ერთ კვირას სულს ებრძოდა. მაშინ არა-
ვის გაუვლია და ეხლა ვინ მოვიდოდა...

უფრო ძლიერად მოისმა კარის კაუნი,
რამაც ტიტიკო ფიქრისაგან გამოიყვანა. იმან
შუბლზე ხელი გადაისვა და კარებისაკენ გასწია.

— ვინ უნდა იყოს?!.. სამსახურში თუ
მიწვევენ?!.. — წაიბუტბუტა და კარი გააღო.

დიდი ხნის ხვეწნისი და ვედრების შემდეგ
ძლივს ეღირსა ქარს შინ შემოსვლა. სიხარუ-
ლით შემოითამაშა. საჩქაროდ ოთხსავ კუთხეს
შემოურბინა, ბათოს ჩაეხუტა და შემდეგ ლამ-
პარს შეებრძოლა, რომლის ალიც შეათამაშა,
ააწოწოლავა და უეცრად ზევიდან დაქროლვით
ბოლო მოუღო.

— ბათო მაყარაძისა აქა სცხოვრობს?!—
დაეკითხა ვიღაც უცნობი ტიტიკოს.

— აქა სცხოვრობს. ვინა ხარ?..

— აი, წერილი გახლავთ იმასთან. — უპა-
სუხა უცნობმა და წერილი გადასცა.

„უთუოდ ამხანაგმა მოსწერა,“ გაიფიქრა
ტიტიკომ და ლამპარი აანთო.. ბევრჯელ მოსვ-

ლია წერილი ბათოს ამ ამხანაგისაგან და ტიკოსთვისაც უამბნია შინაარსი, თუმცა თოთონ არც ერთხელ არ წაუკითხნია იმისი წერილი და არც ერთხელ არ მოსულა იმათან, რომ გაეცნო. ან-კი რა საჭირო იყო ტიტიკოსაც გადაეკითხა წერილი, როდესაც ბათო უამბობდა ხოლმე შინაარსს. იმას კიდევაც უხაროდა, რომ ბათო თითონ უამბობდა შინაარსს და ტიტიკოს წასაკითხად არ აძლევდა. წაკითხეას ბათოს ღუღუნი, ტკბილი ღუღუნი არ ერჩია?! მერე, რა ტკბილად უამბობდა ხოლმე! ის ბათოს გაღვივებულ ტუჩებს ჩაუკოცნიდა ხოლმე, როდესაც-კი გაათავებდა წერილის შინაარსის გადაცემას, რომ უფრო ტკბილად ეამბნა შემდეგში.

— გენაცვალე, ბათო, წერილია შენთან და... — მუხლო-მოდრეკით ჩალუღლლულა ტიტიკომ და წერილი სახესთან ახლო მიუტანა.

ბათოს სახეს დააცქერდა, თითქოს უნდოდა ამოეკითხნა, თუ რა უყოს წერილს, მაგრამ ბათოს სახე არას ეუბნებოდა, გაფითრებული, თვალებ-მილულული ლამპრის მოციმციმე შუქზე ოდნავ ირხეოდა და სააქაოსი აღარა ეყურებოდა-რა.

— გენაცვა, ბათო, დაროს წერილია და

რატომ... რატომ... წინად ხომ სიხარულით
იღებდი ხოლმე და მიამბობდი შინაარსს?! ეხლა
რატომ... ოხ!..

ტიტიკომ თავი დახარა და თვალ-ყური
გადაუკოცნა, მაგრამ ბათოს სააქაოსი აღარა
ეყურებოდა-რა...

— ეხლა მე წაგიკითხავ, მე გიამბობ შინა-
არსს დაროს წერილისას!... შენი საყვარელი
დაროს წერილია უთუოდ.—ჩაელაპარაკა ტიტი-
კო და წერილი განსნა.

„ჩემო ბათო!“

— ჩემო ბათოვო, გწერს, გენაცვა, ყუ-
რი დაუგდე!... —ჩასძახა უსიცოცხლო ბათოს
და წერილის კითხვა ისევ ხმა-მაღლა დაიწყო:

„მინდა ყოველ დღე შენს გვერდით ვიყო,
ყოველ წამს შენ გეხვევოდე და შენს მკერდზე
ამომდიოდეს სული და შენ-კი კვირაში ორი
დღე დამინიშნე და ამ ორ დღესაც აღარ მოს-
დიხარ“...

— რაო?!.—ქვანაკრავივით შესწყვიტა წე-
რილის კითხვა და ბათოს გადახედა, რომლი-
სათვისაც სააქაო აღარას შეადგენდა. იმას არ
ეყურებოდა და სააქაოსი არა ესმოდა-რა.—ბა-
თო, ვინა გწერს?!—ჩაეკითხა და წერილის ბო-
ლოს დახედა, საღაც „შენი ვახტანგი“ ამოიკი-

თხა.—არა, არა!.. ტყუილია, ტყუილი!—წა.
მოიყრანტალა და კანკალით წერილის კითხვა
დაიწყო:


„ხომ იცი, ჩემო კარგო, ამ თვის გა-
სულს სოფელში წავალ, სადაც ორი თვე მეტი
მომიგვიანდება და მაშინ მარტო შენი წერილე-
ბით-ლა უნდა დავსტკბე. არა, ჩემო ბათო, სა-
ნამ აქა ვარ, დამატკბე შენის ალერსით. წარ-
სულ კვირას რა კარგი დრო გავატარეთ, ხომ
გახსოვს?!.“

„მართლა, ჩემო გვრიტო, ხომ არ გაციუ-
დი? საშინელი ქარიშხალი იყო, ოცცა შინ
დაბრუნდი და იქნება ავად გახდი და ამის ში-
ზეზით დანიშნულ დროს ვეღარ მოხვედი! ღმერ-
თმა ნუ ქნას!.. მინდოდა, დღეს მევე წამოვსუ-
ლვიყავ შენთან და შემეტყო შენი გარემოება,
მაგრამ ვეღარ გავბედე. იქნება შენი ქმარი შინ
იყოს-მეთქი, ვითიქრე და ამის მიზეზით ისევ
წერილის მოწერა ვარჩიე. როგორც შენ მით-
ხარ, წერილებს შენი ქმარი არ კითხულობს და
ამ წერილის მიღების დროს, რომ შინ იყვე
შენი ქმარი, მგონი, არა დაშავდება-რა...“

„ხვალ უსათუოდ მოგელი...“

„მარად შენი ვახტანგი.“

— ააახ!..—ფეხზე წამოვარდნით წამოიძახა




საშინელის ხმით ტიტიკომ, როდესაც წერილის
კითხვა გაათავა და გულზე ხელი იტაცა.

კანკალმა და თახთახმა აიტანა. თითები
უნებურად ეკვლანჭებოდა, და ტანისამოსს იგ-
ლეჯდა...

— ააახ!... — უფრო საზარლად წამოიძახა და
და ორივე ხელი თმაში წაივლო, თითქოს უნ-
დოდა შეეყენებინა თავის არევა, მაგრამ ვერ
შესძლო. იმას თავში ტვინი გველივით გაეხ-
ლაკნა, გაუჩუჩუნდა და უეცრად თვალთ დაუბ-
ნელდა, მაგრამ დიდხანს არ გაგრძელებულა ტი-
ტიკოს ამგვარი მდგომარეობა.

დაჭიმული ძარღვები მოუდუნდა, მოელე-
შა. ლრმად, ძალიან ლრმად ჩაისუნთქა-ამოისუნ-
თქა და ჩულივით იქვე ტახტის გვერდით ჩაეხ-
ვია. თითქოს ამოსუნთქვას ამოაყოლაო ყოვე-
ლივე ის, რაც-კი წმიდათა-წმიდას შეადგენდა,
რაც რწმენა ჰქონდა და სააქაოსთან აკავშირებ-
და. ეხლა მხოლოდ სიფულუროვეს, სიცარიე-
ლეს-ლა გრძნობდა. აღარც თავში და აღარც
გულში აღარა დარჩენია-რა, და სააქაოსი, რო-
გორც ბათოს, აღარა ეყურებოდა-რა, თუმცა-კი
ქირი ამ დროს ზუოდა, კვნესოდა და გმი-
ნავდა...



„ლმერთო, რა დაგიშავე!?”

(ეტიუდი)

„...ლმერთო, იესო ტკბილო, შემინდე და
 შემიწყალე!..“ — ჯვარცმულის ხატის წინ მუხლ-
 მოდრეკილი და ხელებ-აღპყრობილი ლოცუ-
 ლობდა წვერ-ულვაშ ახლად ამოფეთქილი მწი-
 რი, რომელიც აგერ ერთი კვირაა, რაც საბე-
 როს გამოეთხოვა და შიო მღვიმელის ერთ მიუ-
 ვალ კლდის ტახტივით გადმოკიდებულ პატარა
 კალთაზე დაესახლა. დღე — მზის ამოსვლიდან
 ჩასვლამდის — განუწყვეტლივ მუშაობდა, ჰქვაბა-
 მდა კლდეს და თავშესაფარს იკეთებდა. მარტო
 სადილობისას და სამხრობისას შესწყვეტდა ხო-
 ლმე მუშაობას და ტყეში მიღიოდა საზრდოსა-
 თვის. ლამე-კი, როდესაც შესწყდებოდა ფრინ-
 ველთ ურიამული და ბუნება მიიძინებდა, ლოცუ-
 ლობდა, მკერდს იბეგვდა, წვერსა და თმას იგ-
 ლეჯდა, მაგრამ გონება ვერ დაემორჩილებინა
 და ლოცვის შინაარსით ვერ გაემსჭვალა. მარ-
 ტო ენა ირხეოდა და სიტყვებს გამოსთქვამდა,
 გონება-კი მონაწილეობას არ იღებდა და ხან



წარსულს, ხან აწმყოს და მომავალს, ხან მთასა და ველს ეკონებოდა. მწირს სურდა, რომ მთელი იმისი არსება მოცულიყო ლოცვის შინაარსით; უნდოდა — გონება შეებოჭნა და უფლისადმი მიემართნა, მაგრამ ამაოდ, გონება არ ემორჩილებოდა. ეს იყო მიზეზი, რომ ამ ერთი კვირის წინად დაღონებული მივიდა წინამძღვართან და ფეხებ ქვეშ ჩაუვარდა.

— წმიდაო მამაო! — ტირილით შესძახა და თავი მაღლა ველარ აიღო, თითქოს შეხედვისა ეშინიან ან რცხვენიანო.

— უფალი იყოს შენი მანუგეშებელი, შვილო!.. რა მოგივიდა? — მამობრივის თანაგრძნობითა და სიყვარულით დაეკითხა წინამძღვარი და თავი მაღლა ააღებინა.

წინამძღვრის ამგვარმა კილომ შიში და კრძალვა დაუკარგა მწირს. ლმობიერად შეხედა წინამძღვარს და გულახლით უამბო ყოველივე.

— ილოცე ჩემთვის, წმიდაო მამაო, — დააბოლოვა მწირმა: — რათა შემინდოს მე ცოდვილისა და შიხსნას ამ განსაცდელისაგან. განვიზრახე განდეგილობა და მოვედ შენთან ლოცვაკურთხევის მისაღებად. ეგებ განმარტოვებულმა ცხოვრებამ დამიბრუნოს სულ შევძლო ლოცვა გულმოდგინებით.

წინამძღვარი გაჩუმებული ყურს უგდებდა
და სახე თანდათან ეჭმუხნებოდა. იმსკვალებო-
და მწირის მწუხარებითა და უსიტყვოდ ავედრე-
ბდა მწირს უფალსა.

— მამაო, ნუ დამიჭერ შენს ლოცვა-კურ-
ოხევას და ნუ მეტყვი უარს?! არ ძალ-მისს წმი-
და ადგილსა ამას დაყოვნება.—ტირილით მიმარ-
თა მწირმა, რაკი დუმილმა დიდხანს გასტანა,
და მუხლებზე მოეხვია.

— სიკვდილის დამთრგუნველო იესო, შენ
მიეც ძალი ყრმასა ამასა, რათა სძლიოს უჩინა-
რი მტერი და აღიდოს სახელი შენი! — აღფრთო-
ვანებულის ლალადებით წარმოსთქვა წინამძღვარ-
მა და ორივე ხელი დაადო მწირს თავზედა.

მწირი განუსაზღვრელმა სიხარულმა შეიპ-
ყრო. აქამდე თუ სულის კვეთების ცრემლი ახ-
რჩობდა და სულს უხუთავდა, ახლა სიხარულის
ცრემლმა გადმოხეთქა. გიჟივით ჯმუჯნიდა წი-
ნამძღვრის მუხლებს და უზომოდ ჰკოცნიდა.

— კმარა, შვილო, აღსდეგ! — წინამძღვარ-
მა წამოაყენა მწირი და გადაჰკოცნა.

სამი დღე ლოცვა-ვედრებაში გაატარეს წი-
ნამძღვარმა და მწირმა. მწირი წმიდა საიდუმლოს
მისალებად ემზადებოდა.

მეოთხე დღეს მწირმა მიიღო წმიდა საი-

დუმლო. ძმათაც შეიტყეს მწირის განზრახვა და წირვის შემდეგ მუხლ-მოდრეკილნი ავედრებდნენ მცირე ძმას. ლოცვის შემდეგ ყველანი გულ-ხელ დაკრეფილნი და თავ-ჩალუნულნი იდგნენ საზოგადო ტრაპეზის გარშემო და ელოდნენ სუფრის კურთხევას.

წინამძღვარმა აკურთხა სუფრა და პური გადატეხა. ყველანი მოწიწებით შეუდგნენ პურის ჭამას.

სჭამდნენ გაჩუმებულნი, თავ-ჩალუნულნი და მარტო დრო-გამოშვებით რომელიმე ძმა ლრმად ამოიოხებდა და წამს ჭამას შესწყვეტდა.

— ძმანო, — კარგა ხნის ჩუმად პურის ჭამის შემდეგ მიმართა წინამძღვარმა ძმათა და ლვინით სავსე თიხის ფიალა ხელში აიღო.

ძმათ-კი ამ ხმის გაგონებაზე შესწყვიტეს პურის ჭამა და გულზე ხელებ-დაკრეფით თავები ჩალუნეს.

— ძმანო, — განიმეორა კიდევ წინამძღვარმა და თვალი გადაავლო ტრაპეზის გარს მსხდომთა: — დღეს გვტოვებს ჩვენი უმცროსი ძმა სერაფიონი, ჩვენი საყვარელი სერაფიონი. ყველას გახსოვთ, როგორ მოიყვანეს სულ ბავშვი — ცხრა წლის ყრმა მშობლებმა და დაგვიტოვეს აქ უდაბნოში. მას შემდეგ თერთმეტმა წელიწა-

დმა განვლო და ამ ხნის განმავლობაში შვილსა.
 ვით ვზრდიდით. ყველა ჩვენგანი შვილსავით
 უყურებდა და შევიყვარეთ კიდეცა მამობრივის
 სიყვარულითა. ვფიქრობდით, ჩვენი აღზრდილი
 ჩვენთანვე დარჩებაო, მაგრამ განგებამ სხვაფრივ
 ინება. სერაფიონმა ამოირჩია მეტად ძნელი და
 ეკლიანი გზა... — წინამძღვარმა ცოტა ხან
 შესწყვიტა სიტყვა და სერაფიონ მწირს შე-
 ხედა. სერაფიონი გულ-ხელ-დაკრეფილი იდ-
 გა და ისე ისმენდა წინამძღვრის სიტყვას.
 — შვილო, ვშიშობ მტერმა არ გძლიოს და
 ამის გამო მენანები. ჯერ უსუსური ხარ და
 მეტად ძნელი გზა-კი ამოირჩიე... ვაი თუ... —
 ვეღარ შესძლო ლაპარაკი წინამძღვარმა, რად-
 განაც ტირილი ყელში მოებჯინა და სუნთქვა
 გაუძნელდა. ფიალა დასდგა. სერაფიონი მწირი
 გულში ჩაიკრა და ქვითინის შემდეგ განაგრძო:

— უფალმა გაგაძლიეროს და გაგამხნევოს..
 ნეტარება შენ, შვილო, თუ გზამ არ შეგაშინა
 და ძლევა-მოსილი გამოხვედ... რაც ეკლიანია
 გზა, მით ნაყოფი უტკბესია, მით უფრო დიდი
 ნეტარება მოგელის...

სადილს შემდეგ შიო მღვიმელის ხატის წინ
 პარაკლისი გადუხადეს, შეავედრეს უფალს და
 გზა დაულოცეს.

„...ცხოვრების მომნიჭებელო იქსო!..“
ხშირად წარმოუთქვამს ეს სიტყვები სერაფიონს
გას შემდეგ, რაც განმარტოვებული ცხოვრება
დაიწყო და ეხლაც ხშირად ამბობს ამასვე ღა-
ლადებით, მაგრამ იმისი გონება მაინც „ცხოვ-
რების მომნიჭებელს“ არ უერთდებოდა.

გონება თითქოს დასცინოდა სერაფიონ
მწირის სურვილს. უეცრად დაუბრუნდებოდა
მის სხეულს, აგრძნობინებდა, რომ კერპივით
უგრძნობლადა სდგეხარ და უაზროდ გაიძახი
სიტყვებსაო, დალრეჯავდა, მოკუმშავდა და ისევ
სწრაფად მიატოვებდა. აგერ, ეხლაც ხელები გა-
აწოდებინა ჯვარცმულის ხატისადმი, თვალები
ზეცად მიამართვინა, დააწყებინა თქმა ლოცვი-
სა და... განჰქრა, წავიდა, სულ სხვა სახე
მიიღო...

სერაფიონ მწირი შუაზედ გაიყო, ორ არ-
სებად გადაიქცა. ერთი სდგას მუხლ-მოდრეკი-
ლი ჯვარცმულის წინაშე, ხელებ-გაპყრობილი,
სახე-დალმექილი და ამბობს უაზროდ ლოცვას,
ბუტბუტებს გონება-დაუტანებლად, ხოლო მეო-
რემ შვიდი-რვა წლის ყმაწვილის სახე მიიღო
და თავის ტოლ-ამხანაგებში დარბის, დახტის
და თამაშობს. გრძნობს, რომ ბედნიერია...

კმაყოფილი, ოფლში გაქანებული შინ

დაბრუნდა და დედას ეტიტინება, უამბობს, ვის
თან და როგორ თამაშობდა.

— შვილო, — ალექსიანად სტუქსავს დე-
და: — შორს ნურსად მიხვალ, თორემ ოსები
თავს დაგესხმიან და დაგატყვევებენ...

— როგორ დამატყვევებენ, დედი, ხანჭა-
ლი აქ არა მაქვს?! ისე დავიფრენ, ისე რომ... —
გულ-დაჯერებით წამოიძახა და ხანჭალს გაი-
ლო ხელი.

— შენ-კი გენაცვალოს დედა, შვილო!... —
სიხარულით ჩაიკრა გულში და დაუმატა:
— ჯერ პატარა ხარ, შვილო!.. ვერას გა-
დები!...

— დიალ, პატარა... თუ-კი მამა-ჩემი და
სოლო ომში არიან, მე რაღა-ვარ...

— ეჭ! — ამოოხვრით გააწყვეტინა სიტყუ-
დედამ და სახე მოეღრუბლა.

— რა იყო, დედი, რად ამოიოხრე?! —
მშობლის ამოოხვრამ საჩქაროდ შეუცვალა სა-
ხის მეტყველება პატარა სერაფიონს.

— არაფრად, შვილო, ისე! — ნაღვლიანად
უპასუხა და უფრო ძლიერ მიიკრა გულში სე-
რაფიონი...

მთელი სოფელი გაიხვეტა იქითქენ, საიდანაც
სიმღერის ხმა მოისმის. დედა შვილიც საჩქაროდ

გაქანდა იქით. ყველანი სიხარულით გაიძანან: გაუმარჯვნიათო, და ფეხს უფრო უჩქარებენ. აგერ კიდევაც შეხვდნენ გამარჯვებულ მეომართ და შეიქნა ხვევნა-კოცნა და ლვოისადმი მაღლობის შეწირვა...

შვილი დედითურთ ეხვევა მამას და ქმას. მამამ ხელში აიყვანა და გულში ჩაიკრა. სოლო-კი ამ დროს აქეთ-იქით იყურება და ვიღა-საც დაეძებს. დედის ლაპარაკს ყურს არ უგდებს.

— სოლო, ბევრი მტერი მოჰკალი?! — დაეკითხა სერაფიონი თავის ქმა სოლოს, რომელიც თვალებს აცეცებდა აქა-იქ, მაგრამ სოლოს იმისი ხმა არ გაუგონია. — ვის ეძებ? — ჰკითხა ქვლავ სერაფიონმა და დაუწყო წევა ჩოხის კალთას.

— რა გინდა?.. — ჰკითხა სოლომ ქმის ისე, რომ არც მოუხედნია მისკენ და მსწრაფლ გაეჭანა იმისკენ, ვისაც დაეძებდა. მეზობლის ახლად გაფურჩქვნილი ქალი თამო მოეგება წინ და ათრთოლებული ჩაეკრა სოლოს...

ორად გაყოფილი ისევ ერთ არსებად გარდაიქცა. სერაფიონ მწირს თვალ-წინ წარმოუდგა ზემოხსენებული სურათი და შეიპყრო მთელი იმისი არსება. თუ აქნობამდე ლოცვის სიტყვებს მაინც ამბობდა, ახლა ამასაც ვეღარ ასერ-

ხებდა და იმ სურათს-ლა ხედავდა. ახლა ცნა-
დად უყურებს თამოს, მშვენიერ თამოს,
სოლოს მკერდზე მისვენებულს, რომელიც მე-
ტის-მეტი სიამოვნებით ოდნავ-ლა სუნთქავს.
ამ სურათის მხილველს სერაფიონს გული აუ-
ტოკდა, სახსრებში მოდუნდა და თახთახმა ა-
ტანა...

მაშინ, როდესაც მოხდა ეს ამბავი, ვერ
გაიგო მისი მნიშვნელობა, ვერ მიხვდა, ისე
დაბნევით რად მიეგება სოლო დედას და მას,
თავის უმცროს ძმასა, და თამოს-კი, რომე-
ლიც არც და იყო და არც ნათესავი, ისე გა-
ტაცებით რად გადაეხვია. მაშინ ვურ მიხვდა და
ახლა-კი გაიგო ამისი მიზეზი და ამ მიხვედრამ
სერაფიონი მწირი ჩაფუფქა, გული აუჩუყა და
აგრძნობინა, რა იყო მიზეზი, რომ გულმოღ-
გინედ ლოცვას ვეღარ ახერხებდა. მიხვდა ახ-
ლა, რომ იმისი ბუნება სხვას თხოულობდა და
ის-კი, წინააღმდეგ ამისა, ძალას ატანდა თავის
თავს და ტყუილ-უბრალოდ სახეს ჭმახავდა...
იგრძნო სულის ობლობა, განდეგილობა. იგრ-
ძნო, რომ იმის გულს არ ათბობს და არც რო-
დის გაუთბის იმ ზენაარ გრძნობას, რომელიც
ტანჯვით და ვაებით მოცულ წუთიერ ცხოვრე-
ბას ნეტარებად ხდის, აყვარებს თვით ამ წუთიერ

ცხოვრების შხამსაც-კი და აფრთოვანებს საკეთილოდ. გრძნობს სერაფიონ მწირი, რაც აკლია მის გულს, გრძნობს ისეთი ძლიერებით, რომ ცეცხლი ეკიდება, ხორცი სტკივა და იწვის...

აქნობამდის თუ ეგონა, ცოდვილი ვარო და შეღალადებდა უფალს: შემინდე და შემიწყალე მე ცოდვილიო, ახლა ტანჯულად, წამებულად მიაჩნია თავისი თავი...

— ლმერთო, რა დაგიშავე?! — საყვედურით მიმართა მან უფალს და პირქვე დამხობილმა დაიწყო ქვითინი.

მთვარემ ამ დროს ლიმილით გადმოხედა უკანასკნელად მომტირალ მწირს და შორს, ცის კიდესთან ამართული მთის იქით, ნაზად ჩაესვენა. აქნობამდის გაცრიაკებულმა ვარსკვლავებმა კაშკაში დაიწყეს და ერთმანეთს გამოელაპარაკნენ. მოღუდუნე მტკვრის პირიდან ნიავმაც დაიწყო სისინი და ფოთლები ააშრიალაათამაშა; ხის ტოტებზე ჩამწკრივებული ბეღურები გამოაღვიძა, მოასმენინა მწირის ქვითინი და ზევიდან ჩაწივწივებით ანუგეშებინა. არაგვი ხომ მთის იქიდან დიდი ხანია გადმოსჭყივის და ამხნევებს მწირს და ეუბნება, მარტო არა ხარო, მაგრამ მწირს არც ბეღურების

ნუგეში და არც არაგვის გამხნევება არ ეს
მოდა.

მწირი მაინც უფლისადმი საყვედურით
აღვსილი ქვითინებს და ქვითინებს...



„ემ, ჭანდაბას ჩემი თავი და ცანი!..“

(საშობაო ეტიუდი)

„ხვალ შობაა!..“ — მოწყენით წამოიძახა ალექსა სალახმა*) და ხორცის სავაჭრო დუქნის კარებს დარაბები აუგდო. ეს-ეს არის ოცამდის ნავთლუხში დაკლული ცხვრის გატყავებას მორჩი, დუქნის კედლებს გარს ჩამოურიგა და მთელი დღის ნაწილიალი და მუშაობით მოქანული ორად მოკრუნჩხული დუქნის კუთხეში დასინებლად მიეგდო. მაგრამ ძილი გაუკრთა...

„ხვალ შობაა!..“ — გაიმეორა ალექსა სალახმა და ძველი ფარავა აქეთ-იქიდან ამოიკუნეა, მაგრამ დაცხავებული ფარავა არ ათბობდა.

„ჰმე!..“ — მწარედ ჩაიღიმა ალექსამ და გვერდი იცვალა, როდესაც თვალწინ წარმოუდგა ყმაწვილობაში გატარებული შობა-ლამე...

ოხ, რა ბედნიერი იყო, როდესაც გალად-ლადებული კერის პირას იჯდა თავის და-ქმებს შუა და სახოწაო თხილით და კაკლით სავსე პარკუჭანა კალთაში ედო!.. რა უდარდებლად

*) სალახს საქონლის დამკვლელს უწოდებენ

იცინოდა და-ძმებთან ერთად თხილისა და კაკლის
მტვრევაში!...

ეხლა?..

მწარე ჩალიმებაა ამისი პასუხი.

„წელიწადი — თორმეტი თვეა, — ფიქრობს
ალექსა სალახი: — და ამ თორმეტ თვეში არც
ერთი დღე მოსვენება არა მაქვ!... შობა,
ახალ-წელიწადი, ალდგომა — ესაც არ მათავი-
სუფლებს, და ჩემ ცოლ-შვილში ვერ ვატარებ
დროს... ეე!..“ — ოხრავს ალექსა და სიცივი-
საგან შამფურივით ტრიალებს თავის ფარაჯის
ქვეშ.

ქარი-კი ამ დროს შემოგუგუნებს დარ-
ბებს შუა დარჩენილ ფარლალებიდან და თან
ნამჭერი შემოაქვს....

„ჩემმა პატარა ანდრომ მაინც გაიხაროს..
გაიხაროს სანამ პატარაა. ის, ვინ იცის, დედას
ჩახუტებია და ტკბილად სძინავს...“ — გადაბრუ-
ნებით წილაპარაკა და ანდროს მომავალზე
ფიქრს თავი მისცა...

ჰქონდეთ ქარი. ფიქრობს ალექსა, ფიქრობს
და...

— მუუუ!.. — უნდოდა წამოლაპარაკება
ალექსა სალახს, მაგრამ სიტყვების მაგივრად
ზმუილი გამოსცა იმისმა პირმა.

„ეს რა ამბავია ჩემ თავს?! თითქოს ლაპარაკი შემეძლო?! ეს არის ეხლა ჩემ ანდროზე ვფიქრობდი, მინდოდა ღმერთისთვის შემევედრებინა და სიტყვის თქმა-კი აღარ შემიძლიან,“ — გაიფიქრა ალექსამ შიშით.

— მუუუ!... — წამოიზმუვლა „ღმერთოს“ წამოთქმის მაგივრად.

„ვააა, რა ღმერთი გამიწყრა!..“ გაიფიქრა ალექსამ და მიიხედ-მოიხედა...

ხედავს, ბაკში მუხლებამდის წუმპეში სხვა საჭინელს შუაა. დაიხედა ძირს და წყალში თავისი თავის მაგივრად ძროხა დაინახა...

„როგორლაც მეცნობა ეს ძროხა... თითქოს, მინახავს სადღაც... ღმერთო, მომავონე!“ — ძირს ცქერით გაიძახდა უსიტყვოდ და გონს ვერ მოსულიყო... უეცრად შეკრთა. უნდოდა წამოეყვირნა: „ნუთუ მე ძროხა ვარო,“ როდესაც წუმპიდან ამომჭვრეტ ძროხის ლანდში თავისი ლანდი იცნო. თავი მაღლა ასწია. აღარ უნდოდა ემზირნა...

„ღმერთო, მაპატივე და მიხსენ ამ განსაცდელისაგან!..“ — უსიტყვოდ შეევედრა უფალს და უკან მიიხედა. თავის გვერდით მდგომ ხბოს თვალი მოჰკრა. ჩააკვირდა და—ოხ, ღმერთო! — თავისი ანდრო იცნო...

ამას-კი აღარ მოელოდა. გაშმაგებული მოტრიალდა ანდრო-ხბოსკენ და უნდოდა გულ-ში ჩაეკრა, მაგრამ ხელების მაგივრად ჩლიქები-ანი ფეხები ჰქონდა და ვეღარ მოახერხა.

„ანდრო, ანდრო!..—შეზმუვლა ანდრო-ხბოს და თან ლოკვა დაუწყო.—რა მოგველის, რისთვის ვართ აქა, ამ წუმპეში?“—უსიტყვოდ ეკითხებოდა თავის თავს და პასუხს-კი ვერსაი-დან ღებულობდა.

დაუკვირდა თავის გარემოებას. მიიხედ-მოიხედა. ხედავს ბაკების წინ გრძლად ამართულ რაღაცა ფიცრულს, საიდანაც გამოისმის სხვილ-ფეხა საქონლის საკოდავი ზმუილ-ხრიალი, ცხვრი-სა და თხის კიკინ-ბლავილი, რახა-რუხი და ხა-ლხის ლანძლვა-გინება და სიცილ-ხარხარი...

„ღმერთო!..“—წამოიზმუვლა ალექსა სა-ლახმა და შიშის კანკალმა აიტანა.

ჰერძნობს, რომ რაღაც უბედურება მოე-ლის. ტანში ჟრუანტელი უვლის...

— კარები დახურეთ, კარები!..—ეზოს ბო-ლოში რამდენმამე ხმამ შეჰყვირა ერთად და იმავე დროს ალაყაფის კარებიც მიჭრიალდა. სასაკლაო ოთახების კარებიც დახურეს.

— ფშუუ, ფშუუ!..—საშინელის ფშუი-ლით და თქარა-თქურით გამოარღვია ეზოს მო-

რევი გაშმაგებულმა კამეჩმა და ალაყაფის კა-
რებს რომ მიადგა, ტოკვა და თვალების ბლვრია-
ლი დაიწყო.

სალახები და მეხაშეები*) შიშისაგან ეზოს
ფიცრულს შეეკუნჭვლნენ და იქიდან დაუწყეს
ქამანდის სროლა.

სალახების ამ გვარმა მოქმედებამ უფრო
გააცეცხლა და გაალომა კამეჩი...

ალექსა სალახმა თვალი მოჰკრა გაცეც-
ხლებულ კამეჩს და შეძრწუნდა. გასისხლიანებუ-
ლი სალახების და მეხაშეების დანახვამ ხომ სულ
გადარია. სისხლის სუნი მოედინა. იგრძნო სიკვ-
დილის მოახლოვება. წინაგრძნობამ ამცნო და...

„ოხ, ღმერთო, უნდათ სიცოცხლე მო-
მისპონ!.. წუთი-სოფელს გამომასალმონ!.. რა-
და?!“ — გაიფიქრა ალექსამ და ტირილი მოერია.

თავი ძირს დახარა და წუმპეს საცოდავად
ჩაზრდა, თითქოს იქიდან მოელოდა შველას,
მაგრამ...

— მეეე!.. — მოესმა ანდრო-ხბოს ბლავი-
ლიც და ამ ხმამ სულ მოშალა ტანში.

*) მეხაშეები შველიან სალახებს დაკვლასა და ყოველ
მუშაობაში, რაც-კი შეეხება საქონლის დახოცვას, და ამ შრო-
მაში ფაშეს იღებენ. შრომის გარდა მეხაშეები თითო ფაშეში
10 კაპ. აძლევენ საქონლის პატრონს.

— ჭახ-ჭახ!.. — ჭახ-ჭახი და ლაწუნი შეუდგა
ეზოს ფიცრებს.

— თოფი ესროლეთ!.. ოი, ეგ ვერანა!..
— გაიძახოდნენ სალახები და მეხაშეები.

ალექსამ მიიხედა და მინდვრად გავარღნილ
კამეჩის თვალი მოჰკრა.

„ ნეტავი მაგას!.. თავს უშველა და ამ
ადგილს მოშორდა!.. “ — შენატრა ალექსამ კა-
მეჩის...

— რავა გაამტვრია ე ფიცარი და გავარ-
და?!. — გაკვირვებით იძახდა მეხაშე და კამეჩის
გასცეკეროდა.

— გამორეკეთ საქონელი!.. — ბრძანების კი-
ლოთი დაუყვირა სალახმა მეხაშეებს, რომლე-
ბიც მაშინვე შეცვივდნენ ამ ხმის გაგონებაზე
და რამდენიმე სული საქონელი კამეჩის უკან გა-
მოუყენეს.

— ოხრად დაგარჩენ, ხელში კიდევ ჩაგივ-
დებ და, ლვთის წყალობა მაქვს, ურიასავით
დაგტანჯავ! — გაბრაზებით დაილრიალა სალახმა,
და ისიც უკან დაედევნა.

მისწყდა ყიუინა. ჩვეულებრივი მუშაობის
ხმა ჩამოვარდა. ალექსა სალახსაც მიავიწყდა ყვე-
ლაფერი და გამოურკვეველმა გრძნობამ შეიპ-
ყრო. თავის გარშემო აღარას ხედავს...

„რა ამბავია, რას მიშვრებიან?!“ — შიშით
გაიფიქრა და ტანის თახთახმა აიტანა, როდე-
საც სალახმა და მეხაშეებმა შემოაღეს ბაკის კა-
რი, რომელშიაც ის იყო დამწყვდეული, შე-
მოთქვიტეს წუმპე და რქებში თოკი ჩააბეს.

— მულუ! — წამოიზმუვლა და მიხედა ან-
დრო-ხბოს, რომელსაც ამ დროს ჯოხი წამოჰ-
კრეს. — მულუ!.. — წამოიზმუვლა უფრო საცოდა-
ვად, როდესაც თოკს გასწიეს და, რადგანაც ადგი-
ლიდან არ იძროდა, ფეხებში კეტი სდრუბდეს.

ანდრო-ხბო კი ჯოხის პირველ წამოკვრა-
ზედვე გავარდა ბაკიდან ეზოში. ამის დამნახავი
ალექსაც გაჰყვა და, ოჸ, ეზოში რომ გავიდა,
საზარელი ოთახის კარი ლია დაინახა. იქ უნდა
შეეყვანათ. იქ მოედებოდა ბოლო. ამას იმის
სხეულის ყოველი წერტილიც-კი გრძნობდა
და შიშით თრთოდა. ტვინი აერია. ერთად ერ-
თი აზრი-ლა შერჩა თავში და ეს აზრი ძვალსა
და რბილში გაუჯდა... ლნდა მომისპონ სიცოც-
ხლე!.. ოჸ, რა საზარელია წინად ამის გაგება!..

მოძრაობისთვის მოსაზრების ძაფი გაუწყდა.
კარებისაკენ ეწეოდნენ, ჩლიქებში კეტსა სცემ-
დნენ, მაგრამ გონს ვერ მოსულიყო, საით და
როგორ გადაედგა ფეხი...

— კუდი, კუდი!.. — დაუძახა თოკის გამ-

წევმა უკან მდგომთ და უფრო ძლიერად გას-
წია თოკს.

უკან მდგომთ მოავლეს კუდში ხელი და
შუაზედ გადაუტეხეს.

საშინელი ტკივილი იგრძნო ალექსამ.

— მუუუ!.. — გულსაკლავად წაიზმუვლა და
თავისდა უნებურად წინ წამოტორტმანდა, მაგ-
რამ ისევ შესდგა.

უნდოდა ამ ამოკვნესით ეთქვა: „წავიდო-
დი, მაგრამ რა ვქნა, რომ ფეხები არ მემორი-
ლება, რომ არ ვიცი, საით და როგორ გადავ-
დგა ფეხები!..“

„ოხ, რა ძნელი ყოფილა უენობა!..“ — გაი-
ფიქრა ალექსამ და კიდევ უნდოდა შეეზმუვლა,
მაგრამ ამ დროს ისევ იგრძნო საშინელი ტკი-
ვილი. კუდი ახლა მეორე ადგილას გადაუტეხეს.
კიდევ წატორტმანდა.

ამ ვაი-ვაგლახით შეიყვანეს სასაკლაო ოთა-
ხში. შეიყვანეს იქ, სადაც ხორცი და ყოველი-
ვე სიბინძურე ერთად იყო არეული.

— მეე!.. — გულ-საკლავად დაიბლავლა სა-
სისხლესთან წამოქცეულმა ანდრო-ხბომ.

მშობლის გულმა იგრძნო, რომ მისი ანდ-
რო განსაცდელშია. თვალები მოეწმინდა და
დაინახა, რომ სალახმა ყელში დანა გაუგდო

იმის საყვარელ შვილს... სისხლმა გადმოსჩეფა...

— მუუუ!... — დაიზმუვლა და შვილისაკენ გასწია, მაგრამ ამ დროს ჩეხაშემ მარცხენა ხელი ქვედა ყბაში ჩაავლო, მარჯვენა კიდევ მარჯვენა რქაში...

— ღრააჭ!... — უეცრად მოილო ალექსას კისერმა ღრაჭანი და ძირს მოწყვეტით ზღართანი მოსძვრა.

ამ გვარი ტკივილი არას დროს არ უგრძვნია თავის სიცოცხლეში. თავისდა უნებურად წაიზმუვლა უკანასკნელად და გონება დაპკარგა.

როდესაც გონს მოვიდა, ის უკვე ფეხებგაკრული და ყელ-გადაწეული სასისხლესთან ეგდო...

— ხა-ხა-ხა!.. ალექსი, მოგხვდა?!.. შენც ხომ მაგრე სტანჯავდი საქონელს, უენო საქონელს?!.. შენც ხომ სალახი ხარ?!.. — ამ დროს ხარხარით ჩასძახა რაღაც ნაცნობმა ხმამ.

— მე ვტანჯავდი?! ჰო, მე ხომ სალა... — აღარ დასცალდა აზრის დაბოლოვება. სალახმა ყელში დანა გაუგდო და აზრის მიმდინარეობა შეუწყვიტა...

გაფითრებული ალექსა სალახი უეცრად წამოჯდა და ნამქერ-წაყრილი ფარაჯა იქით სტყორცნა. გული საშინლად უხტოდა...

— შე ოჯახ-დაქცეულო, მოჰკვდი თუ რა
მოგივიდა?! რამდენი ხანია დუქნები დაიღო! —
შემოესმა ბრახუნთან ერთად დუქნის პატრო-
ნის ხმა.

— ჰო, ეხლავე!... — უპასუხა ალექსა სალა-
ხმა და ხელი პირისახეზე ჩამოისვა...

ყაბალახ-შემობორბლილმა ალექსამ კახე-
თის გზიდან გადმოუხვია ნავთლუხისაკენ და...

— ფუი!... — ბრაზ-მორეულმა გადააფურხა
და ქალაქის მმართველთ ერთი გემრიელად შე-
უკურთხა, რადგანაც, კახეთის გზას გადმოუხ-
ვია თუ არა, მუხლებამდის ტალახში შეურია.

ბურდღუნით და ლანძღვა-გინებით მიერე-
კებოდა საქონელს სასაკლაოსაკენ და საქო-
ნელზე ყრილობდა უდიერის ცემით ქალა-
ქის გამგეობისაგან გამოწვეულ ჯავრს.

ხან ერთ ცხვარს ამოაძრობდა ტალახიდან
და წინ ისროდა, ხან კიდევ მეორეს. ხბო თი-
თქმის ზურგით საზიდი გაუხდა...

დაუახლოვდა სასაკლავოს. მეხაშეები მიე-
გებნენ და უშველეს ჯერ ეზოში შერეკვა და
შემდეგ ბაკში.

ქალაქი მოიცვა ამ დროს ზარების გუგუ-
ნშა. სასიხარულო ხმა გაისმოდა ტფილისის ჰა-

ერში. უველა ეკლესიის ცენ მიეშურებოდა, ყველას სახე უბრწყინავდა და გაუგებარის სიხარულით იყო მოცული. იქ-კი, სასაკლაოში, გაცხარებული მუშაობა იყო. საღანები გაბრაზებულნი, რომ ამისთანა ბედნიერ დღესაც გვამუშავებენო, ულმობელად ეჭცეოდნენ უენო საქონელს და შეუბრალებლად უსპობდნენ სიცოცხლეს...

— კუდი მოუგრიხეთ მავ სავერანეს, მაგას!.. — შეტევით დაუყვირა ალექსამ მეხაშეს და უფრო ძლიერად გასწია თოკს.

მეხაშემაც გადუტეხა კუდი ძროხას, რის შემდეგაც მთრთოლარე ძროხა სასაკლავო ოთახის კარებში შეტორტმანდა, სადაც ყელ-გამოლადრული წვრილფეხა და სხვილფეხა საქონელი კერახებივით ეყარა.

რაკი ძროხა ოთახში შერყვანეს და სასისხლესთან დააყენეს, ალექსა საღანებმა თოკს ჩელი ანება და იქავ, ძროხის თვალ-წინ, ხბოს ყელი გაულადრა...

— მუუუ!.. — შეჰემუვლა ცრემლებ-მორეულმა ძროხამ...

მთრთოლარე ტანი მოელეშა, მუხლები ჩაეკეცა, თავის შვილის გვერდით წამოიქცა და ყელის გამოსაჭრელად კისერი გადაჭიმა.

— აი, შე დალოცვილო, შენა!.. ყველა
ემაგრე რო წვებოდეს, კარგი იქნებოდა, თო-
რემ ზოგი რო გაცოფდება ხოლმე, რასა გავს!..
— ღიმილით ლაპარაკობდა მეხაშე და თან ფეხებს
უკრავდა ძროხას.

ალექსა სალახმა-კი კისერი უფრო გადუ-
ჭიმა, რქაზე ფეხი დაადგა და მარცხენა ხელით
ყელის ტყავი მაღლა აუწია, მარჯვენით-კი სა-
რტყელში ჩარჭობილი ქარქაშიდან დანა ამოი-
ღო და...

რა მოუვიდა ალექსა სალახს, რომ ყელთან
მიტანილი დანა ხელიდან გავარდა და გაფი-
თრებულ სახეზე ჭირის-ოფლი გადმოსკდა?!

— ოოჰ, სიზმარი!.. — ღრმად ამოხვნეშით
წამოიძახა, მოისვა მაგრა შუბლზე ხელი და
ოფლი მოიწმინდა.

— აღარ დაჰკლავ, ალექსი? — დაეკითხა მე-
ხაშე, რაკი ალექსა წელში აიმართა და დანა
ქარქაშში ჩააგო.

— აღარა... ჰო... ფეხები გაუხსენი... —
დაბნევით უპასუხა ალექსამ და რაცრაცით გა-
მოვიდა.

გამოსტოპა ეზოს მორევში და გზას გაუ-
დგა, თუმცა-კი არ იცოდა, რისთვის მიდის და
ან საით.

პირდაპირი ქარი-კი გახურებულ სახეს და
გადაღელილ მკერდს უშევპავს, ნამქერს აყრის
და იდუმალად ჩაბზუის: „ხბოოო.. ხბოო!..“

— ხბოოო!.. უსუსური ანდრო!.. ვაიმე! —
წამოილრიალა და ტანში ურუანტელმა დაუ-
არა. — შე თათარო, შენა!.. — მკაცრად მიმარ-
თა თავის თავს და ხელი მაგრა შემოირტყა
თავში.

— ნაუუუ!.. — მოისმა ამ დროს წმიდა ბარ-
ბარეს ეკლესიიდან შუა წირვის ზარის რეკვა.

— ღმერთო!.. — ქუდის მოშველეპით წა-
მოიძახა ზარის ხმის გაგონებაზე და გულში
იმედ-ჩასახული ეკლესიისკენ გაეშურა.

იქ მოელოდა ხსნას, სანუგეშებელ სიტყ-
ვის გაგონებას და შვებას. ოხ, რანაირად იტან-
ჯებოდა!.. შობა დღეს სისხლის დალვრა?!

— ღმერთო, ღმერთო!.. — გაიძახოდა და
თვალწინ სისხლის მორევი და იქიდან ყელ-გა-
მოლადრულ ხბოს ღმობიერად გამომჰკვრეტი
თვალები ეხატებოდა...

ტალახში ამოსვრილი, გასისხლიანებული
შევარდა ეკლესიაში და მაშინვე მუხლი მოიდ-
რიკა წმიდა ბარბარეს ხატის წინ.

ამის დანახვაზე ხალხს ფრუტუნ-ჩურჩუ-
ლი აუტყდა; მღვდელ-მთავარ-დიაკვანი კიდევ

„პაკი-პაკი, გოსპოდი პომილუი! დნეს ხრისტოს...“ - ს გაიძახოდნენ, წმ. ბარბარეს ხატი-კი ერთს წერტილს მისჩერებოდა და ალექსა სალახს ყურადღებას არ აქცევდა.

ხალხმა დასკინა. მღვდელ-მთავარ-დიაკვნისა იმას არა ეყურებოდა-რა და იმათი სიტყვები: „დნეს ხრისტოს...“ „დნება ქრისტე“-დ მოესმოდა.

— ლმერთო! — ცრემლით მიმართა უხილავს არსებას, რაკი ხილულთ შორის თანაგრძნობა ვერ ნახა და სანუგეშო სიტყვა ვერა გაიგონა-რა.

მაგრამ უხილავმა არსებამ ნუგეშის მაგივრად ეს ჩასძახა ყურში: „სისხლი... ხბო... ანდრო... ხა, ხა, ხა... სად შემოხვედი?.. აქ შენი ადგილი არ არის!“


„ხბო!..“ — გული მოეკუმშა, ყურებმა შული დაუწყეს და ეს სიტყვა ძლივს-ლა წამოილულულა.

მაშინვე წამოდგა და ჩუმალ, მობუზული ფეხ-აკრეფით გარედ გავიდა.

„ხსნა არ არის!“ — ცეცხლის მოდებით წამოიძახა და შეუმჩნევლად დუქანში შევიდა.

— ოხ, ალექსი! ჭაჭა? — ცბიერად დაეკითხა დახლიდარი.

— ჰა!.. — უპასუხა ალექსამ.



— თხლაშო თუ წრუტო? *)

— თხლაშო! ..

დახლიდარმა საჩქაროდ ჭაჭის არყით სავსე
ჭიქა გადმოაწოდა, ალექსამ ჩამოართვა და
სწრაფლ გადაჰკრა.

გული ჩაფხანა, უამა.


— კიდევ! — დაიძახა ალექსამ და ცარიელი
ჭიქა დახლზე დაახეთქა.

— ეჰ! ჯანდაბას ჩემი თავი და ტანი! .. —
ხელის ჩაქნევით წამოიძახა, როდესაც დახლი-
დარმა სავსე ჭიქა გამოუწოდა, და ისიც ისე გა-
დაყლაპა, როგორც პირველი.

მეორეს მესამე მოჰყვა, მესამეს — მეოთხე
და ...

ალექსა სალახი კარგა შეხურებული გამო-
ვიდა დუქნიდან და სასაკლაოსკენ გასწია.

ეხლა ალექსასთვის სულ ერთი იყო, თა-
ვისი თავი დაღუპულად სცნო: კაცი რომ წა-
მოუქციონ, იმასაც-კი ყელს გამოლადრის, თო-
რემ საქონელს ხომ სიკეთეს არ დააყრის და არა.



*) „თხლაშოს“ სალახები ეძახიან შაურიან არყის ჭი-
ქას, „წრუტოს“ — სამ კაპეკიანს.

„„ხითხითებს და ხითხითებს...“

(ეტიუდი)

სიცილი, ტირილი, კოცნა, ლაპარაკი, ფე-
ხის ხმა და ხრიალ-ჩხრიალი ერთმანეთში ირეო-
და და გამოურკვეველი ხმა გამოისმოდა...

მატარებელმაც დაუსტვინა. დაიძრა... ფე-
ხის ხმა მისწყდა. ხალხი დაიშალა. თითო-ორო-
ლა-ლა დადიოდა ჩემს ახლო, ისიც რკინის გზის
მოსამსახურე...

მე-კი იქავე ვიდექი და ნაზად, ჰარმონიუ-
ლად მეწვეთებოდა ყურთ ანნას სიტყვები: „ხომ
გაიგონეთ, რასაც ქაიხოსრო გეუბნებათ?!“

რას არ გავიგონებდი ქაიხოსროს სიტ-
ყვებს?! მაშ რაღას გავიგონებდი, თუ არა იმის
ქმრის სიტყვებს: „არ დაგვივიწყოთ, გვეწვიეთ
ამ ზაფხულს!..“ ქაიხოსრომაც რა ზრდილობით
მომმართა ამ სიტყვებით, როდესაც გამომემშვი-
დობა?! ვიდექი და ზევით, იმ მხარისკენ გაშ-
ტერებული გავიცქირებოდი, საითაც მატარებე-
ლი გაგნულდა, და ანნა თვალიდან მომტაცა...

რომ არ მომრიდებიყო, იმ წამსვე ვისარ-

გებლებდი დაპატიუებით და ფეხით გავუდგებოდი გზას. შუადღის მატარებელსაც აღარ მოვუცდიდი...

„მგონი დამივიწყე, — მწერდა ერთი თვის შემდეგ ანა:— და აღარც-კი გაგონდები...“

— ანავ... ანავ!.. შენ დაგივიწყებ როდისმე?!. — წამოვიძახე წერილის წაკითხვის შემდეგ და მაშინვე ვაგზლისკენ გავჭანდი.

ჯერ მატარებლის გასვლის დრო არ იყო. ორი ჟამი მეტი სადგურზე ველოდი.

ახ, რა ძნელია ლოდინი!.. მე მივისწრა-ფებოდი და უნდა მელოდნა კია. ორი ჟამი ორ საუკუნედ გარდამექუა... ვნატრობდი ფრთებს, მაგრამ ფრთებს ვინ გამომასხამდა.

გონების ფრთებმა-კი დიდი ხანია მიმაფრინეს ანნასთან და იმის სპეტაკ ხელებს დამაკონეს, მაგრამ ამით ვერა ვკმაყოფილდებოდი...

მიგნულავს მატარებელი, გააქვს დაგა-დუგი, მაგრამ... ფუი!.. მაგრამ ისა, რომ თითქოს კა-მეჩები აბიანო, ისე მიიზლაზნება, მიცურავს... კედლებს ვაწვები, მინდა ავაჩქარო, ცოტათი მაინც წინ წავსწიო...

ახ, რატომ მემანქანე არა ვარ, რომ

ელუასავით გავიტაცო მატარებელი და თვალის
დახამხამებაზე ანნას მივესალმო, რომლის ლან-
დიც თვალ-წინ მეხატებოდა და მიახლოვებას
მანიშნებდა, ზაგრამ, აი გაოხრდეს მატარებელი,
წამ-და-უწუმ შეჰყვირებს, შეყვირებასთან ერთად
მძიმედ ქშინვას ჰყვება და — ღმერთ-გამწყრა.
ლი! — ღვება...

ეს გარემოება ხომ სულ მწამლავდა და
ტანში გშლიდა. ვლანძლავდი ჩემ თავს, რომ
წინადვე არ ვისარგებლე დაპატიუებით და ერთი
კვირის შემდეგვე არ ვეწვიე. ვლანძლავდი ჩემს
მოკრძალებას, მორცხვობას, უიმედობას. ამის-
თანა დროს, გაბედულობა, ურცხვობა უნდა და
მე-კი უმანკო ქალივით ვწითლდებოდი, მერი-
დებოდა და მარტო ვოცნებობდი...

ხა, ხა, ხა!.. რა სულელი ვიყავ!..

ანნა საოცნებო არსებაა?.. გული მოგტა-
ცა და დაისაკუთრა?.. მიდი შენც, რომ იმისი
გული დაიმონავო და არა შენს ოთახში იოც-
ნებო, ინატროდე.

მაგრამ ახალგაზდა ვიყავ მაშინ, მეპატი-
ვება. პირველი შემთხვევა იყო ჩემ ცხოვრე-
ბაში, რომ ისე გავეგიუებინე ქალს. ანნამ გა-
მილვია პირველად გული, იმან დამიმონა და
აბა პირველ ხატს, პირველად წმინდანად

აღსარებულ ქალს როგორ გავუბედავდი რა-
სმე?!..

ვცდილობდი ჩემი გრძნობა დამემალა, რომ
ამით შეურაცხყოფა არ მიმეუწენებინა. გამომუდა-
ვნება, მეგონა, შეურაცხყოფას მიაყენებდა. ამ-
გვარი შეხედულობის პატრონი რას გავბედავ-
დი?!.

შესაძლებელი იყო, სრულებით არ ვწვე-
ვოდი, რომ ანნას არ მოეწერა.

წერილმა-კი თვალები ამიხსნა და დამარ-
წმუნა, რომ ისიც გულ-გრილად არ მიყურებს,
რომ იმასაც უნდა ჩემი ნახვა. უთუოდ იცოდა,
რომ მე ქოჩირამდის ვიყავ ჩაფლული და მხო-
ლოდ ის იყო ჩემი ჩასაფიქრებელი...

— ძლივს!.. — წამოიძახა ანნამ, როდესაც
დილა ადრიანად აველ იმათ აივანზე და წინ
შემეფეთა.

— დილა მშვიდობისათ!.. მე მეგონა, ჯერ
ისევ გეძინებოდათ და თქვენ-კი რა ადრე გა-
გილვიძნიათ,— მივესალმე და ხელი მოწიწებით
ჩამოვართვი. იმან-კი ხელი ხელს მაგრად, მაგ-
რად მომიჭირა და თვალი-თვალში გამიყარა.

— ტყუილად გიფიქრნიათ, მე ყოველთვის

ადრე ადგომა მიყვარს. — მიპასუხა ანამ და უფრო ძლიერ მომიჭირა ხელი.

იმის ხელის შეხებაზე მე ჩემი დამემართა: გული გადამიქანდა, უეცრად სუნთქვა შემიღვა და, მგონია, უგრძნობლად გულზე მივესვენებოდი, რომ ქაიხოსროს აივანზე გამოსვლას გონს არ მოვეყვანე...

— კარგია, ყმაწვილო, გაგიბედნიათ! რატომ მაგრე გვიან მოგაგონდით?! — მეტის მეტი ზრდილობით მომმართა ქაიხოსრომ და ხელი გამომიწოდა.

— საქმეები მქონდა, თორემ თქვენ როგორ არ გეწვევოდით. — ვუპასუხე და კარ-მიდამოს გადავხედე, რომ შეკრთომა არ შეემჩნია ჩემ სახეზე...

მგონია, ქაიხოსროს არა დაუხარჯავს-რა ამ საუცხოვო ჭალა-ტყეზე და ბუნებისათვის ჩაუბარებია იმისი მოვლა-პატრონობა. იქნება მხოლოდ ამისათვის იყო საუცხოვო, რომ ქაიხოსროს მზრუნველობითი ხელი არ შეხებია!..

— როგორ მოგწონთ აქაურობა?!

— მშვენიერება რამ არის!..

— ეს რა არის! აი, მთის წვერიდან უნდა გადმოხედოთ, რომ მაშინ შეიტყოთ აქაობის სიმშვენიერე!.. — თითი მიაშვირა. ქაიხოსრომ ტყით

შემოსილ მთას, რომელიც იქვე, სახლის გვერდიდანვე იწყებოდა, და შემდეგ ბიჭის გადასძახა:

— ბიჭო, ამოდი ბატონს პირი დააბანინე და ტანისამოსი გაუწმინდე!

ეხლა-ლა მომაგონდა, რომ მთელი ლამე საღვურიდან ცხენით ვიარე და კარგა მტვერიც დამედო.

— უკაცრავად, რომ ასე გეახელით! — და-რცხვენით ვუთხარი ცოლ-ქმარს და ტანისაცმელს ყურება დავუწყე.

— რა ბოდიშს იხდით. მგზავრის წესი ეგ არის. თქვენ კიდევ რა გიჭირთ, გუშინ ილიკო, ან-დრო, ლევანი, თამარი და ელენე ისე დაგუნ-გლულები მოვიდნენ, რომ პირი-სახე აღარც-კი ემჩნეოდათ. ეხლავე გაიღვიძებენ და თუ გინ-დათ ჰკითხეთ. — მითხრა ანნამ და ოთახისკენ გამიძლეა, სადაც პირი უნდა დამებანა და ტანისამოსი გამეწმინდა.

—

მთელი ლამის უძილობამ იმოქმედა. რო-დესაც ბიჭმა მარტოდ დამტოვა, მოწყვეტით მივწექი ლოგინზე, რომ ცოტათი მუხლი მო-მესვენებინა, და ოცნებობა დავიწყე. საოცნებო საგნად, რასაკვარველია, ანნა მყვანდა და იმა-ზე ვფიქრობდი. სოფელი მოხდენოდა. იმისი

სიმშვენიერე გაათკეცებულიყო... ჩემს ოცნება—
ში ხომ გადიდდა იმისი სიმშვენიერე... გაფარ-
თოვდა... ეთერად გარდიქმნა... ოთახი მხო-
ლოდ იმისი სიმშვენიერით იყო მოცული...
ანა ყველგან არის: იქაც... იქაც...

— უხ!.. — წამოვიძახე, თვალები მოვიფშვ-
ნიტე და საათს დავხედე.

უკვე მეთორმეტე უამი შესრულებულიყო,
სრული ექვსი უამი მძინებია. საჩქაროდ შევიბა-
ნე პირი და გარედ გაველ.

— ოხ, მძინარავ, საით მიემგზავრები! — წა-
მოიძახა ნაცნობმა ძვირფასმა ხმამ, როდესაც
ბალი გავიარე და მთის ბილიკს შევუდექი...

— თქვენ აქა?!.. განა სხვებთან ერთად
იქ არა ხართ?!..

განცვიფრებით დავეკითხე ანნას და ხელი
მთის წვერისკენ გავიშვირე.

— მაგრე რად გაიკვირვე?! — ღიმილით მკი-
თხა და ჩემსკენ წამოვიდა.

— ქაიხოსრომ მითხრა, ყველანი ზევით
წავიდნენო...

— განა მე „ყველას“ შევადგენ?

— ჩემთვის? — კი...

— სუ!.. — ღიმილით თითი დამიქნია და
აღარ განმაგრძობინა. — ეხლა პირდაპირ იქ ახვი-

დოდით?.. — მკითხა ცოტა ხნის სიჩუმის შემ-
ღებ.

— დიალ!.. მხოლოდ იმ იმედით, რომ იქა
გპოვებდით.

— კიდევ, ცბიერო!?. მე ვიცი, ვინც არის
შენი „ყველა“ და ვისთვისაც ახვიდოდი მთის
წვერზე. ელენე, თამარი, კატო და... იქ არიან,
ხომ მოგწონან და ერთი მათგანი კიდეც გი...

— ანნავ!.. — გავაწყვეტინე ხმა.

— რა, განა ტყუილს გეუბნები?!

— დამცინთ თუ რა არის, როდესაც
კარგად...

— წავიდეთ იქ. მე ხელს არ შეგიშლი.
პირიქით, საშუალებას მოგცემ უფრო დაგაახ-
ლოვო იმასთან... — თითქოს ჩემი სიტყვები არც
კი შესმენიაო, ისე ლაპარაკობდა და თან საით-
კენლაც გაიცემირებოდა. მე არც-კი მიცეკეროდა.

მე-კი შევცეკეროდი და იმისი ამგვარი გულ-
გრილად ლაპარაკი ცეცხლს მიკიდებდა.

— ანნავ, მე თქვენს გვერდით მინდა ამო-
მივიდეს სული და თქვენ-კი...

— მაშ კარგი!.. — უეცრივ კილო შესცვა-
ლა და შებლი შეჭმუხნა.

— ანნავ!.. — ეს-ლა. წამოვილულლულე და
ცივ-ოფლ-დასხმულმა უკან დავიწიე.

მეგონა ჩემმა თავხედურმა ლაპარაკმა გული მოაყვანინა და ამის გამო დარცხვენილი თავის მაღლა აღებას ვეღარ ვძედავდი.

— ჩემო მიტრო, მაგრე უეცრად სასოწარ-კვეთილებამ რად შეგიპყრო?! — ისე ჩუმად, ტკბილად და სიყვარულით მითხრა, რომ გამომაცოცხლა, ღრუბელი გადამწმინდა და ნეტარებით დამადნო...

— ანნავ!.. ანნავ!.. ჩემო ანნავ!.. — დაბნევით გავიძახოდი და თან გარს ხელებს ვხვევდი...

— მიტრო, მიტრო!.. — ჩემ მკერდზე მოსვენებული და თვალებ-მილულვილი ნიავსავით ჩამჩრერჩულებდა მისუსტებულის ხმით, თითქოს თავის განძრევის ძალა აღარა აქვსო...

ამ გარემოებამ ხომ სულ გადამრია, თვალთ დამიბნელდა და...

— მხეცო!.. — მრისხანედ წამოიძახა, როდესაც თრთოლვით შევახე ტუჩები იმის თბილ ტუჩებს, და ერთი ისეთი სილა გამიშალა, როთვალთაგან ნაპერწკლები გადმომცვივდა...

არ ვიცი, როგორ და რისთვის! გონება რომ შემრჩენოდა, იქნება, როდესაც სილა გამარტყა, ბოდიში მომეხადნა და მოვშორებოდი, მაგრამ ეხლა-კი მოვხვიე ხელები და მაგრად, მაგრად ჩავჭუპნე.

— რაო, ძალასაც ხმარობ?!.. ვაი, მიშველეთ!.. — დაიწივლა სასოწარკვეთილებით ანნამ და ისტერიული ქვითინი აუვარდა.

გამიკვირდა კიდევაც, ქაიხოსრო რომ იმ წამსვე იქ გაჩნდა და შემომიტია: „შემდეგ მოგოხოვთ პასუხს“-ო და მაშინვე ანნას გვერდით მუხლებზე დაეცა: ხელებს უკოცნიდა, ამშვიდებდა, ეხვეოდა და...

მე?.. მე-კი შერცხვენილი, დამცირებული ფეხ-აკრეფით გამოვიპარე...

ვინ იყო დამნაშავე?.. მე თუ ის?.. არ ვიცი. მე-კი ორსავე ვლანძლავდი: ჩემ თავს, რადგანაც გრძნობას თავისუფლება მივეცი და ისე ავეტაცინე, ანნას-კი იმის გამო, რომ მითვალთმაქცა, წამაცდინა, რომ დავემცირებინე... ორნივე შემძულდა, შემეზიზდა.

პირველად გადამხდა თავს ეს დამცირება, და ამისთვის მეტად მწვავია, გონების ამხდელია. კიდევ კარგი, რომ თამარი და სხვები მთის წვერზე იყვნენ და ანნას კივილი ვერ გაიგეს, თორემ, შენ მტერს, გარედ აღარ გამომესვლებოდა...

— ხა, ხა, ხა! — ვხარხარებდი გიჟივით: ვესტუმრე და იმავე წუთს შეურაცხყოფა მივაყენე ოჯახს. კარგია, შენმა მზემ, აი!

— აბა რას დადგებოდნენ და არ უმშობდნენ! — თან ამასაც ვფიქრობდი და ტანზუ ერუანტელი მივლიდა.

რაც დრო გადიოდა და ვუკვირდებოდი ჩემ საქციელს, უფრო მეტ სისაძაგლეს ვჰოულობდი და უფრო მეტად ვიტანჯებოდი. დრომ მალამო ვერ დამდო.

ოთხი დღე გავიდა. მე კიდევ მაინც ის შემთხვევა თვალიდან არა მშორდებოდა და ოთახში ტრიალის დროს ვითურთხებოდი. ოთახიდან გარედ აღარ გავდირდი. მეგონა, ყველა იცის და მასხარად მიგდებს. კედლებსაც-კი ვეღარ შევცეკეროდი, თვალს, ვერ ვუსწორებდი; რადგანაც ისინიც-კი იცინოდნენ, მასხარად მიგდებდნენ... ოთხი დღე შინ დავაღამე და მეხუთესაც დავაღამებდი; რომ შუაღლისას ორი წერილი არ მომსვლოდა.

ორსავე შტემპელი იქაური ჰქონდა.

— ძლივს!... — წამოვიძახე და თავისუფლად ამოვისუნთქე...

ვიცოდი, ქაიხოსრო მომწერდა. დაკშაურფილებას მომთხოვდა. გადაწყვეტილი მქონდა გული მიმეშვირა და მე-კი ხელი არ გამომეღო.

მაგრამ შინაარსმა გამაოცა.

„პატივცემულო დიმიტრი ნიკოლოზის ძევ,
— მწერლა ქაიხოსრო: — ძლიერ ვსწუხვარ, რომ
ცოტათი გაწყენინეთ. გთხოვთ, დაივიწყოთ ყვე-
ლაფერი და ისე ძველებურად იაროთ ჩემს
სახლში. ვიცით, თქვენ სიყმაწვილით მოგივიდათ
და ამისთვის ყურადღებას არ ვაქცევთ. იმის და-
სამტკიცებლად, რომ დავიწყებული გაქვთ, ამ
კვირია გვეწვევით. დროსაც კარგად გაატარებთ,
სტუმრები ბევრი გვყავს. ანნაც გწერთ წერილს.
იმედია, არ გაგვაცრუებთ...“

„თქვენი პატივის მცემელი ქაიხოსრო მახა-
თელი.“

— დამცინის, თუ რა არის?? — პრაზ-მო-
რეულმა წამოვიძახე და დაჭმუჭნული წერილი
ოთახის კუთხისკენ ვისროლე.

წაუკითხავი ანნას წერილისათვისაც ისევ ის
გზა მინდოდა მეჩვენებინა, მაგრამ ცნობის მოყ-
ვარეობამ შემაყენა და გავხსენი.

„ჩემო მიტრო! უთუოდ მიწყრები, რომ
ისე კალნიერად მოგეპყარ. ჩემი ბრალი არ იყო.
იძულებული ვიყავი, ისე მომემოქმედნა. ეს-კი
იცოდე, ყველაფერი შენის გულისთვისვე ჩავი-
დინე. შენ ვერც-კი წარმოიდგენ, რანაირად მიყ-
ვარხარ. ნეტავი შენც ისე გიყვარდე, როგორც
მე შენ მიყვარხარ. კოცნის გულისთვის მოგა-

ყენე შეურაცხყოფა. კოცნა-კი არა, მზადა ვარ მთლად მოგეცე, დღე-მუდამ შენთან ვიყვე. ჩემი სურვილი ესაა და ესავე იყო კოცნამდისაც. სურვილი რომ სურვილადვე არ დამრჩენოდა და ოდესმე გამხორციელებოდა, შეურაცხყოფა მოგაყენე პირველი კოცნის დროსვე. მიხარიან კიდევაც, რომ პირველი შემთხვევისათანავე გარემოება მაგრე. მოეწყო...

„ჩემი ბებრუცუნა საშინლად იჭვნეულობდა, თუმცა-კი პირდაპირ გამოთქმას ვერ მიბედავდა. ვატყობდი, თვალ-ყურს ადევნებდა ყოველ ჩემ ნაბიჯს და უზომოდ იტანჯებოდა. გეფიცები, შენს მეტი მე არავინ შემყვარებია და, ხომ იცი, რანაირად შორს ვიჭერდი თავს. რა ჰქონავდა, რა სტანჯავდა?!“

„შენ რომ შეგხვდი მთისკენ მიმავალ ბილიკთან და ლაპარაკი დაგიწყე, ხომ გახსოვს, უეცრად როგორ სახე შემეცვალა? აი, სწორედ მაშინ შევნიშნე, რომ ქაიხოსრო მოიპარებოდა ჩვენსკენ და ჩუმად ხეს ამოეფარა. საშინლად მეწყინა. აფირიე. მაგრამ იმავე დროს უეცრად გამიელვა აზრმა, რომ იმისთვის თვალები ამეხვია და იჭვნეულობა მომეშორებინა. მერწმუნე, იმ დღეს შენ იმდენად ნებას არ მოვცემდი, რომ საკოცნელად მომტანებოდი. ქაი-

ხოსროს უმაღლოდე, რომ ისე ჩქარა დავუახლოვდით ჩვენ ერთმანეთს. განა, მე გაგაბედვინე?!

„საუცხოვოდ დაბოლოვდა ჩემი განზრახვა... ვერ წარმოიდგენ, ხელ-ფეხს რანაირად მიკოცნიდა, როდესაც შენ ფეხ-აკრეფით გაიპარე და მე კიდევ განგებ ისევა ვქვითინებდი!..

„მაპატივე, ჩემო ანნავ!.. ნუ გამიწყრები!.. მე, სულელს, ეჭვი შემომქონდა!.. უსინიდისოდ გზვერავდი... ვიჭვნეულობდი... განა არ ვიცოდი, რომ ერთგული ხარ, გიყვარვარ და მე-კი... გეფიცები სიყვარულით მომდიოდა... ეხლა-კი...“ — უგონოდ ხან რას გაიძახდა და ხან კიდევ რას...

„ძალიან ეწყინა, როდესაც შეიტყო, რომ წამოსულიყავ. საწყალ ბიჭს, როგორ შერცხვებოდა თავისი მოუფიქრებელი საქციელისაო,— გაიძახდა და ბიჭის დადევნება უნდოდა, მაგრამ მე არა ვქენი.

„მე განგებ ძალას ვატანდი, უნდა საბრძოლველად გამოიწვიო და სამაგიერო გადაუხადო-მეოთქი.

„— ეხლა ვეღარ, ეხლა ვეღარ... ეხლა ისე ბედნიერი ვარ, რომ მინდა ყველამ იცოცხლოს, ყველანი მიყვარან, ჩემო სულო, და შენ ცგოთხოვ, აპატიოო... — დაუინებით მეუბნებო-

და და ძალად (ეს ჩვენ შორის იყვეს: „ძალად“) წერილი მომაწერინა პატიების ნიშნად...

„ეხლა, ჩემო კარგო, ქაიხოსრო ისეა და-
რწმუნებული, რომ ერთ საბან ქვეშაც რომ
გვნახოს, სიამოვნებით გაიცინებს და სრულე-
ბით ეჭვს არ შემოიტანს ჩემზე...“

„ასე არა სჯობია?!.. საწყალი ქაიხოსრო,
რად უნდა იტანჯებოდეს?!..“

„საფლავამდის შენი ანნა.“

„წ. კ. სტუმრებს ასე ვუთხარით: მიტრო
ტელეგრამით დაიბარეს და იმ კვირია ისევ ამო-
ვაო. ეს ქაიხოსრომ მოახერხა. შენი აქ უოფნა
ძალიან უნდა და მე ხომ—გეცოდინება... უე-
პველად გვეწვევი.“

„შენი ანნა.“

—საზიზლარი თვალთმაქცი!.. —წამოვიძანე
და ანნას დაფლეთილი წერილი ქაიხოსროს წე-
რილს მივაყარე. გაბრაზებული ოთახში დავრ-
ბოდი, ანნას ვლანძლავდი, იმის საქციელს ვკიც-
ხავდი და ქაიხოსროს უტვინობას ხომ... მაგ-
რამ მეც რომ მომატყუა და წამაცდინა?.. ხა, ხა,
ხა, ხა!.. —უეცრად გიუივით გადვიხარხა-
რე, როდესაც ჩემი წაცდენა მომაგონდა და
განცვიფრებული ოთახის შუა შევდექი.

საჩქაროდ ანნას საწინააღმდეგო გრძნობა


სადღაც განვქრა და ეხლა მხოლოდ განცვიფ-
რებამ შემიპყრო...

გადაწყვეტილი მქონდა, ანნა ალარ მენახა,
მაგრამ დავიძლიე, იმისმა ხორცმა წამძლია.
მშვენიერი ხორცის პატრონია ანნა, მშვენიე-
რისა: ეხლა ანნა-კი ალარ მომწონდა, იმისი
ხორცი...

—
 შინაური გავხდი. ანნა უჩემოდ ვეღარა
სძლებს, სულ ჩემთან არის და მე კიდევ იმას-
თან...

ქაიხოსრო?..

ქაიხოსრო-კი, როდესაც ანნასთან ერთად
შნახავს, კმაყოფილებით ხითხითებს და ხითხი-
თებს...



„...მხრები-ლა ავიჩეჩე...“

(ეტიუდი)

„...გადასცემ-გადმოსცემო,—მწერ:—და აბ-
და-უბდა, გადასკუპდას მომითხრობო...“ სა-
მართლიანად მისაყვედურებ, ძმაო ვარლამ. მარ-
თლადაც, წინა წერილში მოვდეჭი და გავიძახო-
დი: ვიტანჯები... სული მეხუთება... არიქა წყა-
ლიო... და სხვას არაფერს. რამ გამოიწვია ის
სულის კვეთება?.. რამ მიმიყვანა ამ ზომამდის?..
ამაზე კრინტიც არ დამიძრავს... გაუგებარი
იქნებოდა, მაშ. რა! არ მეკიუინა, ძმაო, წინან-
დელი წერილი, რაღვანაც ის შედეგი იყო დი-
დის ხნობით შეგუბებული ტანჯვის გადმონახე-
თქისა. ხომ კარგად იცი, როცა წყალი გადმო-
ხეთქავს და წინ ვაკე ადგილი უძევს, ათას ტო-
ტად გაიყოფა, განაწილდება და უგზო-უკვლოდ
გაიფანტება?! მეც ისე დამემართა. ვაგუბე, ვა-
გუბე ხმის ამოუღებლად ჩემი ტანჯვა და, რო-
დესაც უკიდურესობამდის მიაღწია, ჩემდა უნე-
ბურად გადმოხეთქა, აქა-იქ დაიქსაქსა და თავი
თავს ვეღარ მოვუყარე. აი, ამისათვის იყო ისე
გაუგებარი. ჯერ ეხლაც ვერ შემიკრებია, ვერ

დამილაგებია და, აბა, მაშინ რაღა იქნებოდა. არ ვიცი, ყველაფერს დაწვრილებით მოგწერ, თუ არა, მაგრამ ყველაფერს ნათლად დაგანახვებ. ჩემი განჯრახვა და სურვილი ეს არის. ნამეტნავად, მინდა, ყველაფერი ნათლად დაგანახვო; რადგანაც მხოლოდ მაშინ მიმიხვდები. გეყურება, მინდა მიმიხვდე-მეთქი და თანამიგრძნო...

„არა! ეხლა არ ვეძებ თანაგრძნობას. ამისთვის არ გწერ: თანამიგრძნობ თუ არა—სულ ერთია. მე გამოთქმა მომინდა. შენმა სიტყვებმა: გამომულავნება ტანჯვას გაგინახევრებსო, ისე ამაკანკალეს, როგორც მშიერ კაცს ყველისა და პურის დანახვა. მე მგონია, მარტო გამომულავნებაა საკმარი, რომ ტანჯვა შემიმსუბუქდეს და იმას-კი აღარ დავსდევ, გამკიცხავ, თუ თანამიგრძნობ.

„ერთი ეს კია, შენი სიტყვები: „მე გამოუსადეგარი წერილების და ბარათების კალათას დამამსგავსეს: ვინც არა მგონია, თავის დარდს და ვარამს მესვრის და მიმატოვებს, თითქოს მოვალე ვიყო ყველას მოვუსმინო და მისი საიდუმლო მე ვატაროვო,“ მაგონდება და ცოტა არ იყოს მაღუმებს. მით უმეტესად არ მეხერხება გამოთქმა, რომ ჩემი მტანჯველი საგანი ზოგადი არ არის, სხვისთვის სულ უმნიშვნელოა;

მხოლოდ მე შემეხება და გრძნობაზე არის აშენებული. აბა, რა სასიამოვნო იქნება შენ-თვის ამისთანა დროს ამის მოსმენა! ვის რაღ ესიამოვნება ეხლა ჩემი, ვიღაც მოხელის, კერძო ტანჯვა მოისმინოს, როდესაც ყველა, თითქმის მთელი საქართველო გაფაციცებით თვალყურს ადევნებს ბანკის საქმეს, ადევნებს კი არა, მხურვალე მონაწილეობას იღებს ჭავჭავაძისა და მაჩაბლის ერთმანეთის თავ-პირის მტვრევაში.

„დარწმუნებული ვარ, შენც მხურვალე მონაწილეობას იღებ და ჩემ „აბდა-უბდა“-ს მოსასმენად, წაკითხვისთვის დრო აღარ გექმნება.

„მაგრამ, ვარლამ, გეფიცები ძმობას, გწერ მხოლოდ იმისთვის, რომ შენვე მაპედვინებ, შენვე მეუბნები წერილით: უეჭველად მომწერე, რა გტანჯავსო…“

„იმედია, რადგანაც შენვე მთხოვე, წაიკითხავ და არ დამტინებ, არ გამკიცხავ, როდესაც ჩაიკითხავ ბოლომდის, რომ ამისთანა დროს რაღაც გრძნობაზე, სიყვარულზე გწერ…“

„ეს კი მინდა გითხრა, რომ რანაირი დროც უნდა იყოს, თუ გატაცებული ხარ ერთი საგნით, შენი არსება შეუბყრია ამ საგანს, ლურსმანივით ტვინში ჩაგსმია და ყოველ წუთს თვის არსებობას გაგრძნობინებს, მერწმუნე, მა-

შინ, ჰავკავაძისა და მაჩაბლის მჭევრ-მეტყველება კი არა, ქვეყანაც რომ ინგრევოდეს, თავს არ მოგაფხანინებს...

„ეს ხომ სულ ერთია, რანაირი ხასიათისაც უნდა იყვეს საგანი. ყველაზე უფრო ძნელი ის საგანია, რომელიც გრძნობაზე არის დაფუძნებული. მაშინ ნამდვილ მონად გარდაიქმნები. კაცი თავიდანვე უნდა ეცადოს, რომ ამ წერტილამდის არ მიაღწევინოს და თუ მიაღწევინა, მაშინ, დამეთანხმე, გასაკიცხი არ არის...“

„მიხვდი?.. ახ, რანაირად მინდა მიხვდე... შეიგნო... მხოლოდ მაშინ თანამიგრძნობ და...“

„გავაბი!.. მინდოდა კალმის აღებისათანავე დამეწყო საგანზე ლაპარაკი და მე კი, ვინ იცის, რაებს არ ვჩმახავ!.. მიზეზი ისევ ის არის: გონება ვერ მომიკრეფია და ვერ დამიწყვია...“

„პირდაპირ მოგწერ: ამ ორი თვის შემდეგ ჯვარს ვიწერ...“

„აი მიზეზი, აი ის გარემოება, რაც მე სულს მიხუთავს, რაც სამსალას მასმევს და მკლავს...“

„გიკვირს განა? თვალ-წინ მეხატება შენი განცვიფრებული სახე და შენი წაბუტბუტება: „გაგიუებულა! სხვა მოუთმენლად მოელის ამ ნეტი წუთს და ის-კი რას გაიძახის.“ მკაფიოდ მეყურება...“

„დიალ, სხვა მოუთმენლად მოელის და მე-კი მტანჯავს. რაც ახლოვდება ეს წუთი, მით უფრო ტანჯვა მიცხოველდება.

„რა არის ამისი მიზეზი?

„არ ვიცი. ვიცი, მაგრამ დარწმუნებული არა ვარ. ყველაფერს თავიდან მოგწერ, მოგწერ უტყუარ აშავს და მერე შენ თითონ დაასკვენ. მაშ ეგრე:

I

„ბედმა თუ უბედობამ ამ ორი წლის წინად, როგორც იცი, ქ. ქ. მარგუნა საცხოვრებლად. ნაცნობი არავინ იყო ჩემი და თვისი ხომ სულ არავინ.

„მატარებელი უახლოვდებოდა. მე სარკმელს არ ვშორდებოდი, ისე გამიტაცა ბუნებამ: ტყე, ველი, ხევი, ლელე, მინდორი გაფურჩქვნილი წუთი-სოფელივით მიჰქროდა ჩემ თვალ-წინ და მხოლოდ ერთს, ნაზის სიმშვენიერის, შთაბეჭდილებას სტოვებდა ჩემში; მინდოდა დავმხბილვიყავ და დავკონებოდი ამ ნაზ სიმშვენიერეს, მაგრამ შეუძლებელი იყო: მატარებელი დაგადუგით მიგნულავდა და სურვილი სურვილად რჩებოდა...

„მატარებლიდან სიგნალი მისცეს. მივუახ-
ლოვდით სადგურ რიონს.

„რალა მრჩებოდა? სულ ერთი უამი ან
უამ-ნახევარი. სადგური სავსე იყო ხალხით. აქ
შეხვდებოდით თავადს, აზნაურს და გლეხს.
ყველანი-კი წარმტაცის ზრდილობითი მიხვრა-
მოხვრისანი იყვნენ, ტკბილად, გენაცვალობით
მოსაუბრენი...

„ახ, რომ შემეძლოს, ყველას გადავეხ-
ვევი და გულში ჩავიკრავ-მეთქი, ვიძახდი
უსიტყვოდ და გაფაციცებით ყურს ვუგდებდი
და თვალს ვადევნებდი იმერეთის ძეთ.

„ბედნიერად ვრაცხდი ჩემ თავს, რომ ბე-
დმა ამ ხალხის შორის მარგუნა ცხოვრება. მინ-
დოდა ჩქარა მივსულვიყავ, დავბინავებულვიყავ,
რომ სულით და ხორცით მივსვენებოდი ამ
ზრდილ საზოგადოებას, ჩემ საუკეთესო მოძმეთ...

„მაგრამ... არ ვიცი, მე ვიყავ დამნაშავე
თუ საზოგადოება, მალე, სულ მალე მივატოვე
და ჩემს ოთასს და ბუნებას დავუმეგობრდი.
მგონი, მე ვიყავი დამნაშავე. მე პატარაობიდანვე
განმარტოებას ვეძებდი და ეხლაც განვმარტოვ-
დი. ყოველთვის ბუნებას ვიმეგობრებდი, ეხ-
ლაც ბუნებას მივესვენე და ხშირად, ძალიან
ხშირად რიონის პირას ღამეს ვუთევდი. ვსცდი-

ლობდი, შემესწავლა იმისი ენა და გამეგო საი-
დუმლო მისი მოთხრობა. მაგრამ როდესაც-კი
ვიტყოდი: „აი ეხლა-კი მივხვდი, ეხლა-კი და-
ვირბენ გონების თვალით ყოველ იმის საიდუმ-
ლოების ჯურლმულს, ეხლა ყოველივე ცხადი
იქნება ჩემთვის“ და გადავხედავდი მჩქეფარე
ტალღებს, რომ გულდასმით ყოველივე ამომე-
კითხნა, მაშინვე უარეს წყვდიადით მოიცვოდა,
მოერლვეოდა ძირი და ქვევით, ქვევით სიბნე-
ლით მოცულ უფსკრულს მიქანავდა, და უფრო
გამოურკვეველ, ჩახვეულ, მიუკარებელ და თვალ-
მიუწდომელ საიდუმლოებად მრჩებოდა...

„ — არ გადავარდეთ!.. — შემომესმა ნაზი,
გულმტკივნელობითი ხმა, როდესაც მე წამო-
წოლილი რიონის მჩქეფარე ტალღებს დავსცე-
როდი და თან-და-თან წინ ვიწეოდი, რომ უფ-
სკრული გაქანებული რიონის ძირისთვის თვალი
მიმეცოლებინა.

„ავიხედე ზევით და...

„ახ!.. ჩამავალი მზე ზურგიდან მოჰქცეო-
და და მთლად სხივებში გაეხვია თმა-გაშლილი
ასული, მეტად მშვენიერი არსება, რომელიც
დალვრემილის სახით შემომცეროდა და თით-
ქოს საყვედურს მეუბნებოდა...

„ — ვინა ხარ, მშვენიერო, მოხვედი სითა,

ხარ ამ ქვეყნისა თუ ციური, მოფრინდი ცი-
თა?..“—ვახტ. ორბელიანის სიტყვებით*) ჩემდა
უნებურად დავეკითხე და მუხლ-მოდრეკით ხე-
ლები გავუწოდე. ჩამავალი მზის სხივები-კი,
ასულის სხეულიდან უკუქცეულნი, ისრებივით
იფანტებოდნენ და ისე მეჩვენებოდნენ, თით-
ქოს ასულია სხივოსანი და ის არის წყარო ამ
სხივებისა...

„განცვიფრებული ვიდექ მუხლ-მოდრეკით
და ხელებ-გაწვდილი შევცქეროდი უცხო არ-
სებას...

„— ყმაწვილო, ფეხზე აღეჭით!.. — ლიმი-
ლით მითხრა და ხელი წამავლო.

„მეც ავყევი. შევხედე მზეს და მოჩვენება
განქრა.

„ჩემ გვერდით იდგა მეტად მშვენიერი
გულჩინა, რომელიც რამდენჯერმე შემსვედრია
ქუჩაში და კიდევაც ვიცოდი იმისი ბინა, რად-
განაც პირველ შეხვედრაზე ისე წარიტაცა თა-
ვის სიმშვენიერით ჩემი სული და გული, რომ
ჩუმად მივყევი და დავიხსომე იმისი ბინა...“

„გამეხარდა, რომ ეს გულჩინა იყო და არა
ციური არსება, რაღანაც ციური ცისკენვე გას-

*) „იმედი,“ პოემა ვახ. ორბელიანისა.

წევდა და ეს-კი ქვეყნად იქნებოდა, და მეც შემთხვევა მექნებოდა, დავმტკბარვიყავი ამის სიმ-შვენიერით.

დიალ, გამეხარდა, რადგანაც მიუწდომელ არსებად ვრაცხდი და ეხლა-კი თავის ფეხით მოვიდა ჩემთან და ასე თანაგრძობა გამოიჩინა.

„ — გულჩინა, ნუთუ თქვენა ხართ?!.. — დავეკითხე, როდესაც განცვიფრებიდან გამოვერკვიე.

„ — რა იყო, არ მომელოდით?!.. მე აქ დავ-სეირნობდი, უეცრად დაგინახეთ ნახევრად გა-დაკიდებული. შემეშინდა, გამოვიქეცი, ისე მო-ვრბოდი, რომ ქუდი ქარმა მომგლიჯა და ი- თმაც გამეწეწა... — დარცხვენით, თითქოს ბო-დიშის მოხდით ჩაილაპარაკა და თავი დახარა... „

„ — ვმაღლობ შემთხვევას, რომ...

„ — წავიდეთ! აგერ მზეც ჩავიდა. გამაცი-ლეთ... — იღარ დამასრულებინა სიტყვა გულჩი-ნამ და გაბრუნდა ქალიქისაკენ...

„ — განა შეიძლება ამით გათავდეს ჩვენი ნაცნობობა? — დავეკითხე, როდესაც სახლს მივუ-ახლოვდით და უნდა გამოვმშვიდებოდი.

— რათა, ხშირად შევხვდებით...

„ ცოტა არ იყოს, უსაზოგადოებამ შემა-წუხა. ხშირად, როდესაც განმარტოვებით ვი-

ყავ, ჩემი გარემოებით არ ვიყავ კმაყოფილი, ხშირად კი არა, თითქმის ყოველ წამს ეულობას ვგრძნობდი, და ჩემი არსება თხოულობდა სულით და ხორცით შეერთებას, დაკავშირებას ისე, რომ ორნი ერთ არსებად ვყოფილვიყავით. წინადაც ეს მემართებოდა, როდესაც ჯერ არ გამეწყვიტა კავშირი საზოგადოებასთან. იმათი სული, გული არ მაკმაყოფილებდა და მეც... იქნება ეს იყო მიზეზი, რომ გავშორდი საზოგადოებას...

„— მაშ ნებას მაძლევთ, ვიცნობდეთ ერთმანეთს?.. — სიხარულით, სულ მოულოდნელის სიხრულით დავეკითხე გულჩინას.

„მევე გამიკვირდა ჩემი სიხარულისა და დარცხვენით თავი ჩავლუნე, რომ არ შეენიშნა.

„— ნებას კი არა, გთხოვთ კიდევაც, დაახლოვებით გავიცნოთ ერთმანეთი. — მითხრა და ხელი გამომიწოდა.

„მე მინდოდა მეთქვა: „ცოტახანს ბულვარში გავიაროთ-მეთქი,“ მაგრამ გავჩუმდი და ხელი გავუწოდე.

ბულვარის მოგონებაზე ტანში ურუანტელმა დამიარა და, მეგონა, გულჩინას ბულვარის ხსენებით შეურაცხყოფას მივაყენებ-მეთქი. ამის

გამო ჩემდა უნებურად ენა ჩამივარდა და გამო-
ვემშვიდობე.

„შენი არ ვიცი და მე-კი ბულფარი რა-
ღაც უტვინობის ბუდედ, სამაჭანკლო აღგი-
ლად მიმაჩნია.

„ჩემზე ასეთი შთაბეჭდილება მოახდინა
და არ ვიცი, რამდენად მართალია: იქნება
ესცდებოდე და არ დავიჟინებ...

„დავბრუნდი სახლში. მთელ ლამეს გულ-
ჩინა სხივებში გახვეული მედგა თვალწინ, და
არა მჯეროდა, თუ ყოველივე ზევით აღწერი-
ლი ამბავი ცხადლივ მოხდა...

„ერთი კვირა გავიდა და მე გულჩინა ვე-
ღარ ვნახე... რამდენჯერმე ავუარ-ჩავუარე იმის
სახლს, მაგრამ ტყუილად, გულჩინას თვალიც
ვერ მოვკარი...

„ქვესკნელს ჩავარდა თუ ცაში აფრინდა!“
— გავიძახოდი და გონს ვერ მოვდიოდი...

„მზის ჩასვლისას ხომ ყოველთვის რიონის
სტუმარი ვიყავ და იქ გულჩინასაც მოველოდი...

„რად მემართებოდა ეს?!.. რა იყო მიზე-
ზი, რომ ასე გაიტაცა ჩემი გონება, რომ რიო-
ნის რისხვა-გმინვა აღარ მეყურებოდა და იმის
ბაასისთვის ამ ხნის განმავლობაში ერთხელაც
ყური არ დამიგდია?!.. არ ვიცი...

„ყოველ წამს, როდესაც-კი ნაცნობ რი-
ონის პარას ვიყავი, გადავეკიდებოდი ხოლმე,
რამდენადაც-კი შესაძლო იყო, წყლისკენ ვიწევ-
დი, თითქოს გულ-მოდგინედ თვალს ვადევნებო,
მაგრამ ყური და თვალი სხვაგნით მქონდა.

„ან ეხლა და ან ეხლა გაისმის იმისი ხმა და
ისევ ისე სხივებში გახვეული თვალწინ წარმო-
მიდგება,“ — ვფიქრობდი, მაგრამ ამაოდ. გულ-
ჩინა თითქოს სამუდამოდ განჰქრა ჩემთვის...

„ხა!..“ — ბავშვური სიხარულით წამოვიძა-
ხე და ტოკვა დავიწყე, როდესაც მეორე კვი-
რას რიონისკენ მივდიოდი და შორი-ახლოს
გულჩინას თვალი მოვკარი.

„არ მინდოდა, რომ გულჩინას შეემჩნია
და ამისათვის თავი შეტიშაგრე. ვითომ არც-კი
ვხედავდი, ისე წავედი იმისკენ.

„— თავის დასახრჩობად ხომ არ მიღიხართ
რიონისკენ? — შემაყენა გულჩინამ, როდესაც
თავ-ჩაშვებული დავუპირდაპირდი.

„— ახ, ვერ შეგამჩნიეთ!.. — ვითომ შეკ-
რთომით წამოვიძახე და შემდეგ ხელის გაწდო-
მით კითხვაზე ვუპასუხე: — იმედია, თქვენ და-
მიხსნით.

„— დიდის სიამოვნებით, მაგრამ თქვენ-კი
გულცივი ყოფილხართ.

„— ოოგორ?!;

„— ერთი კვირა მეტი ავად ვიყავი და ოქვენ
ერთხელაც არ მიკითხეთ...

„— ოქვენ ავად იყავით?!

„— რას გაიკვირვეთ?

„— გავიკვირვე კი არა...

„— ოტომ არ დაათავებთ?

„— გულჩინავ! — უეცრად კილო ჩემდა უნე-
ბურად შემეცვალა და აკანკალებულის ხმით
დავიწყე: — რომ მცოდნოდა, ვინ თავმკვდარი არა
გნახავდით, გინდაც კეტით გამოვეგდე თქვენებს.
ხომ თქვენები არ მცნობენ? ამას არ დავერიდე-
ბოდი... არ მოვერიდებოდი მხოლოდ ერთის
პირობით, თუ-კი თქვენ საწყენად არ დაგრჩე-
ბოდათ.

„— საწყენად რომ დამრჩენოდა, არც გისაყ-
ვედურებდით.

„არ მახსოვს, ოოგორ მოხდა, ოომ ამ
ლაპარაკში წავედით და ნაცნობ რიონის
პირს წავადეჭით. მაშინ-ლა მივიხედ-მოვიხედე
და ძლიერ გამიკვირდა. არა ნაკლებ გულჩინას
უკვირდა.

„— თვით განგებამ წამოგვიყვანა აქეთ, რომ
ის ნეტარი ჩვენება გამიმეორდეს! — წამოვიძახე
და ალერსით შევხედე გულჩინას.

„— თქვენ უნდა კლდეს გადაეკიდოთ, რომ
ჩვენებამ თავისი სახე მიიღოს.

„— ამ წულსავე! — წამოვიძახე და საჩქა-
როდ კლდის ნაპირს მიველი, რომ გადავკიდე-
ბულვიყავ.

„— რას სულელობთ! .. — ისე გულ-მტკივ-
ნეულობით წამოიძახა და საჩქაროდ ხელი დამი-
ჭირა, რომ მე სულ დავიბნიდე, თვალები სი-
ხარულის წყლით ამევსო და...

„მადლობის გადახდის ნიშნად უნებურად
ხელი ისე მოვუჭირე, რომ იმისმა თითებმა ჩემ
თითებს შუა ღრაჭანი გამოსცა.

„უთუოდ ძალიან ეტკინა თითები, რომ
გულჩინა წელში გადიხარა და ოდნავ შეჰქივლა.

— მაპატიეთ, მაპატიეთ! — დაბნევით წამო-
ვიძახე, როდესაც შეჰქივლა და თითებს ოდნავ
სრესა დავუწყე, რომ შეყენებული სისხლი მო-
ძრაობაში მომეუვანა.

„— გაპატივებთ მხოლოდ მაშინ, როდესაც
ხელს მომირჩენთ. — მითხრა გულჩინამ.

„— როგორ?

„— თუ-კი ტკენა იცით, მორჩენაც უნდა
იცოდეთ...

„— ვიცი, მაგრამ... — არეულად ვუთხარი
ცოტა ხნის სიჩუმის შემდეგ.

„— მაგრამ რა?

„— მაგრამ ისა, რომ ამ საშუალებისათვის
ვერ მიმიმართავს.

„— რა საშუალებაა? — დამიუინა გულჩინაშ.

„— ბავშვი რომ იტკენს რასმეს, მაშინ
ნატკენ ადგილს დედა ან ძიძა რას უშვრება?!
— დავეკითხე და თან ხელს ზევით ვეწევოდი.
„— ოჭ, ჩემო ძიძავ, მომირჩინე ხელი!..
— სლუკუნით მომმართა იმან.

„— მოგირჩა ეხლა, ჩემო პატარავ, ხომ აღა-
რა გტკივა?... — ვეკითხებოდი, როგორც ძიძა და
თან ნატკენ ხელს ვუკოცნიდი.

„— ჰო, ჰო!..

„— მეორე ხელსაც დავუწყე კოცნა, მაგრამ
გულჩინამ უკან გასწია და ლიმილით შემოძახა:

„— ძიძავ, ეგ ხელი ხომ არა მტკივა?

„— განა არ შეიძლება გატკინოთ?!

„— ეჭე!... — თავი გაიქნ-გამოიქნია და ხელი
მხარზე დამადო, რომ ახლოს არ მივეშვი.

„— ასე ვიდექით დიდხანს. ვგრძნობდი იმის
ხელის სითბოს მხარზე და ელვასავით ტანში
მივლიდა. დამასუსტა, მომქანცა ამ სითბომ, ნე-
ტარმა სითბომ. მგონი, ესევე ემართებოდა იმა-
საც, რომ ფერი თან-და-თან ეცვლებოდა; რაც

სიმშვერიერეს უათკეცებდა, და პირ-შემცერს
გონებას მხდიდა...

„ქუჩდა და მრისხანებდა რიონი... ესროდა
თავის ტალღებს იმ კლდეს, რომელზედაც ჩვენ
გადახვეულები და ჩაკონილები ვიდექით...

„არა გვეყურებოდა-რა. სააჭაოს იმ წამს
ჩვენთვის მხოლოდ ერთი, დიადი გრძნობა შე-
ადგენდა, რომლითაც ორნივე ვიყავით გამსჭვა-
ლულნი, ერთ არსებად ვიყავით გარდაქცეულნი
და ამისთვის ნეტარნი.

„ოხ, რა ნეტარებაა, როდესაც გვინია
მაინც, რომ შენი არსება მეორეს შეუერთე,
და ორნი ერთ არსებად ხართ გარდაქმნილნი,
რომ „შენ“ „ის“ ხარ და „ის“ კიდევ „შენ“...

II

„სწორედ ასეც მომივიდა. მეგონა, მხო-
ლოდ მეგონა, რომ გულჩინაც იმასვე ჰერძნო-
ბდა, რასაც მე. ეს იყო პირველი და უკანას-
კნელი. მხოლოდ მაშინ გამოვცადე ნეტარება
და იმისთვის, რომ მწამდა, რო გულჩინაც იმასვე
ჰერძნობდა, რასაც მე.

„სულ ერთი წუთის შემდეგ გამოვთხიზ-
ლდი...

„—გულჩინავ, მიყვარხარ, მიყვარხარ და შენ
კიდევ კითხვას არ გაძლევ: „გიყვარვარ თუ არა,“
რადგანაც, შენი მოქმედება უსიტყვოდ მიმტკი-
ცებს.—ვუთხარი მე, როდესაც ტუჩი-ტუჩის გავა-
შორეთ და ხელი-ხელს ჩავიდებულები აღგზნებით
ერთმანეთს შევსცეროდით.

„—გიხარიანთ? მე არ მინდოდა გამეგებინა
თქვენთვის ჩემი გრძნობა, მაგრამ ეგ არის ჩვენი¹
უბედურება, რომ ვერ დავმალავთ და კაცებიც
სარგებლობთ.—დალონებით მითხრა გულჩინაშ
და თავი ძირს ჩაჰვიდა.

„—როგორ?!

„—შეურაცხყოს მიაყენებთ და მერე ეტ-
ყვით: უკაცრავად, კი არ მიყვარდით, გამიტა-
ცევითო. ამით გაათავებთ და მიატოვებთ ქალს.

„—მე მაინც ვერ მიგიხვდით!

„—თქვენც სხვებს ჰგვანებიხართ და ამის-
თვის მეუბნებით: მე მაინც ვერ მიგიხვდითო.

„—მაშ რა უნდა მეთქვა, გულჩინავ, გარ-
კვევით მითხარით?—სიტყვა გავაწყვეტინე და
ხელი-ხელს უფრო მოვუჭირე.

„—არაფერი, წავიდეთ!...—მოკლედ მიპა-
სუხა და გზას გაუდგა.

„მეც ამოვუდექ გვერდით და გაჩუმებული
გავყევო.

„რა უნდოდა ეთქვა: შენც სხვებს ჰგვა-
ნებიხარო... მაგას არ მეტყოდიო...“

„ვფიქრობდი და მაინც ვერ მივხვედრი-
ლვიყავ... ხომ არა ეწყინა-რა? ვეკითხებოდი
ჩემ თავს და მევე ვაძლევდი პასუხს: რა უნდა-
სწყენოდა... მხოლოდ ნეტარებას იგრძნობდა,
როგორც მე, და ისევე ბედნიერად უნდა სთვლი-
ლეს თავს, როგორც მე...“

„— გიყვარვარ?! მე დიდი ხანია თვალს
გადევნებდი, მომწონდი ძალიან, მაგრამ ვერ
ვბედავდი შენს გაცნობას. მეშინოდა...“

„— გულჩინავ!..—იმის სიტყვებით სანთე-
ლივით დამდნარმა წამოვიძახე და ლმობიერად
დავუწყე მზერა.— მაში გიყვარვარ? ჰა, ჰა?!“

„— ჩემო გაიოზ, ჯვარს როლის დავიწერთ?
— თვალის კაკლების გადატრიალებით დამეკი-
თხა და თავი დახარა...“

„გამოვფხიზლდი. თითქოს ცივ წყალში ჩამა-
ყურყუმელავესო, ისე იმოქმედეს იმისმა სიტყვე-
ბმა. ეხლა-კი მივხვდი, რას ნიშნავდა იმისი სიტ-
ყვები: „თქვენც სხვებს ჰგვანებიხართ და...“ მეწ-
ყინა, საშინლად მეწყინა. გულჩინა მე არ მეკუ-
თნოდა და იმ წამსაც-კი, როცა მეგონა: „ჩემი
არსება იმის არსებას შეაღგენდა და იმისი კიდევ
ჩემსას,“ მე არ მკუთნებია, უთვალთმაქცნია.“

„ტყუილია?! ჰა?.. განა გულწრფელი გრძნობა იკითხავს ჯვარის-წერას?!

„ჯვარის-წერა და ყოველი მაგვარი ჩვეულება თავის თავად შეუმჩნევლად მოჰყვება გულწრფელ სიყვარულს.

„უეცრად, როგორც გწერ, გამოვთხიზლდი და დავინახე ჩვეულებრივი ქალი, გასათხოვარი, რომელიც ცდილობს ბადეში გააბას საქმრო. ამ ქალს გულჩინა ერქვა და არაფრით არ განიჩეოდა მარიამებისაგან, კატოებისაგან, ნინო-ელენებისაგან. იმის კითხვამდის-კი გულჩინა სულ სხვა არსება მეგონა, მეგონა, გულჩინას შეეძლო სიყვარული, სიყვარული უანგარო, გულწრფელი. მაგრამ... აი, სწორედ ეს „მაგრამ,“ რომელიც საცა არა მეონია გამოინასკვება, გადამეღობა წინ და შემაყენა და მაშინვე არ მოვკურცხლე, რომ გულჩინა შორს, შორს დამეტოვებინა, რომ იმისი აჩრდილიც-კი აღარ დამენახა...

„—გაიოზ, მაგრე რად დალონდი?!

„— მე?.. არა, დალონებული არა ვარ!...— დაბნევით ვუპასუხე და თვალი მოვარიდე.

„— ვიცი, ვიცი... განა ტყუილად გითხარი წელან: შენც სხვებსა გევხარ-მეთქი...

„— მე?.. არა და არა!.. ნუ გგონია, მე

უარს ვამბობდე. ჩემი მოქმედება ცხადად გაჩვენებთ ჩემს განძრახვას და აქ სიტყვებს რაღა აღგილი აქვთ.

„— ყველა მაგრე იძახის და ბოლოს-კი გეუბნებიან: როდის გითხარი, შეგირთავო!..

„ყველა, ყველა...“ გეყურება, ვარლამ, რა მითხრა გულჩინამ, „ყველაო...“ ხა, ხა, ხა!.. მეორე საბუთი მომცა, მოვშორებოდი, მაგრამ მე კიდევ, აი, რა ვუპასუხე:

„— გულჩინავ, ყველა მაგას გაიძახის და მე-კი არა, მე საქმე მწამს და არა სიტყვა... გამიგონე, შენ მომწონხარ და რომ არ მომწონებოდი, ისე თავ-დავიწყებით არც მოგეჭცევოდი...“

„— რა ვუყოთ მერე, რომ...

„— ისა, რომ მე შენზე ჯვარს დავიწერ და...“

„— გაიოზ, ოჰ, რა მიყვარხარ!..—ალტაცებით (რა ვიცი, ალტაცებით წამოიძახა თუ არა. გარეგნობით-კი ყოველი იმისი კუნთის მოძრაობა ალტაცებასა ნიშნავდა) წამოიძახა და ლიმილით თვალები მომაპყრა.

„— გულჩინავ, არა გკითხავ: გინდივარ თუ არა, რადგანაც შენი მოქმედება შენს სიტყვებზე მცევრმეტყველად მიმტკიცებს. ჩვენ

ერთმანეთისანი ვართ. ამ წუთს მაინც. გთხოვ, ჯერ ჩვენ შორის დარჩეს... იქნება რა მოხდეს. შეიძლება ცუდი მხრით გავიცნოთ ერთმანეთი, შეიძლება საძაგელი კაცი აღმოვჩნდე და მოისურვო თავიდან მოშორება. ეს უფრო ადვილი იქნება მაშინ, როდესაც არავის ეცოდინება. ხომ იცი, ეხლავე რომ გამოვატხადოთ დანიშვნა, უფრო ძნელი იქნება ჩვენი განშორება, საზოგადოებისა მოგვერიდება.

„— რა კარგი რამა ხარ, ჩემო გაიოზ!..

II

„გულჩინა ამის შემდეგ ჩემად ითვლება. ის ყოველთვის მეუბნება: ჩემო გაიოზ, მე ხომ შენი ვარ და შენიო. გეყურება, შენი ვარო! მართლა ჩემია? იმისი სიტყვები ნამდვილია?! აი რა არის მიზეზი, რომ ვიტანჯვი, რომ სული მეხუთვის. არ ვიცი, ჩემია თუ არა.

„კანონიერად-კი ჩემია. ეს უტყუარია, რომ მე ცოლად გამომყენება და ჯვარსაც დავიწერთ. დღესაც რომ ვუთხრა: წავიდეთ, ჯვარი დავიწეროთო, ის მაშინვე გამომყენება და ჯვარს გადიწერს...

„თითქმის დამთანხმდა. თითქმის კი არა,

მომიწონა კიდევაც, როდესაც მე ვუთხარი: ჯერ ჩვენ შორის იყვეს-მეთქი, მაგრამ, წარმოიღინე ჩემი განცვიფრება, როდესაც შევიტყე, რომ მეორე დღესვე მთელმა ჭ—მა იცოდა.

„ვინ შეატყობინა ეს ამბავი?..

„რასაკვირველია, გულჩინამ. იმის მეტი ვინ იტყოდა, როდესაც სხვამ არავინ იცოდა.

„რამ აიძულა გამოქვეყნება?!

„არ ვიცი. იქნება, როგორც ვფიქრობ, გულჩინამ შემატყო გამოცვლა და ისიც კარგად გაიგო, რომ საზოგადოების ხმისა მერიდება და აალაპარაკა ხალხი, რომ განშორების საშუალება მოესპო, შევებორკე...“

„გულჩინა მეტის-მეტად ლამაზია, კეკლუცია, იმაზე ცუდი არა მსმენია-რა, იმას ყველა სიხარულით ცოლად შეირთავს და რად მოინდომებდა ჩემს შებორკვას?.. რად?..“

„იქნება, მართლა გულწრფელად ვუყვარვარ და სიხარულით სხვებს ახარა თავისი ბედნიერება?!

„ხა, ხა, ხა, ხა, სიხარულით ახარა-მეთქი! რა ნახა ჩემში, რომ შემიყვარა?.. არა, არა და არა, იმას არ ვუყვარვარ!

„ეტყობა, ყოველი იმისი ნაბიჯი იმას მი-

მტკიცებს, რომ იმას არ ვუყვარვარ, რომ იმას ჩემი პატივისცემაც არა აქვს.

„მე რომ გულჩინა გავიცანი, ქვეყანაზე იმის მეტს ვეღარავის ვხედავდი. მინდოდა, ყოველ წამს, ყოველ წუთს იმის გვერდით ვმჯდა- რვიყავ და მარტო იმისთვის მემზირნა.

„თუ-კი მე მემართებოდა ეს, რატომ იმას არა, რატომ ის კი არ სცდილობდა და არა სცდილობს, როგორც მე, რომ ჩემთან ერთად ყოფნის შემთხვევა მოიპოვოს?!

„რამდენი ლამე მითევია იმის სარკმლის ახლო, რამდენჯერ ამივლ-ჩამივლია, რომ თვა- ლი მაინც მომექრა, მაგრამ ამაოდ. ის ან ავად- მყოფობას მოიგონებდა და ან კიდევ მშობლებს მიაწერდა, რომ ისინი უშლიან.

„გეყურება, მშობლები უშლიან! ის კაი მშობლები, რატომ სხვებთან სიარულს არ უშ- ლიან, რომ შუალამემდის ნაცნობ ოჯახში არის ხოლმე და იქიდან ხან ვინ გააცილებს და ხან ვინ?!

„არა, მშობლები კი არა, თითონ არ უნ- დოდა ჩემთან სიარული.

„როდესაც ვკითხავდი, რატომ ხდება ესე, ის, აი, რა პასუხს მაძლევდა: „ჩვენზედ ისეც ბევრს ლიპარაკობენ და ხშირად რომ ვიაროთ,

გაშინ ხომ სულ აგვიკლებენ. მშობლებიც ამის-თვის მიშლიან... ღმერთმა-კი ნუ ქნას და შენ რომ აღარ შემირთო, მაშინ...“

„გეყურება, რას მეუბნებოდა წინად?.. განა ნამდვილი სიყვარული, გულ-წრფელი სიყვარული ასე ილაპარაკებს?!

„ეს კითხვა წინადაც მებადებოდა, მაგრამ მე გულჩინას მაინც ვამართლებდი.

„იქნება, მართლა ვუყვარვარ და საწყა-ლი ვერ ჰბედავს თავის გრძნობის გამეღავნე-ბას, გამოქვეყნებასაო... გავიფიქრებდი ხოლმე, მაგრამ ამავე დროს სხვა წინააღმდეგი აზრი გულს მიშხამავდა: „ჰო, თუ სხვებთან ვერ ჰბედავს და ეკრძალება, როდესაც მარტოკანი ვართ, მაშინ რაღა ემართება?!“

„აფუსრულე თხოვნა. დავიცვი წესი და იმის მშობლებს გამოვუცხადე.

„გულჩინას ამის შემდეგ ყოველ დღე ვხე-დავ და ერთი დღე რომ არ მივიდე, მაშინვე კაცს მაახლებს წერილით და მეკითხება, რა მი-ზეზით არ მიველ იმასთან.

„არა, ვარლამ, უეცრად რა ძვირფასი გავ-ხდი!.. წინად კვირეები გადიოდა, არ ვაგონ-დებოდი და ეხლა-კი ყოველდღე მკითხუ-ლობს...“

„ერთხელ ვუთხარი და ძალიან იწყინა. ერთი კვირა აღარ მიველი და წერილიც აღარ მომწერა, აღარ იკითხა ჩემი ამბავი.

„მეწყინა. მიველი და ვუსაყვედურე.

„—მაკვირვებს შენი საქციელი!..—მითხრა ჩემ საყვედურზე:—წერილსა გწერ, —გწყინს, არ მოგწერ და იმაზედაც მისაყვედურებ.

„მართლაც, სულელობა მომდის. მაგრამ, ვარლამ, შენ გულ-ახდით გწერ და მინდა მიმიხვდე კიდევაც.

„სულელობაა, მაგრამ რომ გაარკვიო, სულელობა არ არის...

„იმის წერილებისა, ბარათების კითხვა მაბრაზებდა და მაბრაზებს იმისთვის, რომ შიგ ვერ ვპოვებ იმას, რასაც ვეძებ. მინდა შევიტყო: გულწრფელად ვუყვარვარ თუ არა და, აი, ამას ვერ ვპოვებ. ყველაფერი სწერია შიგ, ყველაფერი, მაგრამ მე მაინც არა მჯერა, არა და არა. ყველაფერი სწერია, მაგრამ რაღაც აქლია და ეს „რაღაც“ სტრიქონების შუადგან ამოიკვრიტება და მაბრაზებს. აი, ერთი ნიმუში იმ მრავალი ბარათისა, რომლებსაც, არ ვიცი, ისე მოკრძალებით ვინახავ და ისევე მოკრძალებით ვკითხულობ:

„...განა შეიძლება, ჩემო გაიოზ, ეგრე

გულ-გრილობა, რომ დღეს არ მოხველ და არა
ნახე შენთვის მკვდარი, საფლავამდის შენი
გულჩინა? ჩემო თვალის სინათლევ, დღეს უეჭ-
ველად მოდი, თორემ, თორემ, ხომ იცი, აღარ
გაკოცნინებ...“

„ხომ ამოიკითხე, ჩემო ვარლამ?.. მე „თვა-
ლის სინათლეცა“ ვარ, მაგრამ ეს ყველაფერი
„სიტყვებია, სიტყვები და სიტყვები...“

„ახ, ნეტავი იმის სიტყვებს შინაარსი
ჰქონდეს, ვიყვე ამაში დარწმუნებული და მა-
შინ თუნდაც ლუკმა-ლუკმა ამკუწონ, სიხარუ-
ლით, ლიმილით მივეგებები სიკვდილს და თან
გულჩინას სახეს ჩავიტან, იმის არსებით შეივ-
სება ჩემი არსება; ჩემი არსება იმის არსებად
გარდაიქმნება...“

„მაბრაზებს იმისი ბარათები, მტანჯავს, მა-
გრამ ამავე დროს მასიამოვნებს კიდევაც და
მინდა, რომ სულ ვიკითხო, ყოველდღე მო-
დიოდეს იმისაგან ბარათები.

„ამისათვის არის, რომ ისიცა მწყინს, რო-
დესაც იმისაგან წერილები არ მომდის...“

„თუ დარწმუნებული ხარ, — იტყვი: — რა-
ტომ უარს არ ეუბნები და თავს რად იტან-
ჯავო...“

„კიდევაც ეგ არის, რომ დარწმუნებული

არა ვარ. დარწმუნებული რომ ვიყო, გეფიცები, უარის თქმა არ დამეთაკილებოდა, სიხარულით უარს ვეტყოდი და სამუდამოდ განვშორდებოდი. კიდევაც ეგ არის, რომ დარწმუნებული არა ვარ და ამის გამო უარს არ ვეუბნები...

„რად მინდა, რომ მარტო მე მიყვარდეს და იმას კი არა?! ჩემი ცოლ-ქმრობის იდეალი ეგ არ არის, რომ მე მიყვარდეს და იმას კი არა, ან იმას ვუყვარდე და მე არა. .

„არა. ცოლ-ქმარნი „ერთ-ხორც და ერთ-სულ“ უნდა იყვნენ, ორსავე ერთმანეთი უნდა უყვარდეთ...

„დეე, მითხრას: არ მიყვარხარო, და მეც თავს არ მოვიკლავ, არ ჩავაცივდები შემიყვაროს.

„განა არ შეიძლება, ისე მიყვარდეს შორით, დაუახლოვებლივ?

„კიდევაც ამისათვის გწერ ყოველისფერს გულ-ახდით, რომ დამეხმარო და შემატყობინო: ვუყვარვარ თუ არა, გულწრფელია იმისი სიყვარული თუ არა? რომ გულწრფელად ვუყვარდე და ჩემ უარის თქმაზე აუტეხოს რამე თავის თავს, ან თუნდაც ცოტაოდნად მაინც იტანჯოს, ხომ ვეღარ ვიცოცხლებ, სიცოცხლე ჯოჯოხეთად გარდამექნება?!

„ბევრჯერ გადავწყვიტე უარის თქმა, წე-
რილები წერილებზე დამიწერია, მაგრამ მიმი-
ფხრეშია და ნაფხრეწების მთელი ხროვა დამი-
ყენებია, რადგანაც წერილებით უარის თქმა
უხერხსულად მიმიჩნევია და ისევ პირადად გა-
მოცხადება მირჩევნია, მაგრამ... როდესაც მივ-
დივარ მომზადებული, წინადვე აფორიაქებული
და სიტყვა დამზადებული, გულჩინა კარებში
მომეგებება და ტკბილად, ალერსით, თითქოს ცო-
ტათი საყვედურითაც შეხამებული სიტყვებით
მომმართავს: „ჩემო ტეტიავ, კიდევ გამჩვერით
მოხვედიო.“

„საკმარისია ეს სიტყვები, რომ ჩემი დამ-
ზადებული სიტყვა გააქარწყლოს, გააქროს, დაა-
მუნჯოს და მომაჯადოვოს.

„ენა აღარ მემორჩილება ხოლმე და მხოლოდ
უსიტყვოდ ვკოცნი და ვკოცნი, თითქოს ამ
კოცნით მსურდეს ჩავაქრო ის ცეცხლი, რა
ცეცხლიც გულში მიბრიალებს და დავახშო ყო-
ველივე გულჩინას წინააღმდეგი აზრი... .

„რიონი რას შეედრება, რასა?! რიონი
კი არა, ზღვაც არ შეედრება გულჩინას თვალებს.
გულჩინას გაცნობამდის თუ რიონის ტალღებს
ჩავკირკიტებდი და ვცდილობდი იმის საიდუმ-
ლოს ამოცნობას, ეხლა გულჩინას თვალებს ვა-

ცეცლები, მაგრამ სადაა... სადა?!... წყვდიადია ჩემთვის იმისი ბუნება! იოტის ოდენაც ვერა შემიტყვია-რა!..

„ვარლამ, გენაცვა ვარლამ, დავიბენი, თავ-ბრუ მესხმის, ველარა გამიგია-რა, დამიხსენი!..

„შენი გაითავი.“

23 მაისს 96 წ.

ქ. ქ...

IV

წავიკითხე ბოლომდის. ერთხელ კი არა, ორჯელაც, მაგრამ ვერა გავიგე-რა და, აბა, რა პასუხს მივწერდი, თუმცა-კი მინდოდა მიმეწერა რამ, რადგანაც გაიოზი ჩემი კარგი მეგობარია და იმისი ტანჯვა ჩემ ტანჯვად მიმაჩნდა.

თავი გავიქნ-გამოვიქნიე, მხრები ავიჩეჩე და წერილი გადავდე იმ განზრახვით, რომ ერთი კიდევ წამეკითხა და შემდეგ ისე მიმეწერა პასუხი. მაგრამ რაკი გადავდე წერილი, ხელში ალარ ამილია. ერთ ორ დღეს კიდევ მახსოვდა და მერე-კი სულ გადამავიწყდა, რადგანაც ისე ვიყავი გართული „ბანკობიანით“, რომ წერილი კი არა, პურის ჭამაც მავიწყდებოდა...

საზოგადო თუ კერძო კრებაზე დასწრება—
გამ ისე გამაძება, რომ ბანკის გარდა ქვეყანა-
ზე არსებობდა კიდევ რამე თუ არა, აღარ ვი-
ცოდი. ორნი ერთმანეთს რომ შევხვედრილვი-
ყავით, მაშინვე ილია და ვანოზე დავიწყებდით
გაასს და ლანძლვა-კრულვით ვიხსენიებდით მო-
წინააღმდეგეს, თუ ორნივე ერთის მომხრენი
ვიყავით, წინააღმდეგ შემთხვევაში-კი წავცვი-
ვოდით და თითქმის ყელში ვსწვდებოდით ერ-
თმანეთს, თითქოს ერთმანეთის მოსისხლე მტრე-
ბი ვყოფილვიყავით.

აბა, ამისთანა გამწვავებულ დროს გაიოზი
რალას მომაგონდებოდა, გინდაც გაიოზი ჩემ
ბუნებად ყოფილიყოს? იქმნება სულაც არ მო-
მგონებიყოს და მიმევიწყნა, რომ თითონვე არ
მოევონებინა.

სწორედ იმ დღეს, რა დღესაც უკანასკნე-
ლი კრება გათავდა და შინ დავბრუნდი, ცო-
ტა ხნის შემდეგ მოსამსახურემ ვინაობის ბარა-
თი შემომიტანა.

დავხედე და მაშინვე კარებისაკენ გავქანდი.

— არა გრცხვენიან, ბიჭო, ჩემთან რომ ბა-
რათებით მოდიხარ?!—ვეუბნებოდი და თან ვე-
ხვევოდი.

— რა ვქნა, ბიჭმა მკითხა: ვინა ხარო,

და მეც ბარათი შემოგიგზავნე. — დაღვრემით მი-
პასუხა გაიოზმა და წინ გამიძლოლა.

ძალიან მეწყინა, რომ პირდაპირ ჩემთან
არ მოვიდა და სასტუმროში ჩამომხტარიყო.

გაიოზი და მე ერთად შევიზარდენით, გა-
ნუშორებლები ვიყავით და ძალიანაც გვიყვარდა
ერთმანეთი. ჩვენი ყოველი წინად განუყოფელი
იყო, და ეხლა პირდაპირ ჩემთან არ მოვიდა.

სულ ჩამფუფქა ამ გარემოებამ, მაგრამ კი
ვერა ვუთხარი-რა სასაყვედუროდ, რადგანაც
მომავონდა იმისი წერილი და ამ დრომდის უპა-
სუხობა...

გაიოზს ცოტათი მორიდება უყვარდა
შინვე და ეხლა მიზეზი ჰქონდა უფრო მომრი-
დებოდა. ისეთი საიდუმლო მანდო, ისეთ წუთს
დამეკითხა და რჩევას მთხოვდა და, რასაკვირ-
ველია, ჩემი უყურადლებობა რომ დაინახა, მო-
მერიდებოდა.

— ქმობას გეფიცები, — დავიწყე სულ უად-
გილოდ თავის მართლება: — განზრახ...

— ქმარა, ქმარა, ჩემო ვარლამ, ვიცი, რაც
გინდა სთქვა. მე სულაც ფიქრად არ მომსვლია
გისაყვედურო რამ და გაგამტყუნო, რომ პა-
სუხი არ მომწერე.

— მაშ რას ნიშნავს, რომ პირდაპირ ჩემ-

თან არ მოხველი და ეს ვინაობის ბარა-
თიც?..

— ვინაობის ბარათზე წელან გიპასუხე და
მეორეზე-კი ეხლა გეტყვი: პირდაპირ შენთან
იმისთვის არ მოვედი, რომ ვფიქრობდი, იქნე-
ბა შინ არ დამხვდეს და აქა-იქ ხეტიალს-კი
სასტუმროში ჩამოხტომა ვარჩიე.

— მაშ ეხლა ჩემთან გადმოხვალ, ჰა?..

— გადავეხვიე და ვაკოცე.

— რასაკვირველია.

— რა გადაწყვიტე? — ჩემდა უნებურად
შევეკითხე და მაშინვე-კი ენას ვიკბინე...

— რაც გადაწყვეტილი მქონდა: ჯვარს
დავიწერ მარიამობის თვის გასულს. მეტის-მეტი
სისულელე მომდიოდა, რომ ვცდილობდი შე-
მეტყო, გულ-წრფელად ვუყვარვარ თუ არა.
ეხლა დავრწმუნდი, მართლაც რომ ვუყვარდე, ეს
ჩემთვის გაუგებარი იქნება. უფრო დიდი სისუ-
ლელე ჩავიდინე, რომ შენ რჩევას გთხოვდი...

— აკი არ გემდურებიო... .

— მე მაინც მაგას ვიტყვი, რომ არ გემ-
დურები. როგორ დაგემდურო, როდესაც შენ
არ შეგეძლო რაიმე პასუხი მოგეცა. ქალს
სრულებით არ იცნობ და, აბა, როგორ მიპა-
სუხებდი ჩემ კითხვაზე!

— დიდი ხნის გაჭიმული ნერვები, — განაგრძო ცოტა ხნის სიჩუმის შემდეგ: — მომიღუნდა, მომიჩლუნგდა. რამდენად მწვავი იყო ეს კითხვა ჩემთვის, იმდენად ეხლა უმნიშვნელოა. ხომ სულ ერთია?! ხელი ჩავიქნიე და ამ ხელის ჩაქნევას ჩემი ნერვებიც ჩავატანე. ეს ერთი კვირაა, სულ მოშვებული ვარ და რაც უნდა შევიტყო გულჩინას შესახებ, მაინც „სულ ერთი“ იქნება...

ბევრი რამ მინდოდა მეკითხნა, ბევრი რაზ გაუგებარი, დაუმთავრებელი იყო წერილში, მაგრამ ველარა ვძელავდი, რადგანაც ვატყობდი, რომ მოგონება, გამოკითხვა ძალიან შეაწუხებდა. თუმცა-კი იძახდა: სულ ერთიაო.

ამისათვის გამოვცვალე ბაასის საგანი და ქუთაისისა, იმერეთის ჭირ-ბოროტზე ჩამოვუგდე ლაპარაკი...

— ... თქვენ თეატრის დარბაზი გქონდათ, როგორც შენ იძახი და გაზეთებშიაც იწერებოდნენ.

— ენის მოსაქავლებელ ადგილად ქუთათურებს უფრო მუდმივი ადგილი აქვთ. ეს — ბულვარი და იქვე ბულვარის ახლო — ფრიად შესანიშნავი რესტორანი. ამ რესტორანის არსებობა შენ არ გეცოდინება. ეს სულ მოკლე ხანში გააღეს...

„გადი ბულვარში უფრო სადილისა და ვახ-
უმის დროს, რესტორანში შედი და იქ შეიტ-
ყობ ქუთაისის ინტელიგენციის ჭირ-ბოროტს.
მოხუცი, ახალგაზდა იქ იყრის თავს და...“

„ძნელად ასაწერია, რა ცხარე ბაასს მართა-
ვენ, რა აღზნებით შლიან და იქნევენ ხელებს,
თვალებს აკვესებენ და იმათ ბაგეთაგან გადმო-
სჩქეფს, გადმოხუის სიტყვები, რა სიძლიერით
ესვრიან ერთმანეთს დანა-ჩანგალს და ჭურჭელს
კი არა, ბოკლსა, დარვინსა, სპენსერსა, კარლ
მარქსსა და სხვ. და ამგვარად მსოფლიო
კითხვებს არჩევენ, სახელმწიფოებს ერთმანეთს
ახლიან და...“

„კმაყოფილნი თავიანთ თავისა ემშვიდობე-
ბიან ერთმანეთს და ისვენებენ იმისთვის, რომ,—
ხა-ხა-ხა-ხა!— მეორე დღესაც შეიყარნენ და კი-
დევ დარვინი, ბოკლი, სპენსერი, კარლ მარქსი
უფრო ძლიერად ესროლონ ერთმანეთს!..“

ერთი კვირა გავიდა, რაც გაიოზი მესტუმ-
რა. ყოველ დღე დიდ ბაასს გავმართავდით ხო-
ლმე. თითქმის სულ გადავაბრუნეთ მთელი ქვე-
ყნიერება, მხოლოდ ერთ საგანს არ შევხები-
ვართ. ეს— რაც გაიოზის აწუხებდა. ვატყობდი,
რომ გაიოზი ერიდებოდა და მე ხომ უფრო
მოვერიდებოდი.

ნაწყვეტ-იაწყვეტად შევიტყე, რომ ის თავის გამოსაცდელად გამოპრიდებოდა ჭ-ს.

— ახლოს რომ იყო, — მითხრა ისე გაიოჩია: — იქნება იმისთვის ვირეოდი. — მინდა ერთ თვეს მაინც შორს დავყო, ჩავუკვირდე ჩემს გრძნობას. წერილიც არ მინდა მივწერო და არც იმისაგან მინდა მივიღო. ამისათვის ადრესიც არ დავუტოვე...

თუმცა ესა სთქვა, მაგრამ შევატყე, რომ მეორე დღესვე წერილი სადღაც გაგზავნა და მოუთმენლად პასუხს ელოდა. დაბრუნდებოდა სახლში თუ არა, მაშინვე მოსამსახურეს მიმართავდა: „წერილი ხომ არა მოსულარა... ხომ კარგად იცი ჩემი გვარი და სახელი? უკან არ გააბრუნო, თუ აქ მოიტანეს. წერილების დამტარებელსაც უთხარი: გაიოზ კერაშვილის სახელზე წერილი აქ მოიტანოს...“

გაიოზი შინ არ იყო, როდესაც წერილი მოიტანეს. იმ დღეს გვიანაც დაბრუნდა. წერილი მე გამოვართვი. მინდოდა თვალ-ყური მე-დევნებინა, რა შთაბეჭდილებას მოახდენდა ამ წერილის მიღება და წაკითხვა.

მოფიდა თუ არა, იკითხა: წერილი ხომ არ მოსულაო...

— როგორ არა, აი! — ვუპასუხე მოსამსახურის მაგივრად და გადავეცი.

ხელების კანკალით თვალებ-გაბრწყინვალებულმა გამომგლიჯა ხელიდან და მაშინვე თავი გადაუხია. შტემპელს, აღრესს არც-კი დახედა, თითქოს უკვე იცოდა, საიდანაც და ვისი მოწერილიც იყო...

— აჲ!.. — წამოიძახა უეცრად, წერილი გადაშალა თუ არა და საჩქაროდ წერილის ბოლოს დაჭხედა. პირი სახის კუნთები აუთამაშდა, ტანი შეერყა და უეცრად სარკმელთან მდგომ სავარძელში ჩაეშვა.

ნახევრობამდის არც-კი ჩაეკითხნა წერილი, რომ ხარხარით წამოვარდა:

— ვარლამ... ვარლამ... ვარლამ!.. — ყვიროდა უთავბოლოდ და თან მეხვეოდა, მკოცნიდა, მატრიალებდა და გიუივით ხარხარებდა.

— რა იყო, რა მოგივიდა?!.. — ვეკითხებოდი, მაგრამ პასუხს არ მაძლევდა. ის ისევ ხარხარებდა, მკოცნიდა, მჯმუჯნიდა და გაუგებრად გაიძახდა: „ვარლამ.. გულჩინა... დავრწმუნდი“-ო.

მე კიდევაც შემეშინდა. ხომ არ გადაირია-მეთქი, ვფიქრობდი და ვცდილობდი, როგორმე დამემშვიდებინა... ძლივს, როდის დაშვიდდა და მაშინ-ლა მიპასუხა რიგიანად:

— აი, წაიკითხე და შეიტყობ, რამაც გამახარა ასე. ვერ წარმოიდგენ, ვარლამ, რა ლო-

დი მომწყდა გულიდან და რანაირად თავისუფლად სუნთქვა დავიწყე!.. ვმადლობ... ვმადლობ შეცდომას... კაცის გულმავიწყობას..

წერილი გამოვართვი და ხმა-მაღლა კითხვა დავიწყე:

„ჩემი გონებიდან განუშორებელო პოლი-
ეკტ, ნეტავი ეხლა აქ იყო..“

— ვის წერილებს მაკითხებ?! — შემკრთალ-
მა მივმართე გაიოზს და წერილის კითხვა შევ-
წყვიტე.

— წაიკითხე, წაიკითხე და შეიტყობ, ვი-
სასაც, ნუ გეშინიან.

„...ამ ზაფხულს ხომ შეგეძლო მოსვლა?!
— განვაგრძე კითხვა: — შარშან ზაფხულს რა
ცუდად გაგატარებინე დრო, რომ წლეულ აღარ
მოისურვე მოსვლა! წელს უფრო უკეთესად,
უკეთესად კი არა, ნეტარებით გავატარებდით
დროს...“

„მაგრამ ისწავლე, ისწავლე და ყველაზე
უმჯობესი კაცი გამოდი. ეს ერთი ზამთარი-ლა
იქნები მანდ. არა უშავს - რა. როგორც იქნე-
ბა უშენოდ გავძლებ, გავიჭირვებ თავს, მხო-
ლოდ იმ პირობით, რომ სამუდამოდ ჩემი იყვე,
ჩემს გვერდით დარჩე. მე მაშინ უკვე ქმრიანი
ვიქნები. შენ ქუთაისში იშოვი ადგილს და...“

ახ, რა ნეტარებაში ვიქნებით!.. ნეტავი ჩქარა
დადგეს ის ნეტარი წუთი!..

„ჩემი ტეტია ისევ ისე ბურტყუნებს, იჩმუ-
ჩნება საცოდავად, მაგრამ რას იზამს? ისე მყავს
გაბმული, რომ თავს ვერ დაიხსნის.

„გუშინ მივიღე წერილი. ის ეხლა ტფი-
ლისშია. აი რასა მწერს:

„...ეხლა ხომ ჩვენ ერთმანეთისა ვიქნებით;
ხომ კარგად იცი, ამ მოკლე ხანში ჯვარს და-
ვიწერთ?! მაშ ეხლა მაინც მითხარი შენი წარ-
სული, იქმნება იმისი გაგებით მაინც დავრწ-
მუნდე, გულწრფელად გიყვარვარ თუ არა...

„გულჩინავ, შენ ყოველთვის მარწმუნებ,
ყოველთვის მეუბნები, რომ გიყვარვარ, მე მი-
ზეზიც არა მაქვს, რომ არ გერწმუნო, მაგრამ,
რა ვიცი, რატომ არა ვრწმუნდები?

„გენაცვა, გულჩინო, ამისრულე ეს მცირე-
დი თხოვნა...“ აი, სულ ამას ჩივის, ეს გახ-
დომია სატირლად.

„ბეჩა, რომელი თავხედი ქალწული გადუ-
ხსნის თავის საქმროს გულს და ყველაფერს უამ-
ბობს? ეს როგორ არ უნდა იცოდნენ ყმაწვი-
ლებმა, რომ ამგვარ კითხვებს იძლევიან. მეტის-
მეტი გულუბრყვილობაა, არა, პოლიევკტ?

„ისეთ აბდა-უბდას ვწერ იმის კითხვაზე

პასუხად, რომ, მგონი, ვერც თავი გაუგოს და
ვერც ბოლო...

„ნეტავი შენ ცოლქმრობის წინააღმდევი არ
იყვე, რომ იმისთვის ხელი მეკრა და თავიდან
მომეშორებინა?! სწორე გითხრა, მომწყინდა
კიდევაც იმისი ბურტყუნი.

„ან კიდევ მე გეთანხმებოდე და ეგეთი რწმე-
ნა მქონდეს. შენ რომ ქალი იყო, მაშინ და-
მეთანხმებოდი, რომ ჩვენ დროში კანონიერი
ქმარი ქალისათვის აუცილებელია.

„ქმარი ქალისთვის ფარია, ფარდაა და მეც
ამ ფარდას ვეძებ, რომ იმის იქით მე და შენ
უშიშრად, მოურიდებლად ვისიყვარულოთ...“


ველარ დავათავე კითხვა, ისე ავღელდი, და
წერილი იქით ვისროლე...

— ეი, ძმობილო, ეგრე ნუ ისვრი ჩემს
მხსნელს! — გამეხუმრა გაიოზი და წერილი აილო.

მე გაიოზე ჯავრი მომივიდა, რომ ის
ასე ხუმრობს ამ დროს...

— კი, მხსნელია, მაგრამ მე ვერ გამიგია,
ამ წერილს შენთან რა ადგილი აქვს!..

— ადვილი ასახსნელია. გულჩინას ორი
წერილი, ჩემთან და პოლიცეკთან, ერთ დროს
დაუწერია და კონვერტები შეშლია... და, აი,
ამ უბრალო შეცდომას რა შედევგი მოჰყვა.



მგონი, ჩემი სიცოცხლე რომ ამის ამო-
ცნობაში გამეტარებინა, ესე თვალ-ნათლივ ვერ
დავრწმუნდებოდი.

გაიოზი ლაპარაკობდა და მე-კი აღელვე-
ბული ოთახში დავდიოდი.

— ხედავ, ვარლამ, იქ ქალწულები რა
ცბიერებას იჩენენ?!.

— ვხედავ, ვხედავ! იმასაც ვხედავ, რომ
როდესაც საქმროები ტყობულობენ ამ ცბიერე-
ბას, ხარხარს იწყებენ!..

— შენ მართალი ხარ, ჩემო ვარლამ! — სი-
ცილით მიპასუხა და ხელი გადამხვია.

— ეხლა რას აპირებ?

— ი, რას ვაპირებ: — მიპასუხა და გულ-
ჩინას წერილს ბოლოში მიაწერა:

„ეს წერილი შეცდომით ჩემთან გამოგიგ-
ზავნია. მე გაუუგზავნიდი პოლიევკტს, მაგრამ
სჯობია, შენვე გაუუგზავნო... გაიოზი.“

ქალს თავზარი დაეცემოდა, ამას რომ წაი-
კითხავდა, მინდოდა მეთქვა, მაგრამ გავჩუმდი
და მხრები-ლა ავიჩეჩე.

V

დადუმდა გაიოზი. რაც წერილი ბოლოში
მინაწერით გაუუგზავნა, ხმა აღარ ამოულია. რამ-

დენჯერ შევეკითხე, რამდენი ვეცადე საბასოდ
გამომეწვია, მაგრამ ჩემი მეცადინეობა ამაოდ
რჩებოდა. ყოველ ჩემ კითხვაზე ან სულ არას
მიპასუხებდა და ან-კიდევ დაბნევით, უაზროდ
თავს ჩამიქნევდა, ხელებს გამისავსავებდა.

ალარც ჭამა-სმა იყო იმისთვის, ჩამოხმა...

საითაც უნდა ხელი გამეშვირა, ხმის ამო-
ულებლად წამომყებოდა.

მეც ვისარგებლე ამითი და ერთ ხუთშა-
ბათ საღამოს მუშტაიდისკენ წავიყვანე. ვიცო-
დი, ამ საღამოს ხალხი მრავლად იქნებოდა და
ამისათვის ვიფიქრე, იქნება ხალხის სიმრავლემ
გამოაფხიზლოს-მეთქი.

მშვენიერი საღამოც იყო. თუმცა დღის
სიცხის ბუღი ისევ ტრიალებდა, მაგრამ მაინც
თავისუფლად სუნთქვა შეიძლებოდა.

აუარებელი ხალხი მიეშურებოდა ცხენ-
მიბმულათი, თუ ისე ეტლებით, ჩვენც დავი-
კირეთ ეტლი და ჩქარა მუშტაიდში მტკვრის
პირას ახლო მოედანზე ფანჩატურის გარს შე-
მორტყმული ხალხის მოძრავ რკალში ჩავებით.

მგონი, ამოდენა აუარებელ სხვა-და-სხვა
ჯურის ხალხში მარტო მე და გაიოზი ვიყავით
გაწამებულები, თორემ სხვა ყველა მხიარულე-
ბდა, იცინოდა, ცხარედ ბაასობდა.

არ ვიცი, გაიოზი რაზე ფიქრობდა და მე-კი ფიქრით არაზე ვფიქრობდი, მხოლოდ ყურს ვუგდებდი უცნაურ, თითქოს ფუტკრის სკიდან გამონაცემ, ხალხის გუგუნს.

ფანჩატურის ქვეშ-კი ამოფარებულიყო გურული ტანისამოსით მორთული პატარა მემუსიკეთა გუნდი, რომელიც დრო გამოშვებით საკრავებს ხმას აღებინებდა.

არ ვიცი, სხვაზე რა შთაბეჭდილებას ახდენდა. საფიქრებელია, კარგს, რადგანაც დიდის აღტაცებით უკრავდნენ ტაშს, როდესაც რომელსამე პიესას დაასრულებდა გუნდი. ჩემზე-კი ძალიან ცუდს. პატარა მემუსიკეთა დაკრული პიესა არც სულს და არც გულს არ ეხებოდა. იმათი მოქანცული სახე-კი სულსა და გულს მიწამლავდა და ერთს-ლა ვნატრობდი: ჩქარა წასულიყვნენ და დაეძინათ ამ ბავშვებს.

— ვარლამ, წავიდეთ იქით, აგერ, აი, იმ ბნელი ხეივნისაკენ!..—მომმართა გაიოზმა და მკლავში ხელი წამავლო.

გამეხარდა. პირველად ამოილო ხმა ხარ-ხარ-სიცილის შემდეგ. სიხარულით გამოველ მოძრავი რკალიდან, რომელიც უკვე შეთხელებულიყო, და მტკვრის პირა ხეივან-ხეივან მძიმე ნაბიჯით წავედით...

— გ... გეხსომება, იქაც, ფერმაშიაც, არის
ამგვარი ბნელი ხეივანი. ხშირად მე და გულ-
ჩინა დავდიოდით... და ახ!..

სახე საცოდავად დაეჭმუხნა და ტანი შეე-
რყა. შუბლზე ოდნავ ხელი გადისვა და მტკვრის
პირას პატარა ფანჩატურიდან გამომავალი წყვილი
ქალ-ვაჟისაკენ მიმიშვირა თითი.

— აგერ ისე, როგორც ეგენი, მკლავებ-გაყ-
რილნი, ერთმანეთზე მიყრდობილნი გაჩუმებუ-
ლები ვისხედით. ხომ იქაც არის მაგეთი ფან-
ჩატური რიონის პირს. აქ მაღალი კლდიანი
კიდეა, იქ-კი დაბალი, მაგრამ სასიამოვნო. რი-
ონის გმობა მკაფიოდ მოისმის.

„ჩვენც ეგრე, ფეხის ხმას ვუსხლტოდით.
გვინდოდა, მარტოკანი ვყოფილვიყავით.

„არა, არა და არა!.. იმას არ სდომებია,
მარტო მე მინდოდა. მე... მეგონა-კი...

„რა კარგი იყო, ვარლამ, რომ ვსცდებო-
დი, ვსტუუდებოდი. ნეტავი იმას, ვინც სცდე-
ბა და ვისაც ჰგონია, რომ ერთ ხორცად და
ერთსულად არიან!.. აგერ ისინიც, რომ მიდიან,
ბედნიერები არიან. ბედნიერები არიან, რომ
სტუუდებიან და ჰგონიათ, მარტო ჰგონიათ.
იმათ გულში რომ ჩაიხედო, ხომ შეგეშინდება,
ხომ დაინახავ იმათ ცბიერებას!.. იქაც, მოედან-

ზედაც ხომ ნახე, როგორ ეჭუკჭუკებოდნენ ერთმანეთს, როგორ ლმობიერად უმზერდნენ?! ხომ სულ ტყუილი თვალების ტრიალია, ხომ ატყუებენ ერთმანეთს?! არა? ჰა?!

„მარტო ეხახუნებიან ერთმანეთს, სხვა არაფერი. არც სული და არც ხორცი ერთმანეთს არ უდგება...

„აბა ჩაუკვირდი, მიხვდი?!“

ჩვენ ფანჩატურის ქვეშ დავსხედით. მეთორმეტე უამი იყო. მემუსიკეთ შესწყვიტეს დაკვრა, ხალხის ხმაც მისწყდა. მტკვარი-ლა ბუტბუტებდა და მოსოდებამდა გაუგებარი ენით თავის მწუხარებას...

— ბევრი არ ღალატობს საქმით, აღსრულებაში არ მოიყვანს თავის განზრახვას, მაგრამ განზრახვით - კი, აბა ჩაუკვირდი, ვინ არ განიზრახვას?!

„თუ - კი განიზრახა, უკვე უღალატა, მოშორდა, ჩამოეცალა, განმარტოვდა. ორნი ერთ არსებად აღარ არიან. ეს - კი ყოველ წუთს, ყოველ წამს ხდება. კაცი თუ ქალი, ორნივე ღალატობენ. საქმით თუ არა, განზრახვით მაინც: განზრახვით ღალატი და საქმით ორივე ერთია, ორივე ღალატია და არაფრით განსხვავდება. „რომელი ხედვიდეს დედაკაცსა გულის

თქმასა მას, მუნვე იმრუშა...“*) საცა ღალატია, იქ ერთობას ადგილი არა აქვს. ვერა, ვერა! კაცი მარტოდ იბადება და მარტოობა, ეულობა სიკვდილამდის თანა სდევს...

„ნეტავი იმას, ვინც ამასა ჰერძნობს. ის ბედნიერია.

„რა არის ამისი მიზეზი? რად არის აღამიანი დევნილი? ვინ დასწყევლა?

„ვინ? ვინ?.. ვინდა ვინ, თითონ... ადამიანი ყოველისფერს მოიმოქმედებს, მაგრამ გულწრფელად კი არაფერს. გულწრფელობა-კი ნიადაგია ყოველივე ბედნიერებისა...

„რა ვიცი, ეხლა თითქოს გულმოდგინედ მისმენ, თითქოს მეთანხმები კიდეც, მაგრამ რა საბუთი მაქვს, რომ გერწმუნო?! იქნება იცინი კიდეც, სულელადაც მსახავ. რა ვიცი, მოქმედებდა როდისმე ადამიანი გულწრფელად?! არ ვიცი. ეხლა-კი ჩვენ დროს, არა, არ მოქმედებს, თუმცა-კი ყოველთვის ამას ამტკიცებს სიტყვით.

„ახ! რა სამწუხაროა ხოლმე, როდესაც ხედავ, რომ კაცი თავსა და პირს იმტვრევს, გულსა და მკერდს იბრაგუნებს და გარწმუნებს, რომ გულწრფელია!..

*) სახ. მათესი, თავი V, მუხ. 28.

, ,მე თუ გაზეთებიდან ვტყობულობდი, შენ
პირდაპირ ისმენდი ბანკისთვის მებრძოლთა და
წამებულთა სიტყვებს. არ გეყურებოდა, როგორ
ორსავე მხარეს „სამშობლო“, მისი სარგებლო-
ბა პირს ეკერა?

„რა ვიფიქრო?! გულწრფელები არი-
ან?! ჰა?! მითხარი: მართლა სამშობლოს
სარგებლობა ამოქმედებდა მათ თუ სხვა რამ?!“

მეწყინა. მეც შემეხებოდა ეს განკიცხვა,
მაგრამ რა მეპასუხნა? პასუხის მაგივრად მხრები-
ლა ავიჩეჩე.

6 ღვინობისთვეს 96 წელს.




„ის?!”

კალოებზე ყველამ დაიძინა. მთელ დღეს სიცხის გულზე ტრიალმა ისე დაქანცა გლეხობა, რომ რა წამს ახლად გალეწილი ხორბალი თუ ქერი ჯინებში ჩაცალა და ბზე-კი კალოს პირას მიაგროვა, მაშინვე დაწვა ქოხებ ქვეშ და ლრმა ძილს მისცა თავი, რომ ახლა მეორე დღეს შეუდგეს ისევ იმ მოქანცვას და თავბრუ-დამსხმელ კალოზე ტრიალს.

ალექსას კალოს პირას, ქოხ ქვეშ, მარტო იმის ცოლ-შვილი იწვა, და ცოტა ქოხის იქით — იმისი მოჯამაგირე. თითონ-კი საღამოს სოფელში*) წავიდა და ცოლ-შვილს ამბავი დაუგდო, თუ ამაღამვე არ ჩამოველ, დილაზე ადრე მაინც მოგეშველებით კალოს გაშლასაო.

დიდი ხანია იმისმა ცოლმა და ორმა პატარა ქალ-ვაჟმა დაიძინა და მოჯამაგირემ ხომ დაწოლის უმაღლ ხვრინვა ამოუშვა. მარტო თიკოს, ალექსას გასათხოვარ ქალს, არა სძინავს

*) გალმა კახეთში კალოები სოფლის გარედა აქვთ, ზოგ-ზოგ სოფელს ორი-სამი ვერსის სიშორებედ, და ლეწის დროს მთელი სოფელი კალოებზე გაიხვეტება ხოლმე.



და მოუსვენრად არის. მალი-მალ მუთაქიდან
თავს იღებს და ქალი-აყვანა *) მთის წვერისკენ
იხედება, საიდანაც მთვარე უნდა ამოვიდეს და
იმის შუქმა უნდა ანიშნოს, რომ ისიც, ისიც,
რომელმაც იმის უმანკო გულში მეტად ტკბი-
ლი და დამათრობელი გრძნობა აღძრა, რაც
არა ერთსა და ორს უმანკოს ათევინებს ღამეს
და ხან ერთ გვერდს აცვლევინებს და ხან მეო-
რეს, ხან პირისახეს ბალიშში ამალვინებს და,
უკმაყოფილობის გამო, ცრემლს აფრქვევი-
ნებს და, ხან კიდევ, ტკბილის ნეტარის ლიმი-
ლით უბრწყინებს სახეს, რომ ისიც მთვარის
ამოსვლისას ქოხის პირდაპირ კონცხის წვერი-
დან გადმოსტვენს...

დღეს იალალიდან ჯერისთვის ჩამოვიდა,
იმასთან ერთად შუადღემდის კალოზე ტრია-
ლებდა, ერთად უქცევდა, ერთხნობას ერთადაც
ისხდნენ ქოხის ქვეშ, მაგრამ იმათთან ერთად
სხვებიც ირეოდნენ და უშლიდნენ, რომ თვა-
ლით არის მაინც გამოეცხადებინათ ერთმანეთი-
სათვის გრძნობა.

ხედავდნენ, გრძნობდნენ, რომ იმათი გუ-
ლები ერთმანეთის სიახლოვის გამო ბუდიდან აპი-
რებდნენ გადმოვარდნას; ერთმანეთის ქშინვა

*) სოფელ შილდას ახლოა.

ეყურებოდათ, ისე ახლო იყვნენ და ხმის გაცემას კი არა, შეხედვასაც ვერა ბედავდნენ. „რის მაქნისია ამისთანა სიახლოვე, თუ-კი გულს ვა-ჩუმებთ“-ო,— გაიძახოდნენ უსიტყვოდ და ჯავ-რისაგან თითებს იმტვრევდნენ.

მარტო ერთხელ მოასწრო ქოხის ქვეშ თიკოსთვის შეეხედნა და ეს საკმარისი იყო, რომ თიკოს მდუღარე გადასხმოდა. გული გა-დუქანდა და ნაზი, დაწმენდილი სახე ჯერ შეე-ფერფლა და შუბლზე მარგალიტისებრ წვრი-ლი ციფი ოფლის წვეთები ამოასხდა, მერე-კი ალმულმა აუარა და ტანი მთლად გაუხურდა.

მაშინვე წამოდგა და ქოხის ბოძს მოეფა-რა, რომ პირისახეს არ გამოექვეყნებინა იმისი საიდუმლოება. იმან-კი ამოიოხრა, როცა თიკო ბოძს მოეფარა და თავი ძირს ჩაჰვიდა.

— დათა, წავიდეთ და ჯერი წაიღე, თო-რემ დაგიგვიანდება,—უთხრა ამ დროს იქვე მოფუსფუსე თიკოს დედამ და ქოხიდან გავიდა.

დათიამაც მაშინვე თოფი მხარ-ილლივ გა-დაიგდო და აქეთ-იქით მიიხედ-მოიხედა.

— თიკო, მთვარის ამოსვლისას იქიდან გადმოგისტვენ.—ქოხიდან გამავალმა ოდნავ წას-ჩურჩულა, რაკი იქ სხვა არავინ იყო იმათ მე-ტი და თვალით კონცხზე აჩვენა.

ამ სიტყვებში თიკო სულ ააკანკალა და
ქოხის ბოძს რომ არ მინაბრვიყო, გადიჭუეო-
და კიდევაც.

მოუთმენლად ელოდა თიკო დალამებას.
იმ დღეს სუყველაფერს დაბნევით, არეულად
აკეთებდა და ხშირად სულ უნებურად სიამოვ-
ნებით გაელიმებოდა.

კალოს გადაშვების დროს იმისი დედაც
დაბრუნდა და სთქვა: დათია წავიდა და, ვინ
იცის, ვახშმობამდის უწევს იალალს თუ არაო.

— ფეხ-მარდი ბიჭია, როგორ არ უწევს!
— უპასუხა ალექსიმ ცოლს და არნადს ხელი
წამოავლო.

ამის შემდეგ დათია აღარავის მოჰვონებია,
გარდა თიკოსი, რომელსაც სულ თვალწინ
ედგა და გონებიდან არ მოშორებია. მალი-
მალ მოესმოდა იმისი ხმა: თიკო, მთვარის ამო-
სვლისას იქიდან გადმოგისტვენო, და კანკალი
აიტანდა...

დალამდა. კალოზე ხმაურობა მისწყდა-
ჟველამ მიიძინა. თითქოს მთვარესაც მისძინებია,
რომ არ ამოდის და თიკოს გამოსაჯავრებლად
იგვიანებს...


— რა ვქნა, სხვიმის-კი ადრე ამოდიოდა,
ეხლა რალა მოუვიდა?! — მხარ-თეძოზე წამო-

ჯდომით უქმაყოფილოდ წაიპუტბუტა თიკომ
და ჩაუინებით ჩააკვირდა ქალი-აყვანა მთის წვე.
რის პირდაპირ ცას, რომლის მუქ ლურჯ ფერს
და ზედ მოკაშკაშე ვარსკვლავებს სიციაგე ეპა-
რებოდათ.

რამდენადაც ცა ცრიაგდებოდა, იმდენად
თიკო ღვიოდა, შვენდებოდა; იმის მაყვალა თვა-
ლებს ელვარება ემატებოდა, ქუთუთოებს თრთო-
ლა ეპარებოდა; მარწყვის ფერი ტუჩები კიდევ
მძიმედ ვარდივით ეფურჩქნებოდა, თმა გაშლი-
ლი სწორედ საოცნებო არსებას ემსგავსებოდა...

— ამოვიდა!... — უნებურად აღტაცებით წა-
მოიძახა თიკომ, როდესაც მთის წეერზე მთვა-
რის სულ მცირედ ნაწილს თვალი მოჰკრა, და
მთლად სმენად გარდაიქცა.

კონცხიდან ოდნავი სტვენა მოისმა. თიკო
სტვენის გაგონებაზე წამოვარდა და ნიავივით
კონცხისკენ ძნის გვერდით გასრიალდა. საჩქა-
როდ კონცხის მეორე მხარეს მოექცა, სადაც
გულის ფანცქალით დათია მოელოდა, და
მისვლისათანავე დათიას გახსნილ მკერდს მიეს-
ვენა; ლაფანივით მოიქნა, მოეშვა და ისე მი-
სუსტდა დათიას გულზე მისვენებული, რომ
განძრევის თავი აღარა ჰქონდა. დათია-კი თა-
ვის ძლიერ მკლავებს გარს ხვევდა და ისე



იყრავდა გულში, თითქოს თიკო სულში უნდა
ჩაიძვრინოსო.

დათია დაეშო ძირს და ლოდზე ისე ჩამო-
ჯდა, რომ თიკო კალთაში მოექცა და ფეხებ-
საც-კი დედამიწას არ აკარებდა. მოელვარე თვა-
ლებით დასცეკეროდა თიკოს მიბნედილ, მილუ-
ლულ სახეს და მღელვარება უასკეცდებოდა,
რადგანაც ეს მშვენიერება, ეს ნაზი არსება იმის
მკლავებს შუაა და იმის მკერდზე მისვენებულს
მისძინებია.

თუ დღეს დათა უბედურად სთვლილა თა-
ვის თავს, სამაგიეროდ ეხლა „მეფე ვარო“, გაი-
ძახდა უსიტყვოდ და, ყეენიც რომ წარმოუდგეს
ეხლა წინ, იმასაც თავს არ მოუხრის.

ასე იყვნენ დიდხანს და იმათ მყუდროე-
ბას არა არღვევდა-რა. მხოლოდ იქვე, მინგრე-
ულ ბოგირს ქვევით, უჯარა ჩახრიალებდა და
შეყვარებულთ ნანას ეუბნებოდა. ხანდისხან კი-
დევ ვენახების ბოლოში წნორისა და ფურცლის
ტოტებზე წამწკრივებული ბეღურები ერთმანეთს
ალერსით ჩაჟივჭივებდნენ და ფრთების ფათუ-
რით ერთმანეთს ეკვროდნენ.

— მცივა!..—კარგა ხნის შემდეგ მისუსტე-
ბულის ხმით წამოიძახა თიკომ და ტანის თახ-
თახმა აიტანა.

დათას კალთაში ქალი სულ ხტოდა და თრთოდა და ზედ ეყვროდა, რომ გამობარიყო.

— რადა, გენაცვა, რა დაგემართა?! — მზრუნველობით ჰქითხა დათამ და ტყაპუჭის უბეები და კალთები გარს შემოახვია.

— არ ვიცი, რადა!.. ფეხებზედაც მომახვიე, — კანკალით უპასუხა თიკომ და ტყაპუჭის ქვეშ ორივე ხელი დათას გარს შემოარტყა.

— აჟა, გენაცვა! დაიცადე! ჰო, ეხლა-კი დაგთბება. — ეუბნებოდა დათა და თან თიკოს კალთაში იჭუჭკავდა.

— კიდევა გცივა?

— აღარა, ეხლა-კი გავთბი.

— ვინა ხართ? — შეშინებულის კილოთი ვიღამაც დაიძახა ამ დროს ბოგირიდან და ფეხი წინ ვეღარ წამოსდგა. *) შეყვარებულები ამ ხმაზე შეკრთნენ და ფეხზე წამოიჭრნენ. გაქცევა და დამალვა მოისურვეს, მაგრამ მუხლო მოეჭრათ. ან-კი სადღა წავიდოდნენ, როდესაც მოულოდნელი სტუმარი თავს ედგათ.

მთვარეს კარგა მაღლა ამოეწივნა და კონცხი დღესავით გაეშუქებინა.

„თიკო!.. დათა!.. დათა იალაღს წავიდა!..

*) ხალხში თქმულებაა, ვითომ ამ ბოგირთან ალები უჩვენებიანო.

მოჩვენება!.. ალებია!“ — კანკალით გაიუკრა
ალექსიმ და გაფიტრებულმა პირჯვრის წერით
უკან დაიწია. დათა და თიკო-კი თავშალუნუ-
ლები იდგნენ და ძლივს-ლა სუნთქავდნენ, რად-
განაც ალექსი იცნეს.

— დათა, თიკო, თქვენა ხართ?! — ძლივს
წაილულლულა ალექსიმ.

— ჩვენა ვართ!.. — უპასუხა მოკრძალებით
დათამა და მძიმედ ქშინვა დაიწყო.

— თქვენა?!.. — ბრაზ-მორევით შეჰვირა
ალექსიმ და საჩქაროდ იმათ გვერდით გა-
ჩნდა.

— შე გაგლეჯილის შვილო, შენა, ჩემ
მოჯამაგირეს უნდა ეთრევინო, ჰა?! — თმაში
ხელის წატაცებით დაუტია ალექსიმ და თიკო
წინ წამოიბერტყა.

ქალი მუხლებზე დაეცა, როდესაც ალექ-
სიმ თმით წამოიბერტყა, და ტირილით შეევეღრა:

— მამავ!..

— ალექსი, ნუ სტანჯამ ე გოგოს!.. —
გულნატკენობით მიმართა დათამ და ალექსის
ხელი დაუჭირა.

— რაო?! აი, შე... — ბრაზისაგან გული
ყელში მოებჯინა და სიტყვა გააწყვეტინა. სიტ-
ყვის მაგივრად ალექსიმ ისე წამოჰკრა გულის.

ფიცარში, რომ დათა დაბარბაცდა და კინალამ გადიქცა.

— მაშ ეგრე, ალექსი?! — უკვე გაჯავრებულმა დათამ წამოიძახა, მსწრაფლ ხანჯალი ამოილო და წინ უყელა ალექსის, რომელიც თიკოს გზისკენ მიათრევდა.

— აი, შე წუნკალავ!... — დაიღრიალა ალექსიმ, დათია რომ ხანჯალ-ამოლებული წინ დაინახა და თიკოს თავი ანება. — ჩემი ხანჯალი შენ ხანჯალზე ნაკლებ არ გასჭრის, წუნკალავ! — შეუტია ალექსიმ და ხანჯალი გაიძრო.

— ვაი!... — სასოწარკვეთილებით ისე შეჰკივლა თიკომ, როცა ხანჯლებ-ამოწვდილებს შეხედა, რომ მთამ, ველმა, ვენახებმა აიტაცეს ეს სასოწარკვეთილებითი „ვაი“ და შორს, შორს გააქანეს.

უეცარმა შეკივლამ კალოზე ძალლები დააფეთიანა და ააყეფა. ქოხებ ქვეშ კიდევ მიძინებული გლეხები ლრმა ძილიდან გამოაღვიძა და პირჯვარი გადააწერინა. გონს ვერ მოსულიყვნენ, თუ რამ შეაფრთხო ისინი...

დაკივლებასთან ერთად თიკო აფთარივით იმათ შუა გაჩნდა, ხელები გაშალა და უგრძნობლად ძირს დაეშვა...

ერთმანეთის პატივის-მცემლები და შემთხვევ-

ვით მოსისხლე მტრებად გარდაქცეულები ეხ-
 ლა სულ სხვა გრძნობაშ და აზრმა შეიპყრო.
 ორსავე მკლავები მოუდუნდა და ხანჯლები
 ხელიდან გაჰვარდა.

ორსავე ერთი-ლა ახსოვდა, როგორმე
 თიკო მოებრუნებინათ.

„ალექსი!.. დათი!..“ — ხან ერთი დაუძა-
 ხებდა და ხან მეორე და ერთმანეთს არ აცლი-
 დნენ ქუდებით წყლის მოტანას.

გადაფითრებული თიკო მიწაზე იყო გა-
 დასვენებული, და იმის ტუჩებს ოდნავ სიწით-
 ლე თან-და-თან ეპარებოდა. აგერ ლოყებსაც
 სიწითლემ წამოჰკრა და თვალის ქუთუთოები
 შეერხა. ცოტა ხანიც და თვალებიც გაახილა.

— მამავ!.. — მისუსტებულის ხმით შესძახა,
 გვერდით მდგომი მამა რომ დაინახა, და გაფით-
 რებული ხელი ძლივს შუბლზე გადისო.

— აქა ვარ, შვილო, ნუ გეშინიან!.. —
 უპასუხა ალექსიმ და თითონაც ალერსით თმას
 სწორება დაუწყო.

მოაგონდა უეცრად ხანჯალ-ამოღებული
 დათა და ტანში შიშის ურუანტელმა დაურბინა.

— ის?! — შუბლ-შეჭმუხვნით დაეკითხა მა-
 მას და საჩქაროდ წამოჯდა.

— ისიც აქ არის!..

— თიკო!... — სიხარულით წამოიძახა და-
თიამ, როდესაც წყლის ნაპირიდან სავსე ჭუ-
ღით გამობრუნდა და წამომჯდარ თიკოს თვა-
ლი მოჰკრა და სავსე ჭუღი მოაპირქვავა.


— დათა!... — არა ნაკლებ სიხარულით წა-
მოიძახა თიკომ და იმისკენ მომრბენ დათიას
მკლავები გაუწოდა.

— გენაცვა, ხომ კარგადა ხარ?! — ქაქანით
დაეკითხა დათია და გვერდზე მოჯდომით ხე-
ლი გადაჰხვია.

— კარგად, ჩემო დათი, კარგად!... — უპა-
სუხა თიკომ და დათიას გულს მიესვენა.

ალექსი - კი დაფიქრებული შესცემეროდა
შეყვარებულთა ალერსს და ლმერთს მადლობას
სწირავდა, რომ თიკო ასე ადვილად გადარჩა
ხიფათს...

1893 წ.



შემუსერილი სამი მუნება.

(ლეგენდარული ამბავი)

I

...მონადირენი არა სცხრებიან. მრავალი ირემი, ტახი და ქურციკი დასჭრეს და მოჰკლეს; დამფრთხალი ნადირი უგზო-უკვლოდ გარბის: ლომი, ვეფხვი, ირემი, ქურციკი ერთმანეთში აირივნენ და ყველა ერთსა სცდილობს, მოარიღოს თავი მონადირეთ.

ხმაურობს ტყე... საითაც-კი სპილონი ხორ-თუმს გაიქნევენ, ლაწა-ლუწით გზას უთმობენ ხეები. ნადირთა ამ უცნაურ მოძრაობაზე ფრინველთაც ხმაურობა ასტეხეს.

დიდებული დიდებულის ხმაურობით მიიღო ტყემ. სეფისწული თავისის მხლებლებით ნადირობს. ველი მოიფინა ტყიდან გამოცვივნულ ნადირით. მხლებლები მოკლულ ნადირის შეგროვებას ვეღარც-კი ასდიან. ნადირობამ გაიტაცა. იმას აღარა ახსოვს-რა ამის მეტი. თანდათან ნადირობის სურვილი უფრო უცხოველდება.

აგერ, ტყიდან გამოხტა ვეფხვი. თან იჩემ-
 თა და ტახთა ფარა გამოჰყვა. ყურადღება ალარუ-
 კი მიაჭირა იჩემთა და ტახთა, რადგანაც უკვე
 მრავალი დახოცა. მოისურვა თავის ტაიპის გა-
 მოცდა. ვეფხვს ცხენ-და-ცხენ გამოეკიდა და
 სურდა, ლახტით მოესპო მისთვის სიცოცხლე.
 იგრძნო ტაიპმა მხედრის სურვილი და, ვითა
 ფრინველი, ისე გამოეკიდა. უგზო-უკვლოდ გან-
 ვლეს მინდორი, ველი, ყანები. შემკრთალი
 ყანებში მომუშავენი თაყვანსა სცემენ და მუშა-
 ობა ავიწყდებათ. მთლად მხედველობათ გარ-
 დაქმნილნი უმზერენ სეფისწულს. მათ თვალს
 უკეთესი არა უნახავს-რა.

სეფისწულმა შორს ტყეს თვალი მოჰკრა.
 ხედავს, ნადირი ტყეში შეასწრობს, და ამის-
 თვის, რაკი თავისი სურვილი ვერ შეისრულა,
 შვილდ-ისარს მიმართა...

ტაიპი გაშეშდა. აჩქარებული სუნთქვა,
 ცხვირის ნესტოების საბერველივით ბერვა ამ-
 ხელდნენ მის დაჭანცვას...

მხედარი თვალის დახამხამების უმაღ ძირს
 გადმოხტა და ჯერ ისევ მფორთხიალე ვეფხს
 ხელი წაავლო, რომელსაც ისარი მარცხენა
 მხარის უკან დასმოდა და ზედ მილურსმო-
 და...

— კაკ-კუკ!.. კაკ-კუკ!.. — შემოესმა სე-
ფის-წულს ამდროს ყანიდან კაკუნი.

მიიხედა იქით, საიდანაც კაკუნი მოისმო-
და და დაინახა: ვიღაც თმა-გაწეწილი, ხნულში
შჯლობი კაცი, გულმოდგინედ და დინჯად ორი-
ვე ხელით ქვას ხეზედ ურტყამდა და თან
ოდნავ კაკუნს თავსაც აყოლებდა.

სეფის-წულს უცნობი კაცის ამგვარი უკმე-
ხი საჭკიელი ეოცა. ყველა თაყვანს სცემს, ყვე-
ლა მოწიწებით ეპყრობა და ეს-კი, თითქოს
მის ახლო არავინ არისო, თავისთვის ქვებს
აკაკუნებს...

ვეფხს ხელი უშო და უცხო კაცს უყივლა:

— ჰოი, კაცო, ვინა ხარ, ან რა სულიერი?!

უცნობი არც-კი შეინძრა სეფის-წულის
ხმაზე. ის ისევ ისე ქვებს აკაკუნებს და თავის
ქნევასაც ისევ ისე აყოლებს...

უარესად განრისხდა სეფის-წული და სწრაფლ
უცნობს მიეჭრა.

— თუ ენის მოძრაობაც მაგრევე შეგიძ-
ლიან, როგორც ხელებს და თავს ამოძრავებ,
მიპასუხე, თორემ, ვფიცავ ჩემ წინაპართ, მოძ-
რაობას მთლად შეგიყენებ? — ოდნავ ხელის შე-
ხებით შესძახა სეფის-წულმა.

უცნობმა შეაყენა კაკუნი. ცერად შეხე-

და სეფის-წულს და ცალი თვალის მოხუჭვით ჩაეინებით მზერა დაუწყო.

— გამიგონე!.. — დაეკითხა სეფის-წული, თუმცა-კი სახის გამომეტყველებაზე შეატყო უცნობ კაცს შეშლილობა: — ვინა ხარ?

— ადამიანი!.. — იყო პასუხი შეშლილისა, და მისი თვალი მაინც არ შორდება სეფის-წულს.

— სულელო, ადამიანისა რა გაქვს? — ლიმილით შეეკითხა სეფის-წული.

— ხიპ!.. სისულელე!.. — ღრეულით უპასუხა შეშლილმა და სწრაფლ თავის გულმოდგინე მოქმედებას მიმართა: ისევ ქვების კაკუნი, ისევ თავის აყოლება, თითქოს ის ამით სეფის-წულს ეუბნებოდეს: მომშორდი თავიდან, შენ შენი საქმე გაქვს, მე კიდევ ჩემიო...

სეფის-წულს, თითონაც არ იცის რად, მოლიმარი სახე თანდათან ელრუბლება და სულ რამდენისამე წამის შემდეგ მთლად მოექუშა.

„ადამიანი!.. სისულელე!..“ აი, ეხლა რამ შეიპყრო სეფის-წული. ამას გარდა სხვა აღარა ახსოვს-რა. დაავიწყდა ტაიჭი, მოკლული ვეფხვი, ნადირობა, რასაც ამ რამდენისამე წუთის წინად მთლად შეპყრობილი ჰყავდა...

— უმსგავსო, სეფის-წული თავს გადგას,

და შენ-კი თაყვანს არა სცემ!.. — უეცრად სე-
 ფის-წულის გვერდით გაჩნდა ერთი მხლებელ-
 თაგანი, ძლიერის ხმით შეუყვირა და თვალის
 დახამხამების უმაღლ შეშლილს ლახტი თავში
 დასკა.

სეფის-წულმა ხმის ამოღება ვერც-კი მოის-
 წრო, ისე სწრაფად მოხდა ეს ამბავი.

თავ-ჩაჩეჩენილი შეშლილი გადაგორდა,
 რამდენჯერმე გაიკლაკნა და მოძრაობა მთლად
 შეუდგა...

— ჯავალი?!

— სეფის-წულო...

თუ-კი მდომოდა, მეც შემეძლო იამას სა-
 შინელი სახლისაკენ მაგისი გასტუმრება.

— მე...

სეფის-წული გატრიალდა, ტაიჭის მოახტა
 და აუჩქარებლივ, ხმის-ამოუღებლივ სასახლის-
 კენ გაემგზავრა...

II

...ორასამდის ბუმბერაზს უღრანი ტყის
 პირს უდარდელად სძინავს. მათი მკერდი მძიმედ
 ადის და დადის კაშკაშ მთვარის შექვე. ეს
 პირველი ლამეა, რაც სეფის-წული მამის ბრძანე-

ბით სახლიდან გამოვიდა. დღისა ათისა სავალი კიდევა აქვთ და აგრედვე უდარდელად დაიძინებენ ათ ლამესაც ცის ქვეშ. ორასი რჩეული ბუმბერაზი არას შეუშინდება, თუნდაც მთელი ქვეყანა მათზე ამხედრდეს. ხშირად, ძალიან ხშირად უღრან ტყეში თვითეულ მათგანს თვეობით გაუტარებია და ეხლა შეერთებულთ რა გაუკრთობთ ძილს?!

მათი ტაიჭნიც განაპიროს ხასხას, უმწიკვლო ბალახს მაღიანად სძოვენ. პატრონებივით უშიშრად შეექცევიან და დრო-გამოშვებით ოდნავ ფრუტუნით აცხადებენ თავიანთ არსებობას.

წყნარად მოსისინე ნიავი თავს ევლება ტყეს; ყოველ ხეს ერთად ეკონება და საიდუმლოდ ეჩურჩულება, ესიყვარულება; ალერსით აფრთხოანებული ტყე გუგუნებს, ბუტბუტებს და ბანაკის განაპირს ხის ძირზე ზურგით მიყრდნობილ სეფის-წულის გონებას სააზროვნოდ, საფიქროდ გამზადებულს ხელს უწყობს...

ერთი თვეა მის გონებას თავს არ ანებებს ერთი და იგივე კითხვა. არც დღე და არც ლამე მოსვენებას არ აძლევს. განმარტება სურს ამ კითხვისა. უნდა შეიგნოს. თითქოს კიდევაც სწვდება გონება მისი, შორს, შორს ეხატება მისი ახსნა, განმარტება; შორით ულიმის. აგერ,

კიდევაც ფრთხოვანდება სიხარულით მისი არსება, უნდა დაიძახოს: ეხლა-კი გამოვარკვიევო... მაგრამ, იმის სამწუხაროდ, სწორედ იმ დროს ან მამა მიიხმობს, ან რომელიმე დიდებული შევა იმასთან და გადასცემს მამის ბრძანებას, და ასე ახლოს მოტანებული ახსნა, განმარტება უეცრად უფსკრულში იკარგება, წყვდიადით იმოსება. ხოლო ამის მაგივრად მისი გონების თვალი ხედავს თავ-ჩაჩეჩქვილ, მკლაკნავ შეშლილის გვამს და მოესმის მისი პასუხი: „აღამიანი!.. სისულელე!..“

ისევ ისე ხელ-მეორედ იწყება მისი ტანჯვა, ისევ ისე ტვინს ულრლნის კითხვა. სურვილი განმარტებისა უფრო უცხოველდება, ხოლო ხელის შემშლელნი სძულდება. მშობლებთან ყოფნა, დიდებულთა ხილვა მისთვის აუტანელი ხდება.

სასახლეში ყველა ხედავს სეფის-წულის გუნების შეცვლას და თავისებურად ხსნის ამგვარ გამოცვლას. მეფემ დიდებულთათანა თათბირის შემდეგ მოიხმო თავისი ძე და ამ სიტყვებით მიმართა: „ძეო ჩემო! ეხლა-კი დაუძლეურდა წორცი ჩემი, აღარ ძალ-უძს გვამსა ჩემსა ურვება ჭვეყნის სიკეთისათვის. აწ შენ უნდა იზრუნო ჭვეშევრდომთათვის. ხოლო ვიდრემდის გარდ-

მოგცემ ტახტსა ჩემსა, გაემგზავრე მეფე ლაქუ-
მანთან, თან წაიყოლე რჩეული ბუმბერაზნი და
მეომარნი. მეფე ლაქუმანს ჰყავს ასული, რო-
მელიც ემსგავსების მზესა მას უბინდოსა. მიღი,
დაამარცხე მისი ბუმბერაზნი და წამოიყვანე
ასული იგი ცოლად. მე-კი, ვიღრემდის შენ
დაბრუნდებოდე, შეგიმზადებ ერს შენდა მოსაგე-
ბებლად...“

სეფის-წულმა დაბლად თაყვანი სცა მეფეს
და, აი, შედეგი ამ ბრძანებისა: ორასამდის ბუმ-
ბერაზი თან წამოიყვანა მეორე დღესვე ხმის
ამოუღებლად და პირველ ლამეს ამ ტყის პირას
დაბანაკდა...

ლრმა ძილში არიან ბემბურაზნი. მხოლოდ
სეფის-წულს არ სძინავს და ეხლაც, როდესაც
იგი მზისა დარისა მოსაყვანად მიღის, მწუხარე-
ბის მეტი სახეზე არა ეხატება-რა. იქნება იმის-
თვის სწუხდეს, ვითომ ეფიქრებოდეს, ვაი თუ
გაწბილებული გამომაბრუნონო, როგორც მრა-
ვალი სხვა გამოუბრუნებიათ. არა, ამისი ფიქრი
სრულებით არა აქვს. მისი მსგავსი ჭაბუკი ჯერ
დედამიწას არ უნახავს. ამას თითონაც კარგად
გრძნობს. მარტოდაც გაემკლავება თუნდ ყვე-
ლა ერთად შეკრებილთ ჭალის ბუმბერაზთ და
იმედიც აქვს გამარჯვებული. გამოვიდეს. ან-კი

რად უნდოდა ეს ორასამდის ბუმბერაზი, როდე-
საც მარტოკასაც შეეძლო ქალის ბუმბერაზებ-
ზე გამარჯვება. მაგრამ მამის სიტყვას ვეღარ
გადავიდა და ამისათვის იახლა თან...

ეხლა კიდევაც რომ მივიდეს, როდესაც
გული არ მისწევს, გაიმარჯვებს-ლა?! ოუნდაც
გაიმარჯვოს, ესიამოვნება-ლა ეს?! სეფის-წულის-
თვის ამ უამაღ მხოლოდ ერთია სასიამოვნო, ეს
განმარტება თავის არსებისა. კარგად იცის, მას
ადამიანი ეწოდება, როგორც მის მსგავსს სხვებ-
საც. და იმანაც-კი, ვისაც ამ ერთი თვის წინად
იმისმა მხლეებელმა თავი ჩაუჩეჩქვა, თავის თავს
ადამიანი უწოდა. მაშ...

— უააა! — ამ დროს მოისმა შორი-ახლო-
დან თავზარდამცემი ლრიალი.

ტაიპთ ყურები სცენიტეს, ძოვნა შეაჩე-
რეს და მოუსვენრად ფეხების ბარტყუნი დაი-
წყეს...

სეფის-წულმა იცნო მხეცთა მეფის ლრია-
ლი და ყურადღება სრულებითაც არ მიაქცია.
ის ისევ თავის ფიქრებს მიეცა: „ისიც, მეც და
სხვა მრავალი, — ფიქრობდა სეფის-წული, — ადა-
მიანები ვართ. აგერ გადაშელართულებს სძი-
ნავთ. ეგენიც ადამიანები არიან. მსგავსი მზისა
უბინდოისაც ადამიანია?! ადამიანია. მეც და

სხვანიც დავდივართ, ვსვამთ, ვიბრძვით, ვქორწილდებით და ბოლოს ერთი წამი და...“

შეშლილის გვამი ცხადად ეკლაკნება თვალ-წინ. მკაფიოდ მოისმის მისი პასუხი... „ეს ხომ, აგერ, ტაიჭო, სხვა ცხოველთაც ემართებათ?! თვით იმ მხეცთა მეფესაც იგივე მოელის, რომელმაც ასე მედიდურად დაიღრიალა... მაშ...“

თითქოს მისმა სხეულმა იგრძნო საფრთხე, რომ სულ უნებურად მიიხედა ტყისკენ. ფეხზე წამოხტომა ვერც-კი მოასწრო სეფის-წულმა, რომ მხეცთა მეფემ ტყის ნაპირიდან შეჰკრა კამარა და... საშინელი ჰექა მოისმა. სეფის-წულმა ჯდომელამ სწორედ დროზე მოუქნია ლახტი და ლომს თავი შუაზე გაუპო. მხეცთა მეფე მის წინ უსულოდ დაეცა და მხოლოდ რამდენჯერმე გაიკლაკნა...

არაჩვეულებრივ ჰექაზე ტაიჭნი ყალყზე შესდგნენ, ბუმბერაზნიც წამოიშალნენ, მაგრამ გამოუფხიზლებელი თვალები უასროდ აქეთ-იქით მიატრიალეს, შეიშმუშნენ, ისევ მიწვნენ და ლრმად ქშინვა დაიწყეს...

თუმცა ყოველივე ეს სწრაფად მოხდა, სეფის-წულმა მაინც მკაფიოდ შენიშნა და ტუჩებზე მწუხარების ლიმა გაუელვა: „აპა, ისაც

და ესაც უხმოდ, — წარმოსთქვა სეფის-წულმა, — თავ-ჩაჩეჩვილნი უსულოდ ჩემ თვალ-წინ გაიკლაკნენ. ორსავე ხვედრი ერთი და იგი-ვეა... მაშ, რაღაა ადამიანი?!“

„ადამიანი... ადამიანი... ეჰ!“ — სახის და-კმახვნით მხრები აიჩეჩა და ზიზღით გადა-ხედა ბუმბერაზთ, თითქოს ისინი ყოფილი-ყვნენ დამნაშავენი, რომ კითხვა ვერ განმა-რტა... „შეუძლებელია, ადამიანი ცხოვრობ-დეს და კი არ იცოდეს, რას წარმოადგენს, რა აღილი უჭირავს სხვა ცხოველთა, მცენარეთა და სხვათა შორის!.. ჯერ ეს უნდა შევიგ-ნო და შემდეგ მზისა დარიც იქნება და მეფო-ბაც... მანამდის-კი — არც ერთი...“

„ჯერ... მაგრამ როგორ, როგორ გამო-ვარკვიო, როდესაც ყოველ უამს ხელს გიშ-ლიან და მოსაფიქრებლად ერთ წუთსაც თავი-სუფლად არა გტოვებენ?!“

„არა! ასე შეუძლებელია!.. უნდა გა-ნვმარტოვდე, წავიდე, გადავიკარგო. არავინ არ უნდა იცოდეს ჩემი სამყოფო. მხოლოდ მა-შინ შემეძლება ახსნა, განმარტება!..“ — გარდა-წყვეტით წარმოსთქვა და ზეზე წამოდგა...“

III

...—ოხ, მშვენიერებავ!..—ხმის კანკალით წარმოსთქვა მოხუცმა, პალაზას *) ქვეშ რომ, უითა ბრინჯაოსაგან გამოქანდაკებულს, ქალს თვალი მოჰკრა, და ნაბიჯი წინ ვეღარ გადადგა, თითქოს ეშინოდა, ქალის მყუდროება თავის მოძრაობით არ შეერყია.

დიდხანს, დიდხანს იღვა დამუნჯებული მოხუცი, რომელსაც გულზე ქვის ფიცარი ჰქონდა მითარებული და სუნთქვაც-კი შეუდგა. უმზერდა მოხუცი ლრმად ჩაფიქრებულს ახალგაზდა ქალს, მის დახუჭუჭებულ თმას, რომელსაც გვირგვინად პალაზას მშვენიერი ყვავილები დასდგომოდნენ, მის აღგზნებულ თვალებს, რომლებიც ერთ წერტილს მისჩერებოდნენ; მის ოდნავ მოძრავ მკერდს, მკლავებს; მის ერთადერთ სამკაულს, რომელიც ბუმბულისაგან შესდგებოდა და ქალის ხოლოდ-შობილებას წელს ქვევით მუხლებამდის ჰფარავდა; მის წვივებს, მთლიად მის სხეულს, რომელსაც არავითარი სინჯი, უსწორ-მასწორობა არა მოეპოვებოდა-რა, და მთლიად ენ-პამ შეიპყრო.

*) „პალაზა“ სეა, მშკენიერ წითელ ყვავილებს და უვარების ნაყოფს ისხამს.

თვალთ აუჭრელდა მოხუცს. პალაზა თავის მშვენიერი ყვავილებით თანდათან დიდდება, ფართოვდება; ჩქარა სივრცედ გარდაიქმნა, რომელშიც მხოლოდ მშვენიერი ყვავილები დაუკრავენ და მათ შორის უმშვენიერესი ასული...

„ტქუუ!...“ — მწარედ წაითშუილა მოხუცმა და შიშისაგან ტანში ქრუანტელმა დაურბინა.

ეგონა, ქალი ეგ-ეგ არის სივრცეში გაიძნევა, ყვავილებში აირევა და სამუდამოდ დამეკარგებაო. თვალები მაგრად დაისრისა და როდესაც გაახილა, ისევ ის ხე, ისევ ის ქალი ხის ძირზე მხრით მიყრდნობილი დაინახა. სხეულის თახთახმა აიტანა მოხუცი: მკლავები, მუხლები, მთლად მისი სხეული, ყოველი წერტილი. მისი სხეულისა თრთის, კანკალებს... უხარისან მოსუცს, რომ ასული ისევ მის ახლოს არის, მაგრამ ვერ გაუბედნია მივიდეს, მიუახლოვდეს. ისიც ველარ მოუხერხებია, აღარ იცის, საით გადაადგას ნაბიჯი, რომ მიუახლოვდეს.

ჭაბუკურ ვნებათა-ლელვას ვეღარ შეუძლო მოხუცის სხეულია. თხთხი შეუდგა, ძარღვები მოუუძლოურდა და ლაფანივით ჩაეხვია. თიოქოს თვალთაც დაუბნელდა, მის გონებას რა-

ლაც გაეკრა, შეპბოჭა მისი თავი და აზროვნება
შეუყენა...

კარგა დრომ განვლო, ვიღრე გონს მოვი-
დოდა მოხუცი...

„ოხ!...“ — მისუსტებულის ხმით წამოიძახა
მოხუცმა და გამოურკვეველი, სხეულის სასია-
მოვნო სისუსტე იგრძნო, როდესაც მისმა თავ-
მა აზროვნება დაიწყო.

ალარა ახსოვდა-რა. მხოლოდ ერთს სასია-
მოვნო გრძნობას შეეპყრო, რომელიც მთლად
მის სხეულში გაბნეულიყო და ასე მძლავრად
მიესუსტებინა. სხეულის ყოველი წერტილი
სტეხავდა, მაგრამ სასიამოვნო ნეტარი ტეხა
იყო, და უნდოდა, სწყუროდა დიდხანს გაგრ-
ძელებულიყო ეს სიამოვნება....

— ვიჰ!.. — უნებლიერ წამოიძახა, როდე-
საც უეცრად თვალი მოპკრა თავის დამბნედავს,
და სწრაფლ ზეზე წამოიჭრა.

ტეხვა, ნეტარი ტეხვა დაეკარგა. ძალა
მოიკრიფა და ფეხ-აკრეფით ქალს მიუახლოვ-
და...

— ვინა ხარ, მშვენიერო, ქვეყნად ვინ
მოგავლინა?! — ჩუმად ნიავივით ჩუმად ეჩურ-
ჩულება მუხლ-მოლრეკილი მოხუცი: — იქნება
განრისხებულმა კუვერამ ჩემ სანუგეშოდ ქვეყ-

ნად გადმოგაგდო?! *) მაგრამ რას ვამბობ?!
ნუ თუ შენი სიმშვენიერე კუვერას წინ, რაც
უნდა დიდი დანაშაული გქონდა, არ დაჰტა-
რავდა?! არა!.. იქნება, როგორც ეს ხე, მშვე-
ნიერი ხარ და ამისავით უსარგებლო?! შენც...

ქალი ისევ ისე გაშტერებით მისჩერებოდა
სივრცის ერთ წერტილს და მას მოხუცის ბასი
არ ეყურებოდა.

მოხუცმა ვეღარ მოითმინა, ხელი წაავლო
ქალის ერთა-დ-ერთ სამკაულს და ოდნავ დასწია.
ქალმა იგრძნო. ის ვერხვის ფოთოლივით ათრ-
თოლდა და მშველივით განზე გახტა, სამკაული-
კი მოხუცს ხელში შერჩა....

— ჰაა, ჰაა!.. — ერთი-ორჯერ დაბნევით და
ტანის კანკალით წამოიძახა მოხუცმა, შემკრთალ
ქალს რომ თვალი მოჰკრა, და მერე...

მერე იგი გონება მიხდილი იქვე გაგორდა...

— უეჭველად ბრამინთაგანი იქმნები?! —
როდესაც, როგორც იყო, ქალმა მოასულიერა
მოხუცი და თავისი სამკაული ისევ გაიკეთა, ამ
კითხვით მიჰმართა.

*) კუვერა ლმერთია; ინდოელთა რწმენით მას ახვევია
მშვენიერ მხევალთა გუნდი და რომელიც მათგანი გაარისხებს,
დასასჯელად ქვეყნად, კაცთა შორის, ისტუმრებს („რამას
განდევნა,“ ს-ლის თარგმანი).

— არა, მშვენიერო. მე... მე... — ხმის კანკალით ეუბნება მოხუცი: — მე სეფის-წული ვარ...

— შენ? — განცვიფრებით დაეკითხა ქალი და, თითქოს რაიმეს იგონებსო, შუბლი შეიჭმულია და ღრმად ჩაფიქრდა.

— ჰო... ჰო, მე სეფის-წული ვარ...

— ძალნო ცისანო! — ხელების მაღლა აპყრობით ცოტა ხნის სიჩუმის შემდეგ წამოიძახა ქალმა და გაკვირვებით მიმართა მრხუცი: — ნუ თუ შენ ის სეფის-წული ხარ, რომელზედაც ზღაპრად მოგვითხრობენ?!

— როგორ თუ ზღაპრად?! — განცვიფრებით ვე დაეკითხა სეფის-წული...

— ამ ოცდაათის წლის წინად... — დაიწყო ქალმა...

— როგორ თუ ოცდაათის წლის წინად?!

— ჰო, რას გაიკვირვე?.. გუშინაც მაგრე მიაშბო დადა-ჩემმა... იყო გმირი; იმისთანა, — ამბობდა დედა-ჩემი: — დედამიწის ზურგზე არ დაბადებულიყოვთ... მამას უნდოდა მეტობა გარდაეცა, მაგრამ მეფობის გარდაცემამდის ჯერ ცოლის მოსაყვანად გაგზავნა და თან რჩეულნი ბუმბერაზნი გააყოლაო...

— ჰო... ჰო, მართალს ამბობ, მართალს, მერე?

— მერე, თურმე იმ ღამეს მინდორში ლომი გოეკლა და თითონაც სადღაც გადავარდნილიყო... ამის შემდეგ მისი გზა და კვალი დაიკარგა...

— ღმერთო, ღმერთო!.. ნუთუ ოცდა-ათი წელიწადია მას შემდეგ?!

— მაშ, შენ ხარ ის სეფის-წული?

— რომელიც შენ ასწერე, ისა ვარ, მაგრამ ოცდაათი წელიწადი...

— აჯ, სეფის-წულო! — სიტყვა აღარ და-ათავებინა ქალმა, იგი ფეხ-ქვეშ ჩაუვარდა და მის ფეხებს კოცნა დაუწყო...

სეფის-წული დაიბნა... მის სიამოვნებას საზღვარი აღარა ჰქონდა... თვითონაც ჩაიკეცა და ქალი გულში ჩაიკრა. სრულებით მოულოდნელი იყო იმისთვის ამისთანა შედეგი...

— სეფის-წულო!..

— მშვენიერებავ!..

ერთი-ერთმანეთს აღარ აცდიდნენ სიტყვას. ორივე თრთოდა, ორივე ვნებად იყვნენ გარდა-ქმნილნი.

— ვუშინ დედა-ჩემს ვუთხარი...

— მშვენიერებავ, რას მოვიფიქრებდი...

— ის ცოცხალი იქმნება და მოვა-მეთქი... გმირთა-გმირი...

— ჰაა?!.. შენ... მშვენი...

— გმირთა-გმი....

— ყიიიპ!... — უეცრად დასჭურივლა შორი-
ანლოს ფარშევანგმა და ტყეს აუწყა გმირთა-
გმირის დაბრუნება....

IV

....მთლად მოკუმშულა სეფის-წული. პალა-
ზას ქვეშ მოკეცილა, ზის და ჭირის ოფლს ას-
ხამს. ეწვის ტანი. სხეულის ჩხვლეტა, ტეხვა
აქვს... განძრახვისა ეშინიან.... ეშინიან უკან
მიხედვისა. პგრძნობს მის სიახლოვეს. თვალით
არ უმჩერს, მაგრამ ჰედავს-კი, რომ იგი, რო-
მელსაც ამ რამდენისამე წამის წინ გულში სიყვა-
რულით იკრავდა, რომელსაც უერთდებოდა,
გულ-ხელ დაკრეფილი მის უკან სდგას და ზიზ-
ლით უცქერის... ოთხ, რა ცეცხლის მფრქველი
თვალებია!.. თვით ყოველი არსების შემმუ-
სვრელ აგნისაც არ ექმნება მაგეთი მრისხანე
თვალები!... შუბლზე ხელი მოისვა, ჩაიჭყლიტა
თვალები სეფის-წულმა და მწარის ღიმილით
თავი გაიქნ-გამოიქნია. ამ დროს თვალი მოჰ-
კრა მის წინ მგდებ ქვის ფიცარს და, თითქოს
პირველად ჰედავდესო, გულმოდგინედ კითხვა
დაუწყო ჯვარედინად ზედ აღწერილს:

ჭრი, გაცო!

„ნურას დროს ნუ დაქ
კითხები შენ თავს: რა
არის ადამიანი!“



„უღელ-გვარ მოვლენას
შენ ცხოვრებაში გულ-
გრილად შეხვდი!“

„ეცადე, შენი ცხოვრება მხრა-
ლოდ სიამოვნებით გაატარო!“

— გულ-გრილად შეხვდი!.. მხოლოდ სია-
მოვნებით გაატარო!.. ხა, ხა, ხა!.. ხა, ხა,
ხა!.. — დაიწყო გაბრაზებულმა საშინელი ხარ-
ხარი და ამავე ხარხარით განაგრძნო: — ოც და
ათი წელიწადი, ჰოი, ადამიანო, იტანჯე, იწვა-
ლე; რამდენი მწარე ცრემლი აფრქვიე, რომ ეს
სისულელე დაგეწერა?! მთელი შენი ძალა შეა-
ლიე და ეხლა... ეხლა რატომ ვერ მისწვდი
სიამოვნებას, როდესაც შემთხვევა გქონდა, ან
რატომ გულგრილად არ შეხვდი ამ შენს უძ-
ლურებას?! ააა!.. ხა, ხა, ხა!.. ადამიანო,
ადამიანო?! — ზეზე წამოიჭრა და ქვის ფიცარი
ზედ აღწერილი სამი მცნებით მაღლა ამართა...
— რა ხარ, რა, ადამიანო?!. — დაიღრიალა
სეფის-წულმა და ისე მაგრა მოუჭირა ქვის ფი-
ცარს ხელები, რომ თითქოს მის დაქუცმაცებას
ლამობდესო.

„ხა, ხა, ხა, სისულელე!..“ მკაფიოდ მოე-

სმა ნაცნობი ხმა შეშლილისა და მისი ქვის კა-
კუნი....

სეფის-წული გამოერკვა. ქვის ფიცარი—
ოც და ათი წლის ნაშრომი—ძლიერად მიანარ-
ცხა პალაზას ძირს და ლუკმა-ლუკმა შემუსრა.
მასთან ერთად თითქოს თავისი ძალაც მიაყო-
ლაო, თვითონაც შეიმუსრა და იქავე ჩაეხვია.

ქალის მრისხანება-კი განცვითრებად შეი-
ცვალა ამ სურათის შემდეგ....



„უცნაურია, უცნაური!“*)

(ფსიხოლოვიური ეტიუდი)

I

— ეჰ, მეგობარო, რაი უნდა გითხრა? — მოკლედ უპასუხა ამნონმა და ცრემლ-მორეული თვალები მოაშორა მეგობარს, რომ მას ეს სისუსტე არ შეენიშნა.

ამნონმა ჩაჟინებით მზერა დაუწყო ჩამავალი მზის უკანასკნელს სხივებს, რომელნიც მოწიწებით ეტრფოდნენ და ეალერსებოდნენ ლიბანის მთის მწვერვალებს და, თითქოს განშორება ეძნელებათ და თანაც თავის უფლის წყენა ერიდებათო, რომელიც თან-და-თან ისრუტავდა და თავისკენ იწვევდა მათ, — თრთოლვით მიელვარებოდნენ მზისკენ და მთის მწვერვალებისკენ. მაგრამ ამნონი ამჩნევდა-ლა ბუნების მოვლენის მშვენიერებას?! მზე, მთოვარე, მთები, ზღვა და ხმელეთი გაერთებული იყო მისთვის. იგი ვერა ხედავდა ვერც დღე და ვერც ლამე, გარდა...

*) დაბადება. მეფეთა წიგნი ბ, თავი იგ.

— ამნონ,—ნაზად ხელი მხარზე დაადო მე-
გობარმა და მომხიბლავის ხმით ჩასჩურჩულა:—
ნუ იუკადრისებ ჩემ სიტყვებს, სეფის-წულო, თუ
გავკადნიერდები და ცოტაოდენ შენდა საწინა-
აღმდეგოს ვიტყვი. გახსოვს, მარწმუნებდი: ერ-
თად-ერთი მეგობარი შენა ხარ, რომელთანაც
დაფარული არა მაქვს-რაო... ეხლა-კი რას ვხე-
დავ?! აპა, გულ-ჩათხრობილი მეგობრის წინა-
შე სდგეხარ და სდუმ!.. ნუ იტყვი, ჩემო ამნონ,
ვითომ არავითარი საიდუმლო გულში დამარხუ-
ლი არა გქონდეს... რაც უნდა თავი იმართლო,
შენი სახის გამომეტყველება მაინც გაგამტყუ-
ნებს...

— იონადაბ, მიყვარს, მიყვარს, იონადაბ!..
უეცრად მოტრიალდა ამნონი მეგობრისკენ და
ამ სიტყვებით, თითქოს დედის მკერდი უპოვ-
ნიაო, ისე ჩაეკრა იონადაბს გულში და ჩუმი
ქვითინი აუვარდა...

— ვინ?..—რამდენისამე წამის სიჩუმის
შემდეგ დაეკითხა იონადაბი.

ძლიერად გაუკვირდა იონადაბს, რომ სეფის-
წული ასეთ კემუნვას მისცემია ამ მცირე მიზე-
ზის გამო. იონადაბს ვერ წარმოედგინა, თუ
ვინმე ისეთი ასული მოიპოვებოდა ისრაელთა
შორის, რომელიც სიხარულით არ მიეგებებო-

და ამნონის სიყვარულს, და განცვიფრებით მიმართა იონადაბმა:

— მეგობარო, ჭმუნვა შენი მაკვირვებს. ისრაელთა შორის რომელი ასული არ ოცნებობს შენ გამო?! სიჩმარშიაც-კი რომ ეზმანო, მაშინაც აღტაცებით უამბობენ თავისებს და შენ-კი...

— არის, არის ისეთი ასული ისრაელთა შორის, ჩემო იონადაბ, რომელიც ზიზლით შეხედავს ჩემს სიყვარულს! — უეცრად სიტყვა გააწყვეტინა ამნონმა იონადაბს და გაშტერებით მზერა დაუწყო...

— ვინაა მაგეთი შტერი, არ მეტყვი?!

— არა!.. არა!.. — მწარის ღიმილით გრძელი ხუჭუჭი თმა ოდნავ შეარხია და განაგრძო: — იგი შტერი არაა!.. იგი თამარია, დაი აბესალომისა... — ხმის კანკალით წამოიძახა უკანასკნელი სიტყვები და თავი ჩაღუნა...

თამარის ხსენებაზე იონადაბის მოსაზრებამ იყუჩა.

რამდენსამე წუთს იონადაბი თავს ძალას ატანდა, მაგრამ თავი არ ემორჩილებოდა. არც ავი და არც კარგი მის გონებას არ მიეკარა, ისე ძლიერად იმოქმედა ამნონის უკანასკნელმა სიტყვებმა.

იონადაბის სიჩუმე გაკიცხვის ნიშნად მიიღო

ამნონმა და ამის გამო მისთვის ეს წუთები აუტანელ წუთებად გარდიქმნენ: ტანმა წვა დაუწყო, სხეული ოდნავ შეუსველდა და სუნთქვა თან-და-თან გაუძნელდა. სცხვენოდა თავი მაღლა აეღო და იონადაბისთვის შეეხედნა. თან ემდურებოდა კიდევაც იონადაბს, რომ თამარის სახელი წარმოათქმევინა. აკი გადასწყიტა, საფრთხოამდის თავისი სიყვარული არავისთვის გაემუდავნებინა, თამარის სახელი საფლავში ჩაეტანა, და ეხლა-კი იონადაბმა, საუკეთესო მეგობარმა, წააცდინა და ათქმევინა. „იონადაბ, იონადაბ! — იძახდა უსიტყვოდ გულ-ჩაკლული ამნონი: — რისთვის გამომტეხე?.. განა იმისთვის, რომ გაგეკიცხე?!”

— ამნონ, — დინჯად მიჰმართა იონადაბმა, — თამარის სახელმა სულ თავრეტი დამახვია. შენი სიყვარული უნუგეშოა...

— ეგ მე კარგად ვიცოდი და ამისთვის არ მინდოდა გამომუდავნება!.. — ცოტა არ იყოს წყრომით გააწყვეტინა სიტყვა ამნონმა.

— ცოტა მომითმინე, სეფის-წულო, — საყვედურის კილოთი გააჩუმა ამნონი: — უნუგეშოდ, — განაგრძო იონადაბმა, — მეჩვენა პირველ ხსენებაზე, მაგრამ საქმეს მოევლება.

— როგორ, იონადაბ, როგორ?! — უეც-

რად სახე გაუბრწყინდა და აღტაცებით მოეხვია
ამნონი...

— მამა-შენს, ვერც არავის სხვას ვერ გაუმ-
ულავნებ შენს სიყვარულს. ყველა უგუნურებად ჩა-
სთვლის შენს გრძნობას. რაც უნდა იყოს, თამარი,
თუმცა დედით სხვა-და-სხვანი ხართ, შენი დაა...

— აკი მაგისთვის ვიყავ გაჩუმებული!.. —
დალვრემით წამოიძახა ამნონმა.

— ჰო, კიდევაც სჯობია არავის გაუმულა-
ვნო და ასე მოიქცე: მოიავადმყოფე თავი.

— მერე?!

— მეფე რომ მოვა შენს სანახავად, უთ-
ხარი: „მოვედინ აწ დახ ჩემი თამარ, რათამცა
მომცეს მე ჭამადი და მიქმნეს წინაშე თვალთა
საჭმელი, რათა ვიხილო და ვჭამო ხელისაგან
მისისა...“

ამნონი, როდესაც იონადაბი ამას ამბობდა,
კანკალმა აიტანა და ვეღარ მოითმინა, რომ
არ დაჰკითხებოდა:

— მერე?

— მერე, ჩემო მეგობარო, თამარი შენ
ხელთ იქნება. თუ ნებით არ დაგყვა, ძალით
იხმარე. შემდეგ იქნება ყველამაც გაგკიცხოს,
მაგრამ ძალა-უნებურად ყველა შეურიგდება ამას
და თამარი სამუდამოდ შენი იქმნება...

— ოხ, მეგობარო!.. — ცოტა სიჩუმის შემ-
დეგ წამოიძახა ამნონმა და იონადაბი მხურვალედ
გულში ჩაიკრა...

II

„...—განსდევნენით ყოველნი კაცნი ჩემ-
გან!..“ — დაიძახა ამნონმა, როდესაც მეფე და-
ვითის ბრძანებით თამარი მივიღა ძმასთან, და
მყისვე სურვილი შეუსრულეს ამნონს...

— თამარ!.. — მიჰმართა მთლად გრძნობად
გარდაქმნილმა ამნონმა თამარს, როდესაც იგინი
მარტოდ დარჩნენ ოთანში: — „მომიღე მე ჭამადი
შინაგან საწოლსა და ვჭამო ხელისაგან შენისა.“

„და ალილო თამარ შერთული, რომელი
შეწვა და მიართვა ამნონს — ძმასა თვისსა — ში-
ნაგან საწოლსა და წინა დაუდვა მას, რათა ჭა-
მოს მან...“

ამნონი ფერ-მიხდილი გაშტერდა და შუბ-
ლის ჭმუნვით რამდენისამე წუთის სიჩუმის შე-
დეგ მიესვენა სარეცელზე...

— თამარ, — ხმის კანკალით ძლიერ მიჰმარ-
თა თამარს: — „მოვედ და დაწე ჩემთანა!..“

— არა, ძმაო ჩემო, — წყნარად მიუგო თა-
მარმა: — „ნუ გამკიცხავ მე, ვინათგან არა ჭმილ

არს ესრედ ისრაელთა შორის. ნუ ჰყოფ უგუნურებას აჩას... მე სად დავთარო უპატივობა ჩემი...“

— თამარ!.. — ტახის ურუოლით წამოიძახა ამნონმა და მკლავში ხელი წაავლო...

— ნუ, ნუ, ჩემო ამნონ!.. — ლმობიერად შეეველრა თამარი: — თუ ძალას იხმარ, „შენ იქნები ვითარცა ერთი უგუნურთაგანი ისრაელთა შორის“... სჯობია, „ ეტყოდე მეფისა მიმართ, რათა არა განმყოს მე შენგან...“

თამარის სიტყვებმა ზეგავლენა იქონიეს. ამნონი შეტორტმანდა, ზეწამოდგა და ერთ წამს ფიქრობდა და მოემზადა კიდევაც მის წინ მუხლი მოედრიკა და პატივება ეთხოვნა, მაგრამ იონადაბის სიტყვები უეცრად ყურში ჩაეწვეთნენ: „ისა სჯობია, არავის გაუმულავნო... „თუ ნებით არ დაგყვა, ძალა იხმარე...“ ამ სიტყვებმა ამნონს გონება დაუბნელეს. თამარის წარმტაცმა სახემ, მისმა უმანკოებამ ცეცხლი წაუკიდეს და...

მთლად შემოაფუკვნა კრელი სამოსი, რასაც მეფის ასულნი, „მყოფნი ქალწულობასა შინა, იცვამდნენ...“

III

განთიადია. მამლებმა მოუხშირეს ყივილს. აქა-იქ მამლების გარდა სხვა სულდგმულნიც, უფრორე სასახლის კარის მცველნი და დარაჯნი, ოდნავ მორიდებით ახმაურდნენ, რომ დიდებულთათვის ძილი არ დაეფრთხოთ. მაგრამ სასახლეში დიდებულთ ტკბილად ეძინათ და არავითარი ხმაურობა სასახლის გარედ არ გამოარკვევდა ძილისაგან. მხოლოდ ამნონს არ სძინავს. მამლებსაც არ ეყივლათ, რომ იმან გამოიღვიძა და მხართებოზე წამოწოლილი გატაცებით დაჰყურებს ვის?.. ვის და თამარს, რომელსაც მოუკრთის ჭრაჭის შუქზე ოდნავ თავის თმით წაფერფლილი გულ-მკერდი, დრო-გამოშვებით მოლიმარი ბაგენი და...

— ღმერთო, ღმერთო!.. — მალი-მალ გაიძის ამნონი და თვალს ვერ აშორებს ტკბილად მიძინებულ თამარს...

გუშინ ამ დროს შორიდან ძილ-გამკრთალი ოცნებობდა, გარს უვლიდა თამარის ოთახს მოწიწებით და ოხერით... შორით თაყვანს სცემდა, მის ფეხის მტვერს ეამბორებოდა, მისი სიმშვენიერე გულში ჰქონდა ჩასახული ხატად

სათაყვანებლად და ყოველ წეტს მასთან იყო
განუშორებლივ...
ეხლა?!

ეხლა-კი, აი, თამარი გვერდით უწევს, მას
სულ რამდენიმე ჟამის წინ სრესდა, ძალას
ქმარობდა მასზე... იგი დამორჩილდა თავის
ხვედრს ისე, როგორც სხვანიც დამორჩილდე-
ბოდნენ; მანაც უდარდელად მიიძინა, როგორც
სხვებიც მიიძინებდნენ... სხვებიც, რომელთაც
ამნონი არც-კი შეხედავს, თორემ მათთვის ხომ
ლამეებს არ ათევს, როგორც თამარისათვის...

დასცეკერის ამნონი და გონს ვერ მოსულა,
თუ ის თამარი, რომელიც მის სათაყვანებელ
არსებად გარდაქმნილიყო, გვერდით როგორ
უწევს ყოველი უბრალო მომაკვდავივით... „ან
ის თამარი-კი არის?!.“ — უეცრად დაეკითხა
თავის თავს, უფრო ჩაჟინებით დაუწყო მზერა
მიძინებულ თამარს...

თამარი ამ დროს ოდნავ შეინძრა, გულზე
დასვენებული ხელი ასწია და მოწყვეტით გვერ-
დზე ამნონის ხელს დაეცა... თამარის ხელის
მოხვედრაზე ელვასავით ურუანტელმა დაურბინა,
ტანი შეუირთოლდა და თვალების ბაიები დაუ-
განიერდნენ...

უეცრად თამარს მაგრად წაავლო ხელი

მკლავში და, თითქას უნდოდა თავისი ტეინის ტკივილი ამით გაექარწყლებინა, რამდენჯერმე შეარყია.

— რაა, რაა?! — სიმწვავით წამოიკვნესა ძილში თამარმა:

— ვაა... ჰაჰაჰა!.. — მოუდუნდა ამნონს ძარღვები და ქვითინი აუვარდა.

ამნონი ქვითინებდა, ქვითინებდა და თან თავის უნებურად თამარის მკერდში თვალებს მალავდა... ქვითინებდა ამნონი, რომ ასეთი მოულოდნელი შედეგი მოჰყვა მის საქციელს. თამარის სამუდამოდ შეერთება უნდოდა და ამის მაგივრად-კი, სამუდამოდ დაჰკარგა... გულიდანაც-კი ამოეგლიჯა მისი ხატად ჩახატული სახე და სადღაც ჰაერში გაიბნა... ქვითინებს, რომ ის ხატიც ველარ უპოვნია, თორემ თითონ დედანი ხომ...

— ეს, ეს!.. — გაიძახის ამნონი უნუგეშოდ:
 — ეს თამარი... არა, არა!.. ეს მჩვარია, მჩვარი, რომელსაც ვსრესავ, ვთელავ!.. ის თამარი მშვენიერება იყო, უმანკოება, მას თაყვანს ვსცემდი, მის წინ მუხლს ვიდრეკდი და... ახ!.. ჰაჰა!.. — კიდევ უფრო მწარედ მორთო ქვითინი და თავი მაგრა დააჭირა თამარის მკერდს.

— అనున్, అనున్?! — దాత్యేతింగెబ్బుల్లి తా-
మార్కి శ్వేతిత్కా అనున్.

తామార్కిస కొ సార్కివ్యిత మంచ్వదా అనున్. మాన్
శ్వేతాడ శ్వేష్ట్యువిత్తా క్వితిక్కి లా నుప్పునుర్కాడ దా-
శ్వేష్ట్యు మంగ్రో తామార్కిస...

తామార్కి శ్వేతా, శ్వేష్ట్యుల్లా మిసి త్వాల్యై-
బిసా లా దాథ్నెవ్యిత దాయ్కిత్కా:

— అనున్, రా మంగివ్యిదా?!

— శ్వేన్ ఎఫ్ రాస ఎక్కెత్తెబ్ అన్ విన్చా కొర్?

— అనున్, గున్స మండి!..

— గ్యేకిత్కేబ్భి: విన్చా కొర్?

— లమ్మేర్తం కీమ్మ, వ్యేలార్మ మిన్నంబ్, అనున్,
మ్యే తామార్కి వార్!..

— తామార్కి!.. — దాల్ర్యేజిత చ్చామందిశా శ్వేదా
తావ్యి గూర్చింది.

— అనున్?!

— గాహ్యమండి, శ్వేన్ మిహివార్కి కొర్, రంమల్లిస
దాత్యుల్లైతా, దాక్కుప్రమాప్రేబాప్ శ్వేమిందిల్లింది!.. — దాం-
ల్ర్యులింది అనున్నమా లా తమాశి క్యేల్లి చ్చావ్యుల్లి...

— అనున్, రాస శ్వేర్యేబ్భి? — శ్వేతాడ మంగ్రో
చ్చామంకొక్కిల్లి శ్వేవ్యేదర్మ తామార్కి...

— దాంక్యార్గ్యే, దాంక్యార్గ్యే ఎక్కేదాన్!.. — దాం-
శ్వేతాడ అనున్నమా లా కొండిత క్యేల్లి క్యుర్కా... — మంగ్రో-
కొర్, మంగ్రోకొర్!.. విలాప్ కీమార్కి దాగడ్యేబ్బుల్-
కొర్ ఎఫ్!..

— ნუ, ამნონ, „რამეთუ სიბოროტე უფროს
არს უკანასკნელი უფროს პირველისა, რომელი
ჰქმენ ჩემთანა, რომელ განმიტოვებ მე..“ —
ცრემლით შეევედრა თამარი, მაგრამ ამნონი ისე
აღივსო სიძულვილით, რომ მისმა ცრემლებმა
უფრო გააბრაზეს.


„... სიმშვენიერე უმანკოებასთან შეერთე-
ბული ცრემლს არ დაჰლვრის... მას უნდა ევე-
დრებოდნენ და მუხლს უდრეკდნენ და არა იგი
სხვას... ეს...“

— დაიკარგე!..

— ამნონ!..

— ყმანო, „განაძე აწ ესე ჩემგან გარე
და დახშ კარი უკანა მისსა!“ — მოუწოდა ყრმა-
თა და უბრძანა ამნონმა.

ყრმათა სწრაფად შეასრულეს სეფის-წულის
ბრძანება და თან უსიტყვოდ გაკვირვებით გაი-
ძახოდნენ: „უცნაურია, უცნაურია“ -ო...



„ჩემი თავ-გადასავალი.“

(ფერი)

ის იყო მცრემლავი ცა აიჭიჭყნა, ცრემლვა ჟესტყვიტა და უმწვაო, ოდნავ მთბობ მზის სხივებს აქა-იქ აღგილი მისცა. ხარბად გამოსრიალდნენ მზის სხივები და ჩაყვითლებულ არე-მარეს, თითქოს დიდის ხნის უნახავები იყვნენო, აღგზნებით ჩაეხუტნენ. ჩემ ცხენსაც ესიამოვნა მზის სხივების გამონავარდება, თავისუფლად ამოიქშინა და თხელ ტალახში ფეხები მარდად ააშლა-პუნა. საჩქაროდ სერზე ამიყვანა და იქ, ღრმად ამოსუნთქვის შემდეგ, შესდგა. არ გავრეცე-ორმავე სერიდან გადავხედეთ ტყეს.

ზაფხულში რამდენჯერმე გამივლია ეს გზა. ამ სერიდან გამიხედ-გამომიხედნია და ყოველ-თვის აღტაცებაში მოვლყვანიჭარ სურათის სიმშვენიერეს. ეხლა-კი პირველ თვალის მიმოვლებაზედვე გული ჩამწყდა. ავერანებულს ჰგვანდა ტყე. თითქმის ყოველი ხის ძირი მოჩანდა. ხედა-ვდი გახოლოდ შობილებულ ხეებს, მცრემლავ ხეებს და, თუ რაიმე სამოსი შერჩენოდათ, ისიც

ჩაყვითლებულიყო, უანგი მოჰკიდებოდა და ჩამოცლას ლამობდა.

არ ვიცი, ჩემი ცხენი რასა გრძნობდა და მე-კი უნებურად გული მეკუმშებოდა დასევდა მბურავდა; ვატყობდი ჩემ თავს, რომ ცრემლიც შეპარებოდა და იქნება კიდევაც გაღმოეხეთქნა თვალთაგან, ამ დროს რომ ცხენს მაგრა არ წაიფრუტუნა და ყურები არ აეცევიტა.

თვალთ მომდგარი ცრემლი უკუ დაბრუნდა, გული გამეშალა და მათრახი ავამალლე, რომ ცხენისთვის გამეტლაშუნებინა...

— ვაიმეჭვ!.. — შემომესმა სწორედ ამ დროს გულსაკლავი ამოკვნესა და ხელი მაღლა დამრჩა.

ცხენმა წაიფრუტუნა ყურებ აცევეტით და გვერდზე გახტა.

— რა ნოგივიდა, შე ბრიყვო!.. — შევუტიე ცხენს და როგორც იყო დავამშვიდე.

— ვაიმეჭვ!.. — უფრო გულსაკლავი კვნესა მომესმა იმავე ადგილიდან, საიდანაც პირველად.

სწრაფლ ცხენი გზის პირას ხეზე გამოვაბი და მე-კი, თუმცა დიდი ტალახი იყო, მეორე ნაპირას გადავედი და ხევში ჩავიხედე; მაგრამ ვერავინ დავინახე...

— ოოჲ, ოჲ!.. — ხევიდან ამომესმა ოხვრა.

ცხენს მივხედე, მეშინოდა, არ დამფრთხალიყო.
ის ყურებ-დაცქეტილი მე მიცქეროდა.

რაკი დავმშვიდდი, რომ ცხენი აღარ და-
ფრთხებოდა, მაშინვე ხევში ჩავირბინე და ერთ
ხის ძირას ორად წელში მოხრილ, მთლად გა-
ზუზნილ, ძონძებში გახვეულ დედაკაცს თავზე
წაფადექი...

— ვინა ხარ, შვილო?! — მაშინვე მწუხა-
რებით მჟიოთხა და დამაშტერდა.

— მგზავრი ვარ, დ—ს მივდივარ. შენი
კვნესა შემომესმა და, აი, ამისთვის ჩამოვედი აქ
ხევში. — ვუპასუხე და მოხუცს გარს თვალი შე-
მოვაცლე.

მეგონა, მოხუცი შეშისთვის წამოსულიყო,
მაგრამ იმის ახლოს გუდურა არა იყო-რა.

— წადი, შვილო, ღმერთმა გზა დაგი-
ლოცოს!

— თუ ნადირმა არ შეგჭამა, სიცივე ხომ
გაგაფიჩხებს, ღამე რომ აქ გაატარო?! ცხენი
აქავე მყავს, შეგსვამ და სოფელში მიგიყვან.

— ეეჸ, შვილო, ცხენზე ჯდომის თავი-და
მაჭვს?!

— მაშ, აი, ეს ნაბადი მოიხვიე და მეც სულ
რამდენიმე წუთის განმავლობაში სოფლიდან
ბიჭებს ამოვიყვან და ხელით წაგიყვანთ.

— ოჰ, რა გულკეოილი რამა წყოფილ-
ხარ?! — ლმობიერად წამოიძახა და ნაბადში გაე-
ხვია...

სულ ნახევარ საათს არ გაუვლია, რომ სო-
ფლიდან ოთხი ახალგაზდა მოვიყვანე და ჯინიც
მოვიტანეთ. ცხენი საღაც წინად ება, იქვე გა-
მოვაბი და ხევში წინ წავუძეხ.

— ი კაი აღამიანი ამ ხევში რამ ჩაიყვა-
ნა?! — გაკვირვებით წამოიძახა ერთმა მათგანმა,
როდესაც ხევს ჩავუდექით.

— უთუოდ ჩაგორდა!.. — სოჭვა მეორე
პასუხად.

— ნეტავ, ვინ იქნება?!

— ეხლა არა ვნახავთ, რალასა ნატრობ?
— უპასუხა მეორემ სიცილით.

მხიარულად ჩავბობლდით ხევში და მე მა-
შინვე ნაბადს წავავლე ხელი და ნძრევა და-
ვუწყე.

— აბა, დედი, აი, ბიჭები მოვიყვანე!

„ხომ არ მოკვდა?!“ უნებურად გავიფიქრე
და კანკალით ნაბადი ავხადე. პირს კატა მეტა.
ნაბადში კარგა მოზრდილი კუნძი იყო გახვეუ-
ლი და ზედ პატარა რვეული იდო.

მაშინვე ოთხი პირი გაიღო და ისეთი ხარ-
ხარი ამოსკდა იქიდან, რომ ხევმა ხმა მისცა...

მთლად გაწმილებულმა ნაბადი მოვისხი და რვეული-კი ჯიბეში ჩავიდე, ჩემი მეგონა.

— რაღასა ვდგევართ, წავიდეთ!.. — წამოი-
ძახა ერთმა.

— უთუოდ მოელანდა რამე!..

ბევრი სხვა რამ დასაცინი წარმოსოქვეს,
მაგრამ მე თავი არ მიმართლებია. სირცხვილით
ხან ვწითლდებოდი და ხან კიდევ ვყვითლდე-
ბოდი.

გონებას ველარ ვიკრეფდი. თითქმის მთელ
ლამეს არა მძინებია. არეული დავდიოდი ოთა-
ხში და დაჯდომასაც ვერ ვახერხებდი. მალი-
მალ მომაგონდებოდა ბებერი, მისი ჩიფჩიფი და
შემდეგ დიდი კუნძი. ამას იქით ჩემი გონება
ალარ მიდიოდა...

„ნუთუ კუნძი ადამიანად მივიღე?! — ვე-
კითხებოდი ჩემ თავს, მაგრამ გადაწყეტილ
პასუხს-კი ველარ ვახერხებდი... — მართლა!“ —
სიხარულით წამოვიძახე განთიადისას და გვაბა-
ნაკის ჯიბეებს ვეძგერე. უეცრად მომაგონდა,
რომ კუნძზე პატარა რვეული ეგდო და ჯიბე-
ში ჩავიდე. თუ ჩემი არ გამოდგებოდა, უთუოდ
რვეული ამიხსნიდა ყველაფერს...“

კანკალით ამოვალაგე ჯიბეებიდან ქალალ-
დები, უბის წიგნი და სხვა ნივთები. ერთში,

მეორეში, მესამეში სულ ჩემი ქაღალდები იყო. თითქმის იმედ-დაკარგულმა მეოთხე ჯიბეს მივყავი ხელი, და, მგონია, ისე არა გამახარებდა-რა, როგორც პატარა რვეულის დანახვამ გამა-ხარა...

სათაურად „ჩემი თავგადასავალი“ ეწერა...

„ჰაბუკო!“ — ისე იწყებდა თავის თავგადა-სავალის მოთხრობას მოხუცი:— „აკან კალებულის ხელით ძლივას მოვახერხე ჩემი თავგადასავალის აღწერა. ეცი პატივი ჩემ მოხუცებულობას და სულ წაიკითხე... ნუ დაიზარებ. ვიცი, დევნი-ლი შეგხვდები სადმე გზაში და როგორმე გად-მოგცემ. ამ რვეულის გადმოცემის დროს იქნე-ბა რაიმე უცნაური ჩავიდინო და წინდაწინვე ბოდიშს ვიხდი. ნუ გამკიცხავ. სხვანაირად შე-უძლებელი იქნება. პირდაპირ-კი სახლში ვერ მოვალ შენთან, რომ ჩუმად დაგიტოვო ეს რვე-ული. ვიმეორებ, ნუ გამკიცხავ და ბოლომ-დის ჩაიკითხე. იქნება, ამას გთხოვ, ოდესმე ეს ჩემი თავგადასავალი გამოამჟღავნო.

„მაშ ყური დამიგდე.

„მე დედა ვარ მრავალი ასულისა; ყველანი მშვენიერები არიან და ყოველ ადამიანს თან ახლავან სიკვდილამდის. სიკვდილის დღეს ეჩვე-ნებიან ხოლმე ადამიანს, წინ გადუფურცლავენ

მის ცხოვრების მატიანეს და შემდეგ ბევრი ცრემლის დალვრისა შორდებიან. მე-კი მათ მოღვაწეობას თვალ-ყურს ვადევნებ. საუკუნის განმავლობაში ერთხელ მაინც ჩამოვუვლი ხოლმე და ვამხნევებ, ან ვშველი ხოლმე მათ მოვალეობის აღსრულებას...

„ჩემ სახელს არ გეტყვი...“

კითხვა შევწყვიტე და ჩავთიქრდი...

„შორით მოვდიოდი,—დავიწყე ისევ კითხვა,—და ჩემ საყვარელ ქვეყანას რომ თვალი მივავლ-მოვავლე, დავნალვლიანდი. მომაგონდა უეცრად წინანდელი დრო, დრო უკიდურესი მდგომარეობისა; მომაგონდა, თუ როგორ გაშმაგებული დავრბოდი მთელი ჩემი სიცოცხლე და ვამხნევებდი ჩემ ასულთ. რანაირის თავ-განწირულებით ვმოქმედებდით?! ბევრი სისხლის ცრემლით ვიტირეთ, მაგრამ ვერა გავაწყეთ-რა.

„დალალულ-დაქანცული, დალვრემილ-დაძმარებული გადავიკარგე და, აი, მხოლოდ ეხლა დავბრუნდი. იქნება იმისთვის დავნალვლიანდი პირველ ნახვაზედვე, რომ წარსული მომაგონდა.

„დრო არ იყო მოგონებისა. საჩქაროდ განვდევნე მოგონებანი და ჩავერიე ხალხში,

რომელსაც არაჩვეულებრივი მოძრაობა ეტყობოდა. ჯერ ვერ მივხვდი მათ მოძრაობის მიზეზს. გამხიარულებული მიველ ერთთან და ჩემ ასულს დავუძახე, მაგრამ არ მეჩვენა და არც გამომეხმაურა.

„ხელმეორედ დავუძახე და მხოლოდ მაშინ-ლა გამომეხმაურა კნავილით. გავცვიფრდი...

„— რას აკეთებ? — შევეკითხე და გონის ვერ მოვდიოდი.

„— გვიშველე, დედი!... — ძლივს ამოიკნავლა მან.

„— მე რას გეკითხები და შენ რა პასუხს მაძლევ? — წყრომით ვუთხარი.

„— რაი ვქნა, მე ბედშავმა!

„გაცეცხლებულმა ხან ერთს ჩავუყარე გულში, ყელში კბილები და ხან მეორეს. მაგრამ, შენ ნუ მომიკვდე, აინუნშიაც არ ჩაიგდეს. უფრო ბრაზი მომივიდა. ნუთუ ჩემი კბილები აღარ ჰასრავენ-მეთქი, დავეკითხე ჩემს თავს და კბილებზე ხელი გავისვი. არა, კბილები კარგი მქონდა. „წავალ, ჯერ აიმ მოხუცს ჩავუსისხლიანებ გულს და შემდეგ მე ვიცი!“ — გავიფიქრე და კიდევაც შევასრულე...

„ჩქარა მოხუცთან შევიპარე. ის განცხრომით იჯდა, სწორედ თავის საქმეზე ფიქ-

რობდა. დავწელი მკერდში და მაგრა დავუწყე
ლრონა...

„— ხა, ხა, ხა! — ტკბილად, ძალიან გულია-
ნად ჩაიხარხარა და ხარხარით განაგრძო: — ბებ-
რულუნ, რით ვერ დარწმუნდი, რომ შენი კბი-
ლები სააშურად გვიღიტინებს და არ გვბასრავს.
წავიდა ის დრო, როცა ჰპასრავდნენ შენი კბი-
ლები...“

„სახტად დავრჩი. ოდნავ ჩავფიქრდი. თუ
კბილები არ მოქმედებენ ამათ გასქელებულ
კანზე, იქნება სიტყვებმა მაინც იმოქმედონ-მეთქი,
გავიფიქრე და მაშინვე სიტყვებს მივმართე.

„— ახ, რა ხუმარა ბებრულუნა რამ ყო-
ფილხარ?! — ხითხითითვე მიპასუხა.

„— რამ გაგაქვავათ მაგრე, რომ ველარა-
ფერს ჰგრძნობთ?!

„— ბებრულუნ, რომ ვიცინი, ეს არაფრის
გრძნობაა?!

„— ეს უკვე მეტის-მეტია! — გაჯავრებულმა
ძლივსლა მოვახერხე სიტყვების წარმოთქმა და
მოურიდებლად, გაბედულად ისევ კბილებს მივ-
მართე.

„— ნუთუ ვერ გაიგე, ბებრულუნ, რომ
შენი კბილები ჩვენს დროში ალარ ვარგანან?!
ნუ ჯიუტობ და მომწყდი თავიდან! შენთვის

არა მცალიან. ისევ ის გირჩევნია, კბილის ექიმთან წახვიდე და ახალი კბილები ჩაასმევინო...

„მისმა სიტყვებმა კიდევაც გამაკვირვეს. საშუალებას თითონვე მასწავლიდა. რაღა დამრჩენოდა, თუ არ მესარგებლნა.

„—გმადლობ, დიდებულო გვამო, ვისარგებლებ მაგ საშუალებით და მერე-კი მერიდე, გულს სულ დაგილადრავ, თუ შენ სამარცხვინო საქმეს თავს არ დაანებებ...

„— კარგი, კარგი, ბებრულუნ!—ხითხითით მიპასუხა...

„ვუთხარი თუ არა კბილის ექიმს ჩემი სურვილი და ვინაობა, ალტაცებაში მოვიდა. მაშინვე სავარძელში ჩამსვა და საუკუთესო გაზები ამოალიაგა...

„— აბა, გენაცვა, პირი დააღე: გავსინჯავ კბილებს, იქნება რომელიმე კბილი კარგი გქოლეს.—ისეთი ალექსით მითხრა, რომ ჩემ მხრით უნდობლობა სამარცხვინო იქნებოდა.

„— არ ვარგა. არც ეს ვარგა... უკანა კბილებიც არ ვარგა... სუყველა უნდა ამოვილო... სათხილე კბილების იმედი მჭონდა, მაგრამ არც ესენი ვარგანან.—სარკის საშუალებით მისინჯავდა კბილებს და თან ლაპარაკობდა.

„მე-კი პირდალებული ეიყავი და თანხმობისა თუ უარის-ყოფის ნიშნად, რადგანაც სიტყვის თქმა არ შემეძლო, თვალებს გჭუტავდი.

„დიდხანს უკირკიტა ჩემ კბილებს და მხოლოდ მაშინდა გამანება თავი, როდესაც პირი ნერწყვით ამევსო.

„— არც ერთი კბილი არ გამოვაღვება შენი საქმისათვის. სუსყველა უნდა ამოილო, — მითხრა ალერსით კბილის ექიმმა, როდესაც სარკე პირიდან გამომილო.

„— მეც მავისთვის მოვსულვარ. მხოლოდ ახალი კბილები მბასრავები უნდა გამიკეთო.

„— აბა, მაგას-რაღა კითხვა უნდა!.. — მიპასუხა და პირი დამალებინა.

„სულ ჭირის მოჭმით დამიწყო კბილების დაძრობა.

„პირველი სამიოდე კბილის ამოლება მემ-წვავა, ვიკივლე კიდევაც. მერე-კი ალარა მეყურებოდა-რა: გონს როცა მოვედი, კბილის ექიმი თავს მედგა და გულულრძოდ ხარსარებდა.

„მისმა ხარხარმა შემაშინა. ვიგრძენ, რომ ცუდ რასმე შიპირებდა.

„— ახალი კბილები როდის იქნება? — კანკალით შევეკითხე.

„— ხა, ხა, ხა!.. არას დროს, ბებრუებუნ,
არას დროს!

„— რაო?!

„— ნუთუ გვინია, ისეთი სულელი ვი-
ყო, რომ კბილები ჩავისხა?! ძლივს ხელთ გი-
გდე და ჩემი ნატვრა შევასრულე. ეხლა ადა-
მიანი თავისუფალია... გაუმარჯოს განთავისუ-
ფლებულ ადამიანს! ვაშა, ვაშა, ხა, ხა, ხა,
ხა!.. მართალია, ბევრს ვერ უსერავდა შენი კბი-
ბილები, მაგრამ ჯერ ბევრია ქვეყანაზე, რომე-
ლთაც შენი კბილებისა ეშინოდა, ეხლა-კი...
ხა, ხა, ხა... ყველას თავისუფალი მოქმედება
მიენიჭება.

„— ეგ... ეგ...— ვლუდლუდებდი თავზარ-
დაცემული...

„— გაეთრიე, გაეთრიე!.. შენთვის არა
მცალიან...— უეცრად ხელი დამავლო და კის-
რის კვრით გარედ გამომისროლა.

„ჩაფუფქვილს, დაძმარებულს ცრემლები
მაღრჩობდნენ. ალარა ვიცოდი-რა. ვფიქრობდი,
თუ როგორ ამომეყარა ჯავრი. უეცრად ვექი-
ლები მომავლნდნენ. სიხარულით გავექანე და
შევედი ერთხან. შევჩივლე ჩემი მწუხარება.
ვუამბე ყველაცერი დაწვრილებით და ვთხოვე,
სასამართლოში ჩემი საქმე ეწარმოებინა...

„— მამა ვაცხონე იმ კბილის ექიმისა, რომ
მაგრე მოგექცა! — ასე მიპასუხა ვექილმა და კარი-
მიჩვენა.

„— შემიბრალე! ასეთ უსამართლობას...

„— გთხოვ, მიბრძანდე, თორემ მეც იძულე-
ბული ვიქნები კისრის-კვრით კბილის ექიმივით
გარედ გაგისროლო...

„ქვეყანა ხომ ჩალით არ არის დახურული —
მეთქი, გავიფიქრე და ფეხ-აკრეფილი გარედ გა-
მოვედი.

„სამართალს ვიპოვი, ვიპოვი, რადაც უნდა-
დამიჯდეს, ვფიქრობდი. მაგრამ კი ვერ მომე-
გონებინა, რა საშუალებით. ასე ჩაფიქრებული
მოვდიოდი, რომ ყური მოვკარი ბაასს:

„წაიკითხე გაზეთში, რა საზიზლარი საქ-
ციელი ჩაუდენიათ? გაზეთი ძალიან ჰქიც-
ხავს...“

„ყური აღარ მიგდია; სიხარულით რედაქ-
ციებისკენ გავიჭეცი. ვუამბე ყველას ჩემი თავ-
გადასავალი და ყველგან ზრდილობიანად გულ-
მტკივნეულობით მითხრეს: ვაუწყებთ ქვეყანას.
მაგ საზიზლარ ამბავსაო.

„დამშვიდებულმა დაუუწყე გაზეთებს კით-
ხვა. გავიდა ორი-სამი დღე და ჩემი ამბავი არც
ერთში არ იყო დაბეჭდილი. ისევ შემოვირბინდ

რედაქტირები და ყველგან ზრდილობიანად მითხრეს: ჩვენ დავწერთ, დავწერთო!

„სტუოდნენ, სტუოდნენ!..

„— მაშ თუ აგრეა, მე თითონ ვაუწყებ ქვეყანას ყველაფერს, მე თითონ გამვლელ-გამომვლელს ვუამბობ... — ზიზლით ვუთხარი რედაქტირებს და კიდევაც შევუდეჭი ჩემი განზრახვის აღსრულებას.

„დავიწყე ქუჩა-ქუჩა სიარული და ვინც-კი შემხვდა, ყველას კალთებს ვუჭერდი და ვუამბობდი, ხმა-მაღლა ვყვიროდი...“

„აღსრულებაში-კი მომყვანდა ჩემი განზრახვა, მაგრამ შედეგი სულ სხვა მოჰყვა. თანაგრძნობის მაგივრად ზიზლი დავიმსახურე. დიდი თუ პატარა დამცინოდა, გამირბოდა, მიკიოდა და ერთ დღეს გაზეთებში აი რა ამოვიკითხე: „ეს რამდენი ხანია, ქუჩა-ქუჩა დადის ერთი გიუ ადამიანი და გამვლელ-გამომვლელს მოსვენებას არ აძლევს, კალთებს აგლეჯს. ნამეტნავად მოსწავლეებს აშინებს. დრო არის, ვისიც ჯერ არს, ყურადღება მიაქციოს და საცოდავი საგიუვეთში მოათავსოს...“

„ტანში ურუანტელმა დამირბინა. ვიკივლე:

„— მე გიუ სრულებით არა ვარ, არა!.. ვაზეთები საზიზლრად ცრუობენ!..

„თავი შეგაწყინე, მგონი, ჲაბუკო!.. ეხლა-
კი ჩქარა გავათავებ. ბევრი ალარა მაქვს-რა სა-
თქმელი...“

„გაზეთების შენიშვნას ის შედეგი მოჰყვა,
რომ მართლა, „ვისიც ჯერ არს“ ყურადღება მიე-
კცია და გამაბაწვრინეს... მხოლოდ ამას-კი გე-
ტყვი, გამოვიპარე იქიდან და, როგორც მნახე,
ტყე-ლრეში დავეხეტები, ადამიანს ვერიდები და
ჩემ ვინაობას ვმალავ, რომ კიდევ იმ წყეული
ექიმების ხელში არ ჩამაგდონ...“

წავიკითხე გულ-მოდგინედ. მეორედ, მე-
სამედ კიდევ გადავიკითხე. და მაინც ვერა გავი-
გე-რა. იმისი სახელიც ვერ გამოვიცანი...“

„მთიელი.“

გიორგობისთვის 1-ს

1901 წ.

გიორგობისთვის 29 ჩემი ამხანაგი დავასა-
ფლავეთ. მისმა მშობლებმა გადმომცეს ერთი
რვეული და ტირილით მითხრეს:

„ავადმყოფობის დროს ამასა სწერდა. იქ-
ნება დასაბეჭდად ივარგოს, გადიკითხეო.“ მეც
გადვიკითხე და, თუმცა ვერა გავიგე-რა, მაინც
უცვლელად ვტეჭდავ იმისთვის უფრო, რომ
მკითხველებმა გაითვალისწინონ, თუ ავადმყოფ-
თა ოცნება რაგვარად მუშაობს.“

ციცინათელა.

(ეტიუდი)

შავბნელი ღამეა. სასტიკი ქარი ჰგლეჯავს არე-მარეს. ერთად-ერთი მუხა, მამა-პაპეული მუხა, რომელიც სოფელზე ძალიან დაშორებულია და რომლის ძირსაც გიორგი ზურგით მიჰყუდებია, ხმაურობს, ბანს აძლევს სასტიკ ქარს და შტოებს იქით ჰხრის, საითკენაც ქარი სწევს, ძირი-კი უნძრეველია, არსაით იხრება...

გიორგის არ ესმის არც ქარის ნავარდობა ამ უბედურ ველზე და არც მუხის ხმაურობა, მისი ალიაქოთი; არც ცის მოქუშული სახე აშინებს, არც-კი ამჩნევს ამ მრისხანებას... იგი თავ-ჩაღუნული ლრმად მისცემია თავის ფიქრებს და მის გარეშე მისთვის ალარა არსებობს-რა...

აგერ რამდენჯერ დაეკითხა თავის თავს სასოწარკვეთილებით: „რად, რად?“ და პასუხის მაგივრად ყოველი ამ კითხვის შემდეგ ერთი და იგივე სურათი ეშლება თვალწინ ულმობელის სიცხადით:

აგერ მთელი სოფელი დაღებული ხახით საშინელ, ლაყე კვერცხის სუნს პირში აორთ-

ქლებს გიორგის... კოჭლი, ბრმა, ყრუ, მახინ-ჯი სულით, გულით და მთლად სხეულით, გა-მოჩერჩეტებული თავის ხნოვანებით, ქალი და კაცი ერთმანეთს არ აცდის, ერთმანეთს ეჯიბრება, რომ უფრო მეტად ააყროლოს ჰაე-რი გიორგის დასახრჩობად, მის სოფლიდან გასაძევებლად... რამდენიმე პირმა ხმა აიმაღლა, რომ გონს მოეყვანა ეს ბრბო, გაეთვალისწი-ნებინა მისთვის საქმის მსვლელობა...

„უუუმ!..“ — შეანჩქრია მთელი თავისი სი-ბინძურე სოფელმა ამ პირით, და იმათაც ვერ შეუძლეს სუნს, აყროლებულ ბინძურ სუნს და პირზე, ცხვირზე ხელები მიიფარეს, რომ ჩასუნ-თქვასთან ერთად მყრალი სუნი მახინჯთა გვამ-ში არ ჩაეშოთ... იძულებულნი იყვნენ განზე გამდგარიყვნენ, თორემ წაობი უფრო შეინძრე-ოდა და...

ასამართლებენ ადამიანს, მის მოქმედებას აკრელებენ, მას სწერავენ და... ერთი, ერთი მათგანი მას არ ეკითხება!.. მასთან, მის პიროვ-ნებასთან ანგარიშის გასწორება არ სურს არც ერთს...

„როგორ სასტიკად შელახეს მისი პიროვ-ნება?!“ — კვნესით წარმოსთქვა გიორგიმ და უფრო ღრმად ჩაფიქრდა...


ქარი მაინც თავისის არ იშლიდა: აქ ნად
ეკალს წაჰკრავს თავში და მიწაზე გაართხობს
იქ ნარს წელში შემოჰკრავს და გადასტეს
იშის ახლოს გოქშოს თავს მოჰგლეჯს და შრი-
ლით წინ გაიგდებს; ზევით, ფერდობზე კიდე
ჯაგს აწრიპინებს, აშტვენინებს, ქვევით მდ-
ლოს, ნათეს-ნახნავს ასისინებს და მუხას ხ-
ისევ აშფოთებს...

გიორგის მაინც არ ესმის არე-მარის ხმა-
რობა...

„ნუთუ ჩვენი საზოგადოება ისე დაშმა-
რებულია, რომ პიროვნების წაშლა მაგრე აღ-
ვილად შეუძლიან?!.. მისი უარ-ყოფა, გაძევება—
—ეკითხებოდა თავის თავს გიორგი; —ისე შე-
ძლიან, რომ არც-კი შეეკითხნენ პირო-
ნებას?!“

„ახ!..—უეცრად წამოიკვნესა გიორგიმ და
თვალებზე ხელი მაგრა მიიჭირა, თითქოს სუ-
რდა ეს მწარე, მყრალი სურათი მოეშორებინა:—
რად მეგონა მისი ჭირი ჩემ ჭირად, მის
სუნთქვა ჩემ სუნთქვად, მისი ლხინი ჩემ ლხი-
ნად, თუ მაგრე მის თვალში მე, როგორც პი-
როვნება, უპიროვნობას შევადგენდი?! რა
მთვლიდა თავის წევრად მე უპიროვნოს?!“

გიორგიმ უფრო მაგრა მიიჭირა თვალებ-



უ ხელის გულები, რომ მწარე ფიქრები გა-
მოეუურა თავიდან.

„ახ, რა შემცდარი ვყოფილვარ, რომ მას,
ამ ჭაობს მხარ-და-მხარ მივსდევდი?!“

გიორგის მწვავე კითხვად ეხლა ეს დაუდგა.
ჩვისი თავი სრულებით გარეშე წარმოედგინა, თი-
ჯეს ჭაობის მყრალი ტალღები მისკენ არ ყო-
ვილიყვეს მოქცეული, იგი სულ გარეშე მაყუ-
ჩებელი ყოფილიყოს, ისე დააყენა და...

„ერთს, ერთს მაინც ამოდენა ბრძოდან
ჩრად მაინც რატომ არ მოუვიდა მართ-
ლა და სინამდვილის გამოცნობა, გამოჩერეკა?!
— წაიქვნესა კიდევ გიორგიმ: — მაშ რა ყოფილა
ეს ბრძო?.. უთავო, უპიროვნო... თუ პიროვნე-
ბის უფლების შელახვა მაგრე შეუძლიან, მაგ-
რე უსამართლო ყოფილა, მაშასადამე, იგი თა-
სი თავს ანდერძს უგებს, თავის თავს თითონვე
ეთხრის სამარეს...“

ამ დასკვნამ შეაურუოლა გიორგი. თავისი
ავი სასტიკად გაჰკიცხა, რომ ამ დასკვნამდის
უიდა. უნდოდა გაედევნა ეს დასკვნა თავიდან,
გრამ სასტიკი სურათი, უსამართლოდ მომარ-
ული მყრალი ტალღები წინ ისევ ცოცხლად
იმართნენ და პირდაპირ მისკენ მოილტვოდნენ...
უნიც მიედინა.

„ფუი, ფუი!..“ — საჩქაროდ გადააფურ
და ხელები გაასავსავა, თითქოს ტალღების თ.
დან მოშორება სურდა...

„არა! შეუძლებელია, შეუძლებელი!
დაიკივლა გიორგიმ, რომ თავისი ხმით თავის
ვე დასკვნა გაექარწყლებინა...“

— დაიღუპება, დაიღუპებაა!..“ — სასკად
შემოესმა საშინელი ხარხარით ეს ხის
ყვები და ამასთან შედარებით მისი კნავილ
სრულებით გაქელა, წაშალა.

გულის ცემა შეუდგა გიორგის. გადა
თრდა.

— არა... არა... არა და არა!.. — სასკად
წარკვეთილებით დაიყვირა უფრო ძლიერი
გიორგიმ და წამს ყურები სცქვიტა...

— ხახახა!.. — შავბედითი ხარხარი ისევ მოესმა გიორგის და მისი არსება თითქმის განადგურა,

— გიორგი, თითონ შენ მიხვედი დასკვნამდის, რომ ის სოფელი უნდა წაიშლოს... — ახლა თითქმის ტკბილად ჩასჩერას ლებდა ყურში ხმა...

— არა!.. — ძლივს წამოიკვნესა გიორგ და ისევ სული განაბა...“

— როგორ არა?.. ვერა ნახე, რა უქამა

ლოდ ააშმორეს შენ გარშემო, რომ წაელეკე, დაეხრჩვე... აბა....

— არიან კიდევ ცოტაოდენნი, რომლებიც... — გულის კანკალით დაიწყო გიორგიმ... — რომლებიც პირველ ხმის ამოღებაზე გააჩუმეს და განზე გააყენეს...

— არა, ისინი...

— იმათაც შენ გზას დააყენებს სოფელი.

— ის ჭაობი ხომ იარსებებს... ის, იქნება,

შემდეგი...

— შემდეგ ის უფრო აყროლდება...

— მერე?! — გიორგი გრძნობს, რომ ძალა ეცლება, სხეულიც უდუნდება, ძლივს - ლა მოახერხა ეს კითხვა მიეცა.

— მერე... — უფრო ნაზად ჩასჩურჩულა წმიან: — ჩემო კარგო, ხომ შენც კარგად იცი და რაღას მეკითხები...

— არა... მგონია, ის იარსებებს, თუმცა კომბად, მაინც იარსებებს... — ძლივს წაილულულა გიორგიმ...

— ეეჲ, ხომ სტყუი, მაგისი თქმა არ გინდოდა...

— მაშ, რის?

— რისა და იმისი, რომ ჭაობი უფრო დალპება... თავის საღ ნაწილებს გახრწნის და

სულ გარეშე ელემენტი წალეკავს, მის ას პობას წაშლის „პირისაგან ქვეყნისა, ვით რცა მტვერს...“

— მომშორდი, მომშორდიი!...— წამოიკ ლა მისუსტებულმა, როგორც-კი მისუსტებულ შეუძლიან, და ფეხი და ხელი მიაშველა თავ ხმას, რომ მოეშორებინა თავიდან არამკით სტუმარი...

— ხახახახა!... — პასუხად მოესმა გიორგი საზარელი ხარხარი, რომელმაც არე-მარე აფსოს...

გიორგი ამ შემზარავ ხმაზე წატორტმუდა, თავი დაუცარიელდა და დედამიწას დაუმოს...

გიორგის გული არ წასვლია. იგი ღია ხობილი იყო. თავის არსებობასაც აღარა გრძნდდა, მხოლოდ შემზარავი ხარხარი-ლა ესმოდა.

წამს აღარც-კი ეგრძნობებოდა მისი სისწვავე, ისე დაეჩხვლიტა სხეული ხარხარის პირველ გაგონებაზე...

გიორგი რამდენსამე წუთს ასე დამხობილი იყო. თუ რამდენს ხანს იყო ასე, ანგარიშს მისცემდა. თანდათან გონება მოეკრიბა და რველ გონების მოკრებაზე ისევ ხარხარის, მელიც ჯერ კიდევ არე-მარეში გაჰქუხდა, ხის-

წვავე უფრო ძლიერად იგრძნო. უმწეო იყო გიორგი, რადგანაც გიორგის თავის არსებაში ისეთი ძალა ვეღარ ეპოვა, რომ ამ დამცინავი და გამათახსირებელი ხარხარისათვის წინ წამოეყენებინა... მისმა გონებამ ხომ უფრო ამ ხმაზე ადრე აუგო ანდერძი სოფელს, და, აბა, რაღას წააყენებდა წინ მის გასაჩუმებლად?!

გიორგიმ როდესაც თავისი დასკვნა წარმოსთქვა სოფლის დაღუპვაზე, ეგონა, ცოტათი კიდევ იმედი ჰქონდა, რომ არ დაიღუპებოდა, კიდევ გამობრუნდებოდა, გაიწმინდებოდა და თავის არსებობას დაიცავდა, გამოანკარავდებოდა... ამისთვის გულიც-კი მოულბა და თავისი შეურაცხყოფა უკუ აგდო... დოსტაქარივით დაწვრილებით გამოკვლევას შეუდგა, რომ...

მაგრამ ეს ხმა, ეს სასტიკი ულმობელი ხმა რად ემოწმება მის დასკვნას... რომ წინააღმდეგი ყოფილიყოს, ეს ხომ მისი ნატვრა იყო. იმისთვის შეუდგა გამოკვლევას, რომ თავის საწინააღმდეგოდ რაიმე ეპოვა და ჭაობის არსებობა თავის გონებაში მაინც მკვდარ საძირკველზე დაემყარებინა...

მაგრამ ეს ხმა?! ეს შავბედითი ხმა?! გიორგიმ თავი შალლა ასწია და:

— ლმერთო, ლმერთო!.. — უმწეოდ შეევე-

დრა უფალს, რომ იმას ჩაეგონებინა, მაგრამ ღმერ-
თი სწორედ ამ წუთების დროს არის ხოლმე
შეკრული და არას ამცნებს ადამიანს...

გიორგი სულ-განაბული შეიცექირებოდა
ზევით, თითქოს ზეშთაგონებას მოელოდა, მაგ-
რამ ვერას ხედავდა...

ცაც ხომ მოქუშული იყო...

მხოლოდ ესმოდა ქარის შტვენა, წივილი
და კვნესა, მუხის ფოთლების აღგზნებული
შრიალი, ტოტების ჭაჭა-ჭუჭი...

უეცრად მის თვალ-წინ გაჰკრთა ოდნავი
შუქი და ისევ სწრაფად მიიმალა... ჩაქრა. გი-
ორგის ეგონა, თვალმა თუ გამიელვაო, და ისევ
ისე ზევით შეიცექირებოდა, ისევ იმავე მოლო-
დინით...

კიდევ გამოჰკრთა ოდნავი სინათლე და
ისევ სწრაფად მიიმალა.

გიორგის თვალებმაც გააშუქეს. ეს შუქი
მის გულშიაც ჩაეშვა...

კიდევ გამოჰკრთა შუქი მუხის ფოთლები-
დან და კიდევ მიიმალა...

მის გონებასაც მიეშუქა სინათლე და აამო-
ძრავა... სინათლე-კი დრო გამოშვებით გაწიკ-
რთის მუხიდან.

გიორგი მიხვდა, რაც იყო. ციცინათელა

ამ შავბედით ლამეს მიჰკვრია მუხის ფოთოლს
 თუ ტოტს...

თვალი ვეღარ მოუშორებია გიორგის, მი-
 სი გონება სიმძაფრით მუშაობს...

ლმერთს აღარ ემუდარება, სულ-განაპული
 მის შთაგონებას აღარ ელის... გადაავიწყდა კი-
 დევაც, რომ შეევედრა მას. ეხლა იგი ციცი-
 ნათელას შუქმა შებოჭა, შეიბურო, თუმცა მას
 სასტიკი ქარის გამო, რომელიც მუხის ფო-
 თლებს აშრიალებდა მის თვალებსა და ციცი-
 ნათელას შუა, მხოლოდ დროგამოშვებით ხე-
 დავდა, და მის გონებას სხვა მიმართულება
 მისცა...

„...რა არის ციცინათელა?.. სულ უბრა-
 ლო, მცირე მწერი და აგერ იგიც, თუმცა ეს
 სასტიკი ქარი საშინელის სიძლიერით ებრძვის,
 სცდილობს, თუმცა შეუგნებლად, მის პიროვ-
 ნების წაშლას, იგი მაინც თავისას არ იშლის...
 უძალიანდება, ვიდრემდის არ გაშეშდება, არ
 მოკვდება, ამ ძალის მსხვერპლი არ შეიქმ-
 ნება და უკანასკნელ სულის ამოხდამდის თავის
 პიროვნებას, თავის არსებობას ამცნევს ქვე-
 ყნიერებას... თავის თვისების წაშლა არ
 უნდა...“

ციცინათელა-კი ისევ აშუქებდა, ისევ

ჰერთოდა წყვდიაღში და თავის ადგილიდან ფეხს
არ იცვლიდა...

„რაც შეუძლიან, მოვალედ სთვლის თა-
ვის თავს, გააკეთოს და არაფერს შეუშინდეს...
დეე, სასტიკი გარემოება, როგორც ციცინათე-
ლას, ხელს უშლიდეს, ეწინააღმდეგოს, პიროვ-
ნებამ თავის უკანასკნელ სულის ამოხდამდის
მოვალეობას არ უნდა გადაუხვიოს და წინ მი-
დიოდეს შეუდრეველად...

მოქუშული ცა ისევ მოქუშულია, სას-
ტიკი ქარი ისევ სასტიკად აკვნესებს არემარეს,
სოფლიდან ისევ მყრალი სუნი მოისმის... მა-
გრამ გიორგი პირდაპირ სოფლისაკენ ძლიერის
ნაბიჯით მიდის... რამაც გამოაქცია, ეხლა, იმი-
საკენ მიდის, რომ თავისი მოვალეობა შეასრუ-
ლოს, რომ ჭაობი ნაკადულად გარდაქმნას, და
მის ნაბიჯს არა აფერხებს-რა. თუმცა ქარიც და
სოფლის სუნიც ეწინააღმდეგება... მისი რწმენა
ეს არის და უკანასკნელ წუთამდის, როგორც
ციცინათელას, ვერა შეაყენებს-რა.

„ციცინათელა ციცინათელად მოკვდება!“--
ამაყად გაიძახდა გიორგი და მედგრად მიარ-
ლვევდა ქარის ტალღებს და სოფლისას...



სარჩევი.

	გვ.
1. „ადე, ჩამოვიდა!“	3
2. „ბერი, რადა მკლავ?!“	13
3. „ჭეშმარიტად!“	22
4. „ქარი-კი ამ დროს უუთდა, პვნესოდა და გმინავდა“	31
5. „ღმერთო, რა დაგიშავე?!“	44
6. „ეჭ, ჯანდაბას ჩემი თავი და ტანი!“	55
7. „...ხითხითებს და ხითხითებს..“	70
8. „... მხრები-და ავიჩეჩე...“	86
9. „ის!“	132
10. შემუსერილი სამი მცნება	143
11. „უცნაურია, უცნაური!“	163
12. ჩემი თავ-გადასაგადი.	175
13. ციცინათელა.	190



79-91

15-

~~~~~ 3160 23 015870 ~~~~